

國學基本叢書

景

文

集

一

246



由國家圖書館數位化、典藏

書叢本基學國

集 文 景

(一)

撰 祁 宋



行發館書印務商





564:2  
四庫全書總目提要

案景文集。宋宋祁撰。祁字子京。開封雍丘人。天聖甲子。與其兄庠同舉進士。累官翰林學士承旨。諡景文。事迹具宋史。晁公武讀書志。謂祁詩文多奇字。證以蘇軾詩。淵源皆有攷。奇險或難句之語。以今觀之。殆以祁撰唐書。彫琢剗削。務爲艱澁。故有是言。實則所著詩文。博奧典雅。具有唐以前格。殘膏賸馥。沾句靡窮。未可盡以詰屈斥也。陳振孫書錄解題。又稱祁自言年至六十。見少時所作。皆欲燒棄。然攷祁筆記。有云。年二十五。卽見奇于宰相夏公。試禮部。又見稱于龍圖劉公。蓋少作未嘗不工。晚年特爲進境。至于舉陸機之謝華啓秀。韓愈之陳言務去。以爲爲文之要。則其生平得力。具可想見矣。祁曾戒其子無妄編綴作集。使後世嗤詆。今據陳之強原序所稱。知在嘉定時。安州守王允初等。曾將二宋集合刊。但序內僅稱其言八十餘萬。未經析及卷數。祁本傳稱集百卷。藝文志則稱百五十卷。又有濡削一卷。刀筆集二十卷。已與本傳不符。其餘如范鎮所作神道碑。馬端臨通攷。則俱稱百五十卷。曾鞏隆平集。王偁東都事略。陳振孫書錄解題。及焦竑經籍志。則俱稱百卷。鄭樵通志。則止稱七十八卷。唐庚序則稱二百卷。因集已失傳。記載互殊。莫詳孰是。陸游集。又載祁詩。有出麾小集。西州猥藁。蜀人任淵曾與黃庭堅陳無已二家同注。今亦不傳。近人所輯北宋小集。中有西

州猥藁一種。乃從成都文類、瀛奎律髓、文翰類選諸書採輯而成。非原本也。茲就永樂大典所載蒼粹哀次釐卷六十有二。雖未必盡還舊觀。然名章鉅製。諒可得十之七八矣。祁兄弟俱以文學名當時。號大宋小宋。其兄庠遺集已從永樂大典採綴成編。今祁集亦于蠹蝕之餘得以復見于世。雖其文章足以自傳。實亦幸際聖朝表章遺佚。乃得晦而再顯。同邀乙夜之觀。其遭遇之奇。良亦非偶然矣。乾隆四十六年七月。恭校上。

清高宗題元憲景文集並各書其卷首

宋庠、宋祁兄弟同負盛名，且同舉進士。時以大小宋並稱，乃其官位一，至宰輔一，為尚書，事業所就既殊，情性亦奢儉各異，故其詩文沈博新警，因各隨其性之所近，而為世所傳誦則同。及戒其子不令刊類文集行世，亦同。迨其後雖經合刊，繼而仍歸散佚，又同。茲復裒輯成集，並以聚珍版印而流傳之，又無弗同。其同不同之故，庠與祁固無能知之，余亦烏從而知之。然其散也，由于自欲韜晦，而其聚也，幸有永樂大典之僅存，佚之于七百餘年以前。宋天聖至今七百五十餘年而完之于三百餘年以後。明永樂至今三百七十餘年則又復歸于同。余因合題一詩，並冠于兩集簡首，更使之不同而同，則向之所謂同不同者，皆可勿深論。是之謂大同。

二宋合刊曾紀王。宋嘉定間郡守王允初倡議欲合刊二宋集以屬郡文學惜哉分集失傳，詳學如有本陳之強，未就而去。其後太守陳芾捐資刊成之，見之強序。終難晦，行不負言，久益彰。伯也孤風，標雅操。仲兮強識富文章，雖稱儉過及奢過，弗愧元方與季方。收拾碎珍得全冊，吟題七字冠前行。休嗤大典紛割裂，愛禮幸茲存餼羊。





# 原序

仁廟初號人物全盛時。而尙書與其兄鄭公。以文章擅名天下。其後鄭公作宰相。以事業顯于時。而尙書獨不至大用。徘徊掖垣。十數年間。故其文時多奇特。兄弟于字學至深。故其文多奇字。讀者往往不識。其將歿世。又命其子慎無刊類文集。故甚秘而不傳于世。元符二年。其子袁臣爲利路轉運判官。予典獄益昌。始得尙書所爲文。讀之粲然。東坡所謂字字照縑素。詎不信哉。文集二百卷。予得九十九卷。其餘云在曾子開家。袁臣謂予。他日當取之。并以授子云。唐庚序。



# 原序

荆湖之間。國朝以來。安州爲望都。名公鉅卿相繼而出。元憲景文宋公伯仲。則其傑也。昔太守今右司李公揆。繪其像而立之祠。逮之強之來請于郡。而春秋致祭。亦可以夸示後學矣。然宋公之典刑雖在。而文集不傳于鄉郡。謂之闕典。寓公李令尹之家。舊有繕本。太守今都運王公允初。昔爲通守。每與之強言。欲借而刊之。未能。逮持節京西。于其行。以帑藏之餘。幾千緡。屬之強與之。鈔本以廣其傳。又分數冊以往。將以速其就也。然攷之二集。旣富且贍。其言八十餘萬。工以字計。爲錢幾四百萬。米以石計。百有二十。他費不預焉。之強懼其難成也。而白之太守陳公芾。公一聞之。欣然謂之強曰。是亦予志也。郡當瘡痍之後。雖賑恤施予。日不暇給。然亦當輟他費以成之。二公政事文章兩極其至。故能于倥偬艱難之際。而爲粉飾治具之舉。其與蓄財而不知予。妄費而不知用者。豈不大有逕庭耶。之強深有感焉。因其成也。書之篇首。以告來者。若夫贊元憲景文之鉅篇大作。則有國史在。于前輩之鋪張揚厲而爲之序。則之強晚生。不敢措辭。觀是集者。自當知所敬歎。今之序。姑記其文集之傳云爾。嘉定二禩三月上澣。郡文學陳之強序。

〔案〕此序已載元憲集。因係合刊二宋文集之序。故并載于此。



景文集目錄

卷一

賦六首

卷二

賦十五首

卷三

賦十三首

卷四

賦十一首

卷五

風雅體詩三首

卷六

五言古詩三十八首

五言古詩三十七首



卷七

五言古詩三十六首

卷八

五言律詩九十五首

卷九

五言律詩八十首

卷十

五言律詩八十七首

卷十一

五言律詩七十六首

卷十二

五言律詩七十二首

卷十三

七言律詩六十六首

七言古詩十一首



卷十四

七言律詩六十三首

卷十五

七言律詩六十一首

卷十六

七言律詩六十首

卷十七

七言律詩六十三首

卷十八

七言律詩六十九首

卷十九

五言長律三十五首

卷二十

五言長律四十三首



卷二十一

五言長律三十八首

卷二十二

五言絕句八十一首

卷二十三

七言絕句一百一首

卷二十四

七言絕句八十五首

卷二十五

奏疏六首

卷二十六

奏疏九首

卷二十七

奏疏七首

七言長律二首

春帖子詞三十八首





卷二十八

奏疏十二首

卷二十九

奏疏十三首

卷三十

奏狀三十二首

卷三十一

外制四十一首

卷三十二

內制二十四首

卷三十三

內制四十四首

卷三十四

頌五首



卷三十五

頌五首

卷三十六

表十八首

卷三十七

表十四首

卷三十八

表十二首

卷三十九

表十八首

卷四十

表十七首

卷四十一

表十八首



卷四十二

議四首

卷四十三

議八首

卷四十四

論二首

卷四十五

序十四首

卷四十六

記十五首

卷四十七

贊六十三首

卷四十八

說四首



論二首

對一首

述一首

戒一首

祭文一首

卷四十九

書四十三首

卷五十

書二十三首

卷五十一

書四十九首

卷五十二

啓三十七首

卷五十三

啓三十二首

卷五十四

題辭一首

祝文十九首



啓四十一首

卷五十五

啓三十六首

卷五十六

啓三十三首

卷五十七

碑五首

卷五十八

誌銘七首

卷五十九

誌銘八首

卷六十

誌銘九首

卷六十一



行狀四首

卷六十二

行狀四首



# 景文集卷一

賦

園丘賦

若夫天地之區。旣奧而腴。王者所以作京焉。神明之隩。匪攻而築。上帝所以定位焉。我朝之擁歸運也。譏函鎬保界之陋。鄙周雒淳潛之淵。乃據梁之芒芒。偵河之渾渾。畫邦畿之千里。于以宅天子之尊。然後翼翼乾乾。作邦孚先。禘其祖之所自出兮。遂有事乎昊天。占國南之七里。得高丘之岷然。自乾寓之初闢。保坤靈而不遷。藏偉兆于遐葉。震元符于茲年。此烈祖所以哀神之對。神宗所以旅物之蠲。真考之所陟降。丕后之所周旋。藹列聖以烝衍。總萬靈而賓延。翕降監之厚福。焯巍巍而亡原。則晉攷卜乎委粟。漢臍饗乎甘泉。曾不得望我之末光。絕炎況竝驅而齊肩哉。敢問園丘之狀也。其何如矣。廣矣大矣。略可詳矣。上崔嵬以鬱律兮。外博敞而神麗。遡朱鳥以高蟠兮。概瑤魁而表峙。休氣回復乎其椒兮。榮泉滋滲乎其趾。魍魅不若泯伏于其遠兮。神明肅然離衛乎其邇。于是攘之辟之。其蓄其翳。修之平之。其坎其巖。上三陔以積高。外四門而疏陞。列道糊頽。重營界紫。無縮版以作勞。不藉鬪而昭侈。因天質之自然。非人力之攸

宋 宋 祁撰

致。峯兮似高山之在周邦。截焉若隆。雕之亘汾澨。及夫涓日肇祀于郊之宮。陶匏尙質。金石有容。璧奠縹以蒼蒼兮。鼎歆雲而隆隆。百神服食。蔓衍乎坎間兮。有司守燎。粲爛乎境中。穆穆天子。相維辟公。咸盛氣以彊力。相升降兮穹崇。披大紫之莫莫。招翠黃之雍雍。合蕭薌于欽崇。曳高煙乎璇穹。塞天淵以隕祉。奮光明于無窮。竣乎主事。罔有不恭。若乃自內出者。無匹不行。自外至者。無主不止。故我率乎祖而推本。正乎位而升配。使禮動乎上。則神饗。樂交乎下。而人喜。畢九州以獻力。罄一純以盡意。君子曰。觀天下之物。無以稱其德。所以因天事天。取至誠爲貴。則斯丘也。實國家集福之清場。事神之寶時。國聽之所憑厚。靈心之所翔會。駐魄寶于飈歛。賁黃圖之方志。彼草樓列仙之館。像設梵王之廬。豚蹄種祠之託。鱗長九淵之居。皆祠官之細。祀族之餘。尙且落成者。鼓吻而極嘆。乞靈者。舐筆而爭書。叛宣父以語怪。溺丘明之好巫。獨園丘歸而遺美。寧儒者。佞而末之思歟。遂作頌曰。屹圓壇。赫眈眈。大盤盤兮。君之升。帝是饗。鞏而安兮。禮無違。福不回。委如山兮。聖繼聖。萬斯年。長監觀兮。

陳州瑞麥賦并表

臣某言。伏以厥田惟上。界王國之右藩。以穀俱來。告我牟之紀瑞。事昭邦緯。美溢農書。恭惟皇帝陛下。茂擁蕃祺。恪經善物。弄漢田而勸嗇。揉神耒以訓勤。扈有九官。務盡耕耘之法。地雜五種。深防水旱之虞。屢敕攸司。勸登宿麥。至誠上達。嘉氣下翔。發爲兩岐。告成八政。田祖有神。而後應。守邦作繪。以來圖。庖穗孔



蕃天心爲豫。並詔儒館。交挾頌章。良史必書。無謝歸禾之命。升歌大備。遂高多稼之詩。臣位屬冗閒。辭流澁訥。隔從臣之品。無預奏囊。效遊童之謠。亦均嬉壤。冒聞黼几。集懼嚴淵。謹夙夜齋戒。撰成陳州瑞麥賦一首。隨表上進。賦曰。

冠三輔之上者。莫邇于陳。接五穀之乏者。孰先于麥。當乘離之令序。挺降甦之瑞殖。盛氣雲鬱。混鱗隰之初霏。密穗金繁。動星田之霽色。兩岐旁秀。六穗牙出。厥華芄芄。厥穎栗栗。田峻奔告。守臣駭觀。倅來以圖。悉上送官。他穀弗書。視麥禾之最重。吾王攸助。知稼穡之惟艱。沫北爰采。罔劭乎力農。關中益種。無聞于錫祉。詎若天極歸貺。明神效異。偕蕃椒之盈升。配命禾而合穗。迎層宙之仁氣。冠中田之嘉穀。繪我于瑞圖。辨我于凡菽。蒙至尊之渥惠。播新聲于絃次。上可以薦清廟之馨品。下可以助外饗之食劑。

皇帝後苑燕射賦

并表序〔案〕仁宗本紀不載後苑燕射事。此賦首云執徐統歲。當是天聖六年。祁改國子監時上。

臣祁言。伏聞今月九日。幸後苑。詔宗室。賜宴射弓者。氣肅商旻。神清漢籟。展懿親而合宴。講王射以侑歡。常武是經。良辰飾喜。恭惟皇帝陛下。靖嘉民極。勤訓道樞。鈞衆志以惟精。又永圖而無逸。夾輔蕃屏。立愛于周親。夏屋權輿。示慈于鎬飲。乘九秋之盛集。修六耦之帝容。終日射侯。不出正而命中。嘉賓式燕。實厥篚以奉將。洽公姓之樂胥。竦臣鄰之詠嘆。多儀有煥。在古罕偕。臣位屬冗閒。業專講肄。久陶景化。竊耳大猷。敢萌誦聖之心。仰企強名之作。感緣中發。雖極扞于四支。音以叩頰。更增羞于五降。謹夙夜齋戒。撰成

皇帝後苑燕射賦一首。繕寫隨表上進。

臣聞。羲圖肇畫。諸睽取星弧之象。周文彌郁。大樂著天騶之節。諒以四方爲志。本男子之事。一張作武。震王者之威。自秦制專私。漢道云雜。徒存燕射之舊禮。罕聞明辟之親御。惟魏祖收南皮之野。一日射雉。獲六十三頭。史筆詫其妙。文成避靈丘之區。仰山發矢。高四百餘丈。琰刻旌其處。是皆殊絕之詭遇。本非揖讓之多儀。攄其善經。後我嘉會。恭惟皇帝陛下。膺載周之陳錫。紹放唐之丕律。高拱巖廊之上。丕冒環海之表。百執之駿奔走。無或曠官。四方之大和會。不知何力。于是外朝夙退。杪秋告豐。慶重合之陽名。申式邀之夏具。披虎落之圍。會麟定之親。始講射侯之容。將明潔解之禮。若其天威粹健。帝表胖正。雕弓栗筈。儼若有容。棲鵠畫正。砉然命中。歡聲回商瑄之肅。餘勁助霜旻之高。宗室奉觴。以次稱壽。僉謂天挺其武。所以輔文之縟。事本于禮。所以綴樂之諧。蓋陛下財成大猷。冠卓千古。是而弗紀。有司之過也。夫言以文遠。功由賦宣。不有作者。將何述焉。其詞曰。

執徐統歲。少皞司秋。月著授衣之令。日紀吹花之游。僊盤露變。神闕雲浮。田峻告茨梁之獲。鄉童啓豫助之謳。上乃留矚良辰。載懷茂苑。呼蹕複道。回輿帳殿。望葱鬱于麟極。披陰岑于虎圈。踰鳳遙遡。相烏細轉。涼翠下長楊之宮。暝紫入棠梨之館。千門洞接。九幄霞連。周邦則伯叔之懿。漢家則肺腑之賢。相趨規地。雜筵瓊筵。儼飛綏而交弭。森委珮而凝銷。川醪溢汎。騎炙紛傳。湛其露而在草。需有雲而上天。先是司射

謹官梓人庀具。飾虎進侯。張狸設步。上幹下幹之交維。三乏三正之並樹。排崇旌以虹拖。畫廣棚而雲布。并夾竝儲。決拾相旅。我物孔揚。我儀用光。剡矢薦于夏箴。彫弓出于扶桑。彩五施而列暈。歌九節而升堂。萬乘來御。羣心樂康。弦隨月上。弓與天張。姬周則多材之主。湯乙乃甚武之王。有翼有嚴。不難不竦。舍拔則拱。應弦而中。主皮割其已徹。勁羽飲而猶動。駭跋烏于日域。震封狼于星塚。彼藝有六。徒得乎剡注。參連我善兼五。不專乎興舞和頌。掩前辟以亶名。表上天之錫勇。于是皇襟兌悅。協氣雲蒸。少府之賜錢流地。庖人之割肉如陵。示慈則折節加俎。式宴則鼓瑟吹笙。軒霞蕃后。磐石宗英。美發的之希代。咸奉觴而造庭。似離澤之翔振鷺。若辰居之環列星。原夫射之爲義。是謂觀禮。外則審固而正躬。內則雍容而釋志。支左詘右之能。項發口縱之異。或合宴序賓。或算多與祭。公用隼而射墉。觀如牆而揚觶。中則得爲諸侯。爭有似乎君子。然特人臣之善容。未識我皇之射意。若夫修五常爲弓。矯百度爲矢。總黎獻以樹的。罄綿區而除位。參天地之控引。順陰陽而張弛。一發則英雄在殼。虛撫則蠻夷斷臂。豈徒鵠爲小鳥。取難中之名。騶曰仁獸。樂庶官之備而已哉。是日太師闋樂。酒正徹觴。辰旋回指。歸于未央。

上苑牡丹賦

并序〔案〕賦係天聖七年  
祁爲國子監直講時上

臣聞天以蓋高爲質。不待言以達意。物以非常爲感。不擇物而效端。故日月得之爲見象。草木得之爲鴻英。堯則冀草蒔陞陞。漢則玉芝秀池雷。桃夭美室家之盛。蓼蕭著王澤之廣。託寓雖細。賦施甚明。聖上卽

位之七年春三月內苑出牡丹三種。特異常卉。其一雙頭并幹。其二千葉一房。其三二花攢萼。跗足甚大。葩色正紅。蓋上帝博臨之都。休精回復之地。襲百昌以挺出。震殊應而沓臻。聖上美茲嘉生。載延睿賞。有詔侍從咸俾陳篇。良以天瑞來。皇襟豫。物宜遂。頌聲作。其崇丘行葦之比乎。都荔桂華之儔乎。下臣無庸竊耳嘉致。飾是蹈舞。永爲文詞。不敢預枚臯之倫。庶將備適人之採賦。曰。

夫何牡丹之挺育。冠羣葩以擅奇。歷上古而隱景。逮中世而揚蕤。桐君之錄兮。曾莫余毒。謝客之詠兮。蓋殊爾知。有隋種藝之書。疎略而未載。子華繪素之筆。髣髴而傳疑。蓋神明其德。故隱顯從時。昔也始來。由皇唐之綴賞。今而薦瑞。後我宋之重熙。徒觀夫強幹深根。交柯委質。膩理內滋。夸容橫出。材無用兮。不取美于匠目。子非甘兮。不見傷于口實。懷香馥郁。結蔭葱密。讓衆卉之先榮。燦靈華而後出。解苞星布。丹艷霞蔚。雜雙行之重錦。銜已文之兩黻。挹仙掌之承露。遡咸池之浴日。莫不玩之者怡神。攬之者蠲疾。彼芍藥萱草之凡材。穠李標梅之俗物。杜若騷人。蘭香燕姑。曾不得齒其徒隸。況與之論其甲乙哉。于是圭苑密清。瑞殖欣榮。翠華雷豫。清蹕天行。眷大造之脗合。慶神物之財成。粵雙跗之特異。與合榦而同名。爲貴于多。何如千葉。莫斯爲盛。誰比三英。信夫顧神縣以隕祉。夏珍坤而炳靈。匪一花之取貴。蓋萬物之厚生。于是宸矚灑然。羣心樂只。詔從橐以均賞。肆詩風而飾喜。且其鋪觀往圖。各祛茂祉。胡不出于下土。而出乎京師。胡不萃于異品。而鍾乎花卉。臣愚不識。請占之天意。若曰。雙頭者。兩宮之應。同德之象。馨香升聞。

億兆攸仰。千葉者。卜年之數。永命所基。宜爾子孫。以大本支。三花者。品物盛多。黎庶蕃庶。德宇宏被。恩腴周普。有一于此。尚可咤丕應。奮終古。況凝層昊之協氣。萃上林之敏樹。重葩疊葉。凝丹絢素。邇顯若之龍顏。間娑然之鳳羽。亦由芝房之唱。升漢之郊廟。桃花之行。著唐之樂府。上方執沖德。合鴻猷。特以人瑞爲應。不以物瑞爲尤。則是花也。聊可玩于耳目。故雖休而勿休。

皇太后躬謁清廟賦

并表〔案〕仁宗本紀。謁廟時。祁直史館。在明道二年。

臣某言。伏以遙追孝者。雅人歌其匪棘。能事神者。書筴美其多材。況祇款廟祧。哀對宗禰。宣治馨而有飴。恍愾嘆以如聞。從昔所難。乃今具舉。恭惟皇太后陛下。至仁兼愛。柔道體元。保育長君。就成聖德。出入一紀。鞏固萬樞。黎苗偃化。則澤從雲游。殊鄰結好。則倚若天等。三光儲發斂之度。百物遂零茂之宜。且念措多方之治平。皆真考之遺法。成功不薦。審訓謂何。亟詔攸司。屬新圖禮。躬按天飛之馭。並會月游之庭。萬羽蹈揚。禕章參亞。逮晏朝而已事。因列聖以居歆。薰然至和。入金匏而成象。錫之多福。塞穹壤以無垠。臣屬在陪祠。職當汗簡。輕率斐狂之思。少裨舞歎之餘。敢露懼悚。自忘樸學。謹夙夜齋沐。撰成皇太后躬謁清廟賦一首。干瀆宸覽。

聞夫祀以息民。王假有廟。昔人美而稱之。殊不知。粢盛之香。所恃者昭德。祝史之薦。不愧者信辭。濟濟非盡志之貌。翼翼爲多福之基。然未有祓精意。燁鴻儀。仰瞻丹楹。則禘而後獻。俯奠嘉玉。則告而不祈。非聖

后之有作。疇能出千古而鬯豐規哉。於皇齊聖。紹天葆命。佑育我長君。財成我庶政。十有一年。綿區底定。且曰。予惟膺真廟之託。耿列聖之光。投艱夙夜。罔或怠遑。幸三邊無誰何之警。萬物躋仁壽之場。若使功成不告。則春秋祇事。無以奉承審訓而享我先王。丕顯明辟。孝愛兼極。將順德音。爰告方國。列保廕于親慈。諗勤勞于聖職。粵若朝多吉士。位靡瘵官。乃承乃弼。爲屏爲翰。薪有芄楫。河無伐檀。此則聖后備陶姚則哲之難也。清問下民。哀矜庶獄。興列化條。恢疏網目。杜其牙角。保我墉屋。此則聖后有成康措刑之速也。每歲命使。繼好龍庭。轅輻相銜。厥角相平。罔投以餌。罔繫以纓。此則聖后保漢宣撫和之盟也。能仁精慮。聖仙福地。有種于祠。有歆于類。莫不發少府之藏。賁萬楹之麗。此則聖后奉唐家戒禱之至也。恭則易優。儉斯少欲。金玉不釳于上方之器。纂組不麗于三宮之服。別苑無從禽。離宮無改築。此則聖后守黃老清靜之躅也。至于熙百志。又萬樞粹與天謀。沖與道俱。朝夫昕而晰燎。夜已乙而觀書。尙且勤勞勵翼。輯闕袞而按羅圖。是以長樂之記。彤管之史。休功懿績。紛綸填委。雖巧勞與智憂。邈無階而勝紀。是宜格祖謝成。有齋恤祀。答在天之丕覆。擁如山之祕祉。于是方岳投頌。臣鄰肆儀。增蔽旒于法冕。加緝采于禕衣。皆宸心之參定。掩前聖之未思。乃以仲春吉日。曳九旗。參六螭。雲罕前導。王軼下馳。羲和掃霞以登照。雨師沈景而藏霏。攸徂之民。注耳傾目者以萬計。惟恐屬車之行遲。寶輅徐動。雲簾四垂。翟菲馳乘。次于雞翹之省。莫不穆穆肅肅。按周道而翳華芝。有血闕宮。光昭帝容。百工如繡。廣樂成宮。阻芝英以自潔。秉葵

首而有融。鸞刀驕然。刑麗牲以升几。王瓚鯨爾。湛明水而函空。邊豆惟旅。鋤芼相從。徧七室以沃灌。罄一德而虔恭。星妃備亞獻之列。月后謹三酌之容。二告交答。萬祥來同。然而歸蕃釐于嗣帝。讓懿鑠乎祖宗。是以祕祝私請。無一當于聖躬。寧不謂慮危以安。保盈以冲。雖古之任姒馬鄧。區區述美。曾不足踵武而齊風。樂闋禮成。回輿而歸。天子乃孳率籲之固請。建丕稱而揚徽。拜奉瓊冊。內薦椒闈。上公旄節。以焜照羣臣。冠劍而陸離。遂鴻名于茂實。儷天極之巍巍。已事而詔曰。我之此行。務達至誠。不豐于昵。不有其名。惟齋心以交肸蠶。惟合漠以侑神明。然重勞百執之庀事。聊第賜于公卿。若夫策勳舍爵。茲事體大。則候夫皇帝之躬耕。

右史院蒲桃賦有序

癸酉之仲夏。予受詔修書。寓于右史院。紬繹多暇。裴回堂除。有蒲桃一本。延蔓疎瘠。垂實甚寡。予且玩且嗜。以爲省戶凝切。禁廷敞閒。人不天摧。禽不栖喙。與平原槁壤有間。匪灌蕞宿莽所干。而條悴葉芸。不爲時珍。何耶。得非地以所宜爲安。根以屢徙爲危。封殖浸灌。信美非願。因爲小賦。代其臆對云。

昔炎漢之遣使。道西域而始通。得蒲桃之異種。偕苜蓿以來東。矜所從以至遠。遂徧植乎離宮。去葱雪之寒鄉。託崑函之福地。並萬寶以均載。歷千古而舒粹。玩之可使蠲煩。食之足以平志。不由甘而取壤。迺因少而獲貴。鄙柚包之輕悅。賤蔗境之塵滓。粵何人斯。殖我于茲。託深嚴之祕署。切轆轤之文棖。培孤莖以

膏壤引柔蔓乎標枝。泉石渠以蒙浸。露金莖而泫滋。布涼影于月宮。獵重葩于禁颺。蔽周廬之岑寂。隱肅唱而透遲。彼得地而逢辰。宜欣欣以茂遂。奚敷華而委質。反慘慘而茲瘁。乏磊砢于當年。讓紛華于此世。是必野荻非層掖之玩。非實異太官之味。困枳橘之屢遷。嘆匏瓜之徒繫。亦猶鬱柳有性。不願栝樅之華。海鳥取容。非榮觴酒之饋。胡不放之巖際。歸之壟陰。上敷榮于樛木。外結庇于緇林。蒙煙沐霧。跨野彌岑。豐茸大德之谷。栖息無機之禽。保深根以庇本。誠繁實之披心。窮天年以善育。奚斤斧之可尋。亂曰。階藥銜華。堂萱爭麗。枝以萬年爲名。木以五衢稱瑞。是皆託中涓以進藝。荷鈎盾之爲地。結實心以自如。非孤生之所冀。



# 景文集卷二

## 賦

### 古瓦硯賦

有知己者。貺予以古瓦硯一枚。溫潤可嘉。寶玩無斁。感物銘惠。因爲賦之。其詞曰。  
粵有雅器。以硯爲謚。本瓴瓦之微物。荷坯陶之洪施。嗟興廢之靡常。念終始而殊致。昔何爲而湮沒。今何爲而見異。得非大廈雲構。飛薨山峙。凌霧概日。橫鄠蔽里。宮窈窕而相屬。闕觚稜而叢倚。做金谷之爲樓。會叢臺而成市。莫不狀翠鱗而隱軫。浮青煙而旖旎。陽烏結阿。以上承。玉女飛牕。而下視。忽代往而棟撓。俄人非而室燬。遇昆陽之飛屋。逢霍家之徹第。化魏宮之鴛翼。災柏梁之魚尾。于是星墜冰散。光沈物遷。狼籍舊圃。沉埋野田。失蚪檐之瑞色。掩銅霽之餘鮮。朽壤晦兮何日。縹苔封兮幾年。或深耕而出壠。或被發而當阡。詎毀方之可冀。甘勝注之長捐。何智者之肯會。爛奇姿之下顛。感無情之舊物。將有用于羣賢。爰究爰度。載磨載鑄。因其竄以爲受。卽其陋而成研。我質具矣。幽光粲然。純漆侔黑。潤珉訂堅。謝泥塗之幽處。升文史之長筵。或兔穎而前試。或雞距而相鮮。荷提攜于手澤。涵文飾于言泉。若乃尼父作經。太沖能賦。伯英臨池。王充置柱。君苗未之焚棄。范喬見而悲撫。雖寶肆之非齒。幸哲人之攸御。摩頂至踵兮墨

之徒將效勤于斯語。

臥廬悲秋賦

澤國秋早。霄垠夜涼。孤雲度隴。流水周堂。榆兼柳以同晚。李與桃而代僵。初收白羽。尙展流黃。城上星殘。烏八九而生子。林間露滴。鵠十五以成行。有客伊何。于茲戾止。左思洛中之僮父。蕭育杜陵之男子。濫筵幕廷。寧磨楯鼻。昧狗曲之禮歌。陋雞棲之車柅。結課歲殿。勞形日悴。銜窶數以未容。給侏儒而幾死。江淹本恨。朱玉多悲。撫彫年之易晚。嗟芳物之行衰。箕風械以生字。娥月皓而侵帷。寥寥鴈引。嘒嘒蟬嘶。壯士抱翻車之嘆。長年有落木之悲。況乃鞅掌孤官。棲遲下館。市門逞誚于刺繡。冰氏見排于挾炭。根同江北之移。病比漳濱之竄。悵悵臂肉。已先家令之銷。種種顛毛。弗翅齊人之短。感鷓鴣之妬芳。對鷓鴣雞之申旦。本無情于時遇。誤策名于王府。謝胥臣之多聞。有倪寬之懦武。感慨中發。驅馳自許。凝粹采于蔽翳。憂正聲于韶濩。均捶鈎之重輕。督絲繩之規矩。暴皜皜于秋陽。抗嗜嗜于風雨。顧有志于佐時。惜無津而事主。令伯之內轉難期。盛憲之多憂有素。翫瑤草之變衰。恐蛾眉之遲暮。豈知孤臣弔影。客子迴腸。心隨波蕩。愁並斛量。數日惡生。感離情于太傅。二毛颯變。動歸興于中郎。織素非五丈之速。舒喙無三尺之長。願寫情而復獲。徒掩袂而浪浪。

感交賦

并序〔案〕賦係真宗天禧四年。祁在安陸時作。

夫浚井列泉。物之利也。甘至而先竭。芳膏煎蘭。用之美也。明極而自銷。信哉是言。吾見于太原王生矣。生名賀。字贊堯。其先太原人也。襟度冲粹。風規凝簡。左右就養。慕嬰戲以爲娛。卓犖觀書。恥章雕而習巧。學殖滋大。聲譽駛馳。由是四充賦于賓賢。一奏御于宸覽。引商之曲。始寡和而攸稱。躍冶之金。終不祥而見棄。而君曾靡屑慮。嘖無尤言。仁不中而反求。氣至剛而無害。怡處宮畝。坐進道腴。旣閑且馳。水曲之鑾有節。不怨勝已。嵇山之箭乃深。天禧元祀。予以父怙纏悲。窮閭削迹。企人室而孔邇。卜親鄰而有初。而君不我遐遺。惠然肯顧。切偲之義彌篤。簪盍之情在茲。乃至劘切藝文。推朋友契。分山霧之餘潤。襲皐蘭之一薰。恩斯勤斯。或推或輓。俾恣煩之有賴。非哲父而疇依。而君姿素質羸。少小多病。過鄭吟之三歲。甚漳臥之十旬。越明年春。食劑愆和。豎膏遘疾。重繭下冰而已甚。邪風造熱而迭攻。六氣之沴交臻。九折之醫靡效。革帶移眼。悵仙骨之悒悒。葆髮悲秋。惕餘陰之奄奄。一日。予往候其疾。生舉手而言曰。吾殆將死矣。胷臆結轡。氣血周僨。楚魂外散。蜀肺中焦。自茲恐不得復見。因泣下數行。夏四月。卒。年三十有七。行路興歎。朋遊隕泣。齋志沒地。馮生之恨何窮。積憂傷人。盛憲之年不永。直念古者。異世同悲。謹按君雅行素隆。華胄相繼。高節應世。暴秋陽而不渝。奧思際天。恥鞶帨而增飾。雅善談理。素樂名教。執雕虎之疏賤。未嘗動心。視龍斷之富貴。介然不屈。加以累世清白。四壁徒立。北堂垂喜懼之歲。東陂乏膏腴之產。而君夷險一致。欣然忘貧。范雲之室無姬姜。令伯之晚有兒息。逮夫議圍失利。綿病相乘。霞朝霧夕之沈歡。苑雪臺風。

之悵別。醒憂游委。彊壽弗延。况兮鬼伯之來催。偃然石室而長寢。美志弗遂。永懷李廣之數奇。遺文頗多。當類偉長之不朽。人之云謝。今也其亡。先是君娶范氏。末年生子。未百日而君沒。范既早寡。擁樹而歸。庚申歲。予南涉大江。戾止斯郡。訪君之孫。已三歲矣。天骨特異。童游不雜。諒夫善慶之所積。宜其孝謹之不衰。貌是若人。庶乎必復。墓木將拱。州來之歎曷勝。青簡尙新。秣陵之言永已。追爲此賦。式用寄懷。敢同劉峻之廣交。聊代山陽之感舊。收紙長想。屬思不文。其詞曰。

惟天地之肖貌。鍾象數之最靈。幹五行而宅秀。攬萬物以儲精。粵亨會之脗合。倬思皇而挺生。聯秀驥以服軛。筵儀鳳而舞庭。藹媚天之吉士。煥入穀之羣英。嗟若人之閒傑。何遭時之熙盛。襲淮水以啓胃。追汾陽而薄景。統三變之至道。凝四端之粹性。貌峩峩而突弁。衣襜襜而方領。馳妙譽于丘稷。掩多奇于汝穎。出乎類以拔萃。砥其言而礪行。軼士林以橫步。邈霄塗而高騁。直協華之啓旦。頒深詔而求治。嚮公車以千數。集橋門而萬計。莪菁菁而載育。薪翹翹而咸刈。萃呦呦而鹿食。場皎皎而駒至。彼君子之修業。奉哀舉而論藝。馳一封之漢車。冠百朋之周士。紛采采之雪裳。藹謔謔之帷被。家抱玉以相矜。言盈庭而可畏。獨夫子之卓爾。憤愚儒之翕訾。決辯濤以四出。軒意霞而中起。盤百鈞而不跪。投千牛而彌銳。羣心惕以解體。衆口吐而瞠視。將一鼓以作氣。以十手之所指。蹇登薦于王府。羣萬有而來泊。混如涇渭之合。雜若蝸螳之沸。或臘彈以勤請。或金膏而將意。惟夫子之介然。謂衆謀之非寔。含清唱而靡應。據中道而不倚。

惡登墻而棲處。恥畫墁而食志。苟爾功之可圖。非吾人之所履。企造天之華闕。爰奏技于嚴宸。皇不察予之中誠。汨旅退于下陳。無左右以爲助。雖隨和而孰珍。虎當關而逐逐。犬迎吠而狺狺。斂高足于要津。反初服于私門。宮一畝以卻掃。案三杯而食貧。雖埋照于流俗。愈抗情于曩真。庶桑榆之可收。奚嗜慾之足馴。咨余生之蕞爾。昧賢達之高致。屬鉅創以集蓼。委頽齡而歸里。聲不高于鄉品。志方謀于遯尾。何夫君之淵識。外當世之流議。續伐木之高矩。締忘言之密契。始告導于忠善。終博約于文禮。義蓋高而薄雲。言志美而成市。霜雪零而靡凋。風雨晦而不已。尋越盟于戴笠。乏牙絃于流水。我有實而子採。爾有規而吾佩。期左提以右挈。俾盡善而又美。優聖域以襁裳。賓帝門而結軌。愍人生之多故。撫物化之靡常。何夫子之稟質。鬱中乾而外彊。廣十旬而寢疾。偃四支而在牀。餌惡石以無徵。指餘陰而激揚。烏發識以入室。豎興妖而在盲。眷壽母之垂老。撫孤孩而增傷。心念後而惴惴。淚垂睫而浪浪。啓手足以自顧。何命促而意長。慨朝露之溘至。入脩夜之不暘。嗟天理之繹然。云禍盈而佑吉。監至高而在下。網雖疎而實密。何夫君之重道。遭六極而生疾。收華藻于中春。頓遐蹤于逐日。昔二人之同心。今一臂而相失。望森森之美楨。歎蕭蕭之遙阡。豈死者之可作。徒興歎于九原。脫亭臯之珍木。淡隴首之長烟。日西匿以風戾。鴈南翔而露圓。仰泰素之收神。哀拱木而斂魂。瀝酒綿之薄奠。撫墳草之陳根。舊館閱以無覩。遺書散而罕存。投空文以長想。盡萬代其何言。

送將歸賦

錢祕閣  
李還臺

湖長波之齋滂。面層巘之嶽崎。逗商飈之迅籟。土岬日之浮暉。問駕言其焉往。餞我友兮川湄。閱征夫之云邁。值彫年之行晏。花戢芬以去條。葉扶槁而違榦。氛噎噎其旣興。露漙漙而復泫。切寒蜩之暝唱。驚離鷗之晨嘯。塞祗役以偕歡。差感物而逢歎。于是行子輟艫。居人停轡。瑤軫徐泛。金罍參泊。判一笑于聯坐。結兩感于殊里。矧民生與代故。常回沈而交戾。譬持筵以偶楹。寧有望于如志。甫論咫尺以希秦。俄較尋而得否。老超境以逐壯。憂涉域而追喜。苟外物之迭攻。歸吾衰其焉避。執子祛以遷延。耿予襟之淹卹。越層澁以斜趨。薄深林而戰慄。虎號羣以擇肉。蛟流涎以尸室。美哲人之蒙險。方愛主而委質。視呂梁其安流。蹈太行猶通術。亟之帝兮樂肯。保玉體而逢吉。

歲云秋賦

予所悲兮胡獨悲。此凜秋時荏苒以就頽兮。年崢嶸而行休。邈西顧之突遼兮。噫長風之颼颼。視天根之焯焯兮。湛寒潭之漉漉。漉旣肅其早淒兮。霜又申以凝冷。號鳴蟲之夕韻兮。流腐燐之宵景。病晚馥于菊涯兮。委孤秀于蘭町。矧梧楸之脆根兮。與蒲柳之殘境。槭芸黃以一概兮。攬吾懷之耿耿。懷耿耿其可奈兮。駭山西之日薄。無翻車之趨壯兮。氣黯黯而逾索。憑八垠以舒眺兮。嗟萬彙之摧斥。意忽忽爲慘端兮。襟浪浪爲愁宅。苟流節之不停兮。我安得美好之如昨。丹去顏以旣易兮。縞尋領而胡亟。世無媒以求援。

兮言愈勤而理隔。憚信誓之未同兮。不察吾之中誠。歡期變以遷次兮。涕泣焉其流纓。離鴻翮其高飛兮。羈獸駭而長鳴。視河漢之傾幹兮。突浮雲而繁興。觸羣媚以自持兮。恐容華之坐零。雖坐零其胡卹兮。歲實爲之遲暮。秉直質以偶俗兮。如望朔而趨楚。挾蕙茝之神奇兮。固蒿菽之遘沮。竭來兮。守故居。姑徜徉而容與。

窮愁賦

粵余生之不造兮。獨遭命之險艱。竄衡閭而伏處兮。撫隆墀而永歎。哀靈根之早逝兮。駭危喘之將殘。收離散之餘魄兮。倏崢嶸之暮年。骨久病而支離兮。步數蹇而蹒跚。謝鼻掩而愈濁兮。蜀肺焦而益煩。紛種髮而弗理兮。蕞黃馘而鮮歡。據惠梧而夕暝兮。頡侯釜而朝飡。衣適館而旣敝兮。屢履霜而又穿。欲正冠而巾析兮。乍僂腰而帶寬。身繫匏而待食兮。心溺灰而未燃。陋有子淵之巷。餽無考父之饘。乞墦間而不足兮。病河上而相憐。魚躍躍以游釜兮。雀啾啾而在門。朋簪日以益衰兮。基強邈而罕存。候義馭以盆覆兮。俟江波而轍乾。出招悵以自失兮。入齋咨以含酸。乏載車之饋饌兮。罄使鬼之蚨錢。啓勞府以深悼兮。知茲路之良艱。被珍髡他計切以鬻戎兮。肅南轅而湊燕。揆苦八反膠柱以鳴瑟兮。逆上坂而走丸。安鑿柄于齟齬兮。屈杞柳于杯圈。株有兔而猶待兮。木無魚而必緣。掇宋苗以望歲兮。張越射而仰天。用干將而補履兮。采明珠而升山。求籛雲于絆驥兮。責重繭于紅蠶。顧物理之必殆兮。信余謀之所愆。胡捨屈而就直

兮。曷抱方而遜圓。譬秀木之必伐兮。若芳膏之自煎。道與藝而交喪兮。諒何往而弗捐。慨周道之至廣兮。抱寘懷而靡釋。追孤憤于韓子兮。嗣七哀于魏植。淪幽憂于莊篇兮。委牢愁于漢冊。笑一握而非樂兮。腸九回而皆極。甑既破而誰顧兮。井未繙而可惻。悞既往之遺謂兮。收方來之茂績。願荷戈而爲戍兮。抗戎索之遐封。值占雲之入貢兮。方鑄戟而務農。願殖貨而爲商兮。策鮮怒而流遁。嗟漢律之排賈音古兮。始抑末而返本。願揉耒以歸耕兮。輸春稅于民曹。吁四體之不勤兮。靡服昏而作勞。願執藝而爲工兮。備成器于元后。願百工之皆良兮。懼代斲而傷手。願退處于巖穴兮。與賓客而高謝。屬君子之正位兮。方小人之在野。願沉浮于閭里兮。揚聲詩而達志。遭天下之有道兮。故庶人之不議。攷所願之皆違兮。豈背時而爲累。稟有餘之潘拙兮。抱不足之臧智。委炎隆而弗附兮。甘沉冥而自已。羌倒行而良背兮。宜深屏而遠棄。據疾藜之困處兮。羞侏儒之飽死。入坎窞以掀淖兮。辱泥塗而攘臂。逢子山而生悲兮。值楊朱而投淚。憤懷玉以握瑜兮。嘉佩蘭而襲芷。懼衆狙之怒目兮。混羣駘而垂耳。豈李廣之數奇兮。將孟軻之迂事。發素蘊以周咨兮。俟見伸于知己。苟戶塞而不聞兮。信吾衰之久矣。亂曰。一瓢之空。吾未知其窮兮。萬錢之豐。吾不謂之通兮。濯我之纓。既遭時之清兮。整我之冠。以待人之彈兮。

傷賢賦并序

爲先友公孫子正作也。蓋子正官于太學八年。與予嘗僚者二歲。觀其爲人。事親孝。與士信。深中夷澹。毅



然持正。陽休德輝。見于顏間。難進而易其祿。急病而後于己。親之無令色。遠之無裏言。都中士大夫。走高門。趨下陳。無寒暑之避。與槐柳皆列者。蕩以成俗。而子正爲禮侯。官長初無造詣。居常著書。尤邃禮學。默而好深沉之思。神期數千載間。屬文而辭邇雅。臨帖而書臻妙。予嘗謂子正加于人一等矣。無鬼責。無人非。大易之懿文德。洪範之考終命。宜其享之。而祿不過上農。位不登二定。稟焉早世。命也奈何。矧無兒應門。有女未傅。斯亦生民之大窮者歟。予辱于締交。託在奔走。出均轡組。宴銜杯酒。信誓旦旦。要之白首。今又弱一箇焉。死生交情。俯仰陳迹。向之歡緒。今成悲端。嗚呼。天非裨竈之知。輔仁罔驗。命爲鬼伯之促。齋恨何窮。追爲助紼之詞。以代焚芝之感。

天生若人。好是懿德。左佩規而右矩。前陳繩而後墨。鑒玉水以論方。殫翠毛而取飾。席至珍之百沃。咀永味乎千蹠。蒔固蒂于文林。韃洪樞于聖域。澡重氛之耳目。棲灑氣乎胷臆。邁帝華之顯時。與多士而來思。掩輝山以待價。頓宏羅而見羈。士惟君養。爵乃吾糜。斂以越砥。御以新羈。入胄筵而鳴鼓。退私室而垂帷。或東觀以讎籍。或平臺而見師。或連蜷第賦。或競病論詩。包左氏之富豔。無枚臯之詆欺。有冽匪泉。有直伊矢。蹇不撓于亮節。遂無言于臚仕。不諂笑以在畦。不處嫌而納履。年四十而介然。食九人而近止。彼君子之知命。方無愠而無喜。誤葉縣之好龍。歎山梁之拱雉。天難諶斯。皇肯照微。如何不淑。邦哲其萎。竭靈濤于鷺壑。傾怒翼于鵬池。況復顏徒非壽。伯道無兒。未嫁兮左思之女。獨拜兮任咸之妻。使積善之無報。

信至神之我欺。悽悽草長。寥寥露晞。熏蒿掩乎野土。神明濟乎天陲。對秣陵之舊簡。乏南楚之招辭。慟寢門而投賦。彼厚窆兮何知。

憫獨賦

憫前人之抗志兮。雖有適而遂迷。恃我醒于皆醉兮。矜獨是于衆非。吾固知喬木不得林兮。孤音鮮與之諧。特立廢于曹踞兮。一妍掩于萬媿。舉吾黨以同寐兮。挈予覺其何之。越家祝而訶冕兮。裸戶裋而晒衣。奮單辭以正議兮。安足救輿談之參差。發介瞭之精覽兮。何預羣蒙之佞嬉。屈自高以赴淵兮。夷已信而餓微。波潰流而無益兮。反蒙歡而被訾。今吾有道于此兮。請質古而瑩疑。狂者以不狂爲狂兮。飲泉流而後宜。非聖者以聖爲非兮。均獵較而免譏。挫爾方面而殺廉兮。常偶欣而儷悲。保獨行以中晦兮。庶明哲而爲期。

詆仙賦

并序〔案〕祁出知壽州。在慶歷元年。

予旣守壽春。覽郡圖得八公山。故老爭言山上有車轍馬跡。是淮南王上賓之遺。耕者往往得金。云丹砂所化。可以療病。因取班固書葛洪神仙二傳合而質之。嗟乎。人之好奇而不責實也。尙矣。而洪又非愚無知者。猶憑浮證僞。況鄙人委巷語耶。作詆仙賦。

憫茲俗之鮮知兮。徇悠悠之妄陳。常牽奇以合怪兮。欲矜己以自神。操百世之實亡兮。唱千齡之僞存。彼

淮南之有子兮。固殊死而殞身。緣內篇之不誕兮。眩南公之多聞。謂八人者語王兮。歷倒影而上賓。餌玉  
匕之神藥。託此軀乎霄晨。王負驕以弗虔兮。又見譎于列真。雖長年之彌億兮。屏帑偃而愈愆。葛傳云。仙  
伯主者。劉  
安不恭。乃謫守郡  
都。後爲散仙。塞斯事之吾欺兮。聊反復乎遺言。號聖仙之靈稟兮。宜常監德而輔仁。不足察王之倨  
貴兮。遽引內于天門。已乃悟其非是兮。胡爲賞罰之紛紜。寧仙者之回惑兮。無以異乎常人。國爲墟而嗣  
絕兮。載遺惡而不泯。故里盛傳其遺金兮。證隄石之餘痕。武安隱語而前死兮。更生僞鑄以贖論。彼逞詐  
以罔時兮。宜自警于斯文。

石楠樹賦

并序〔案〕本傳。祁于天聖二年釋褐。爲復州軍事推官。賦當屬此時作。

予嘗被臺檄北走襄漢。襄漢間家樹石楠爲園池之玩。樹率高不過二三丈。柯葉婆娑。如帷蓋然。惜其上  
國之遠。不能移植。竊用賦之。以竢知己者。

彼美嘉木。生乎漢濱。鑠純粹于天極。稟蕃殖于媪神。十雨流液。重雲輸津。結深根乎奧壤。奮秀體于熙春。  
爾其阿那扶疎。峇亭葱翠。枝相交。葉相植。不扶自直。拔乎其萃。翠帽森覆。仙幢凝峙。秀金枝之未燃。障青  
綾而半倚。長煙夜淒。零露晨委。激雄風而裊莖。沸蒙泉而漱趾。荷亭育之大德。全婆婆之生意。乃有仲長  
廣宅。庾信小園。共忘樊柳。咸嗤樹萱。悅吾材之特異。掩羣卉以收妍。乃培乃植。載育載蕃。高臨反宇。近映  
開軒。均長松之受命。等穠李之無言。默默幄密。童童蓋圓。非同江北之枳化。不愧東家之樹完。至如合璧

早紅上弦晚白送密影于瑣牕薦翠霏于瑤席帶寒螿之嘶鳴映翠禽之格磔王孫感芳草之思中婦休流黃之織拾藥未暇攀條更惜如爲兩樹認若箇于韓憑脫致一枝當贈行于越國故其爲世愛玩受天和煦條枚黛滋跗萼星布不戕杯棬不夭斤斧嬌庶子之春華同韓宣之嘉樹不生于窮谷畏七年而未知不長于少原嗟錯薪之亂楚幸得謚于芳林獲庇根于中土嗟上國之絕遠憫孤生之薄祐六枳維乎萬國三槐配于上公御史著中臺之柏大夫紀東岳之松顧弱質之雖陋冀賞心之一逢託陵阿之善養丐根柢之先容苟君子兮太顧將老棄于山中

酈潭秋菊賦

采采佳菊生潭之湄託厚土之善養亦纖植之所宜乏彊幹之爲衛保深根以自持苒苒蕃葉纖纖縹枝歷青春以戢景觸素秋而揚蕤觀其密蘤攢敷圓房四附英披夕風蒂裊朝霞揮碎金以炫條揉寶釘而綴縷燦兮萃林苑之螢焰煒兮舒夜池之鵠羽沿緣煙泖散蔓霜渚抱酷郁之幽香撫變衰之平楚竊同蘭草無人而自芳幸比豕苓得詩而爲主于是愈跗之徒居多暇日心玩其華手擷其實紬太清之祕方咨鄙川之茂質乃可以輕身益氣可以延期蠲疾雖甘苦之種有二精盈之名不一而胡公餌焉享曼壽之永鍾繇奉焉助養生之術淵明垂賞于佳色之辰長房見佩于登高之日誠仙真之所玩匪吾人之輕悉也若乃宗臣名世駿嶽儲休君託股肱之體天與忠孝之侯惟載育之在旦藹祝延以相求矧靈卉之

可嘉助永年而是逾。匪薏車之興謗。越萱背而忘憂。幸春期之可續。庶藥圃其長遊。

零雨被秋草賦

送刁釋從  
事宰青城

撫萬化之擎斂兮。憑八極而延伫。既悲秋之變衰兮。復迨天之陰雨。溯間關之長道。攬沆漭之平楚。于時際海籠日。窮天寫霧。雲引暝以夕屯。風含悽而曉赴。乍滅岫以亡巒。或蔽林而失樹。陂漫漫以蒙紫。川汪汪而蕩素。然後散漫虛落。空濛阡陌。慘江籬之馥銷。泫疎麻之寒滴。紛灌莽以蔽虧。邈亭臯而紆直。荆榛塞望。蘭茝無色。水寂寥以收潦。壤塗泥而反宅。空百感之外至。注一情而中惻。爾乃客子被酒。投袂四顧。畏簡書之期會。問征夫以前路。雙鳧之舄兮。有容一鹿之車兮。在御結斗城之深戀。捐鈎梯以徑度。周道倭遲。我心西悲。種層陰以慘切。惜此會之騷離。踐霰霖之有蕩。憫柯葉之相違。難莫難于遠道。樂莫樂于新知。寧念東山有歎婦之句。淮南有王孫之詞。

憐竹賦

并序〔案〕宋史庠罷參政。出守揚州。邠亦出守青州。在慶歷元年五月。

始伯氏貳宰司。儼甘泉坊韓王舊第居之。庭階閒敞。予因種竹以爲玩。明年伯氏典維揚。予守壽春。憐竹方茂而諉之。後人其能嗣予好以封殖者耶。作憐竹賦。

惟茲竹之冉冉。自林町而叢產。偶拙者之移蒔。丁故王之閒館。塢陰灌以披豁。野色悴而紛換。辭墟落之曠處。佐堂除之近玩。既根危以殖淺。又氛冒而埃漫。迫俗物之挈喧。屈天標之蕭散。余乃謹其培封。申以

闌護。惡草夷蕪。寒泉浸注。晝熙熙以暴陽。夕團團而沐露。舒萌庇本。弭寒閱暑。斂衰態以就悅。擢新姿以違故。于是蕭疎檀欒。敷芳森萃。謝叢箬之餘素。懽圓筭之脩翠。葉舒碧以向榮。澤浮紺而呈美。朏月上而景還。宇風來而籟至。常虛心以自得。顧直質而少媚。雖蒙幸于軒檻。本無爭于華礪。嘉逸民之有言。非一日之可無。予野情而偏愛。託此君以自娛。顧泛梗之屢徙。方去爾而索居。感嬋娟之甫盛。將披剪而爲虞。昔召公之至仁。舍小棠而攸茂。公已去而民愛。念蔽芾之勿伐。余恤躬以僅免。匪餘庇之能列。徒結尙而敦好。恍後人之我替。音鐵矧客土之疎瘠。且狡童之撞秘。幸不夭于此生。保歲晏之高節。

感蚬螿賦并序

蚬螿、寒蟬也。孟秋乃鳴。其聲繁亮。怨切。鳴中之尤悲者。凡物無意于感人。而人有情于感物。況僕長年少。悼所念非一。壯與運頽衰。將歲還。撫時對物。自然怗悵。遂爲之賦。

愴秋旻之序寥。眇羣物而流玩。伊勝鳴之始來。驚萬化之方晏。倏含唱而叢咽。俄曳音以凝曼。本無意于感時。奚有牽于累歎。諒細蟲之何知。託生意乎鴻造。披素殼于壤旻。齋紺質于林杪。內虛心以抱潔。外華綏以自表。跼纖足以徐進。整薄翼而輕矯。引長喝于霞昏。逗餘嘶于月曉。和別葉之翻翻。雜離禽之叫叫。彼張女之哀彈。與籠首之橫管。恃破弦之往悲。矜加孔之新囀。雖投節以感慨。猶假手以交譖。顧寒蛸之清嘒。非取矜于外銜。其發無端。其終無羨。寫清腸以赴訴。有自然之悽怨。號涼颺于天垂。嘯委露于雲半。

矧吾人之云衰。撫光景之逾駛。聆蕭瑟之實繁。悵搖落之方暨。掩歡緒以佃欣。紬悲端以觸歎。況日月其不待。何功名之能冀。一傾耳于此時。胡自聊于晏歲。

傲驢賦并序

予見京都俚人多傲驢。自給驢之爲物。體么而足駛。雖窮閭隘路。無不容焉。當其捷徑疾驅。雖堅車良馬。或不能逮。斯亦物之一能。顧致遠必敗耳。聊爲賦云。

伊驢之爲畜兮。本野人之所服。乏魁然之遠志。常踉卑以蹈局。卑靡斬于層房。秣不煩乎豐粟。匪任重以取材。姑邀時而競逐。其資易給。其習易宜。韉小取適。纓華弗施。被傲者之希直。投人乏以獻奇。候其剉飲之節。劫以鞭箠之威。捨大道之平蕩。抵邪徑之窮巖。紛如鳥散。駛若風馳。顧叢軀之云陋。謂高足之莫追。歷委巷而矜伎。負宵人以奮姿。苟跬步之速至。趣要津以爲期。昧繇力之將竭。不數年而後衰。睨華驥與大車。皆鏘鑿而肅軫。挾善馭以爲範。按中達而徐進。伊良士之攬轡。實志遐而遺近。彼汲汲于所求。謂不悟而效敏。忘百里之必蹶。尙長鳴以取雋。昔漢靈之作駕。貽史氏之深譏。由稟生之么麼。非驂勒之常儀。況夫錐刀課得。晷刻爭機。諒隘途之坎窞。方見閱于顛隳。





景文集卷三

賦

豐宜日中賦豐尙光大  
宜照天下

豐大也。貴夫擊蒙。日實也。盛乎居中。攷卦體之至象。配陽精于上穹。二體迭昌。麗午躔而光大。六爻俱盛。協瑞景以昭融。聖人所以仰之。如日受之以豐者也。昔之作易也。妙探神幾。冥符心匠。離明乎下。震動而上。大道既備。微生斯暢。由是因豐體之甚盛。與日華之相尙。必稱其大。取羣彙之勿憂。必貴其中。欲萬靈之咸向。脗合精義。燦爲烈光。彼貫八象。此臨萬方。引繫表之幽奧。對天心之焜煌。動且有明。候允符于爲市。亨而可格。位必契于當王。且夫時得其隆。理據于會。景鑠不震。隱微何賴。是必取厥運行。比夫光大。故初九未至。獲有尙之譽。六五既正。受來章之泰。見斗見沫。二與三而迭凶。其蔀其家。四及上而交害。則知豐自不盛。道乃致危。日之不正。照或有遺。故我包三極以備體。媿萬景而不欹。居幽者各安其所。晞光者罔失其宜。觀象惟明。式在無偏之際。玩占弗隱。雅當必燹之時。是則豐協于日者。見廣被之勤。日對于豐者。有宣精之妙。昭然物理。煥焉典要。我功甚大。不求餞谷之名。我化既敷。不取嵎夷之照。用能義周萬物。明暨八埏。辭存乎卦象。昭乎天。究神道以臨下。燄洪暉而在前。用以致刑。法平分于瑞采。推而尙大。符表

正于高躋。王者所以不建謀猷。慎守宗社。觀豐則澤寢于無外。宜日則明被于羣下。因一卦之義焉。見聖人之道也。

宥過無大賦民罪之誤無大宜宥

過無故作。宥必有因。非緩獄于中典。蓋原情于庶民。事異刻深。宜屈一成之法。理當註誤。率從三赦之仁。於穆聖皇。撫寧四海。慎上世之明罰。清下民之多罪。刑小必重。以其惡而怙終。宥大必輕。以其善而能改。明德攸尚。深仁念茲。義或出于彼失。情非因于我欺。雖深文之具止。在降等以行之。慮有司之誤傳。申恩必速。顧智者之一失。屈法何疑。且夫法以防姦。過非有素。儻議事之一貫。則淫刑之可懼。在夫審克無爽。哀矜合度。賜縑或失。可明郎吏之非。書馬不全。足驗侍臣之誤。則知刑惟一體。事有萬殊。蓋情之無狀者。非民之失。文之徒備者。乃法之辜。所宜慮萬方之有罪。察一夫之嚮隅。宥誠我出。過亦誰無。比宣父之知仁。必于其黨。同漢文之贖罪。豈忍加誅。噫。欲正莫若去邪。欲利莫先除害。賴姦隱匿者。雖小吾不見其輕。失辭無簡者。雖繁吾不見其大。誠昭察于政條。乃兼該于理會。脅從罔治。但計惡于刑中。非意相干。悉恕情于度外。故得有宥在治。不愠不知。非厚誣而專意。成善貸以從宜。事偶出于忘遺。法誠可降。義稍干于深固。罰亦無私。異哉。獄貴簡孚。君惟精究。情不踰矩。政思從舊。致斯民之不偷。自哲王而獲宥。

百獸率舞賦和樂之極生類馴感

物有異類。天含至和。嘉率獸之屢舞。見大韶之可歌。緩之斯來。化雄心于攫搏。偪而不懼。蹈餘韻以婆娑。稽古有虞。命夔典樂。奮德輝之溥大。鼓頌聲以優渥。蠢爾羣動。居然後覺。爾乃拊樂石之鎗鎗。感毛羣之濯濯。德音是蹈。非狼子之野心。應節孔馴。異羝羊之羸角。始其笙鏞序矣。金石陳之律動。風應音生氣隨。蟠乎天地之大。滿乎坑谷之卑。將萬物之共逐。矧衆類之無知。宜乎擾我之原囿。樂我之壘篴。騶仁麟厚之儔。或羣或友。虎躍熊經之態。乍合乍離。樂瞽協恭。獸臣動色。謂夫氣同者易以化達。類異者難乎情得。何微畜以來擾。實聖功之偕極。連軒厲至。孰謂不知其音。騰躍龍驤。何煩請對以臆。則知樂之至也。不在乎鏗鏘迭作。在乎和鳴。獸之來也。不以其羈縻終叅。在乎厚生。我將陳盛德于八變。彼乃弭雄姿于九成。深爪作鱗。似趨鳴簫之曲。跋胡窺尾。如投拊石之聲。嚮若五絃之曲。未諧兩階之干。非借專撞鐘伐鼓之侈。務張瑟鳴球之器。流乎逸樂。昧諸性類。則毅然豨勇。或走險以深潛。矍爾鹿超。雖頓纓而莫致。聖人是。以去樂之僞。存樂之真。音諧于德。聲託于仁。故能化鬻鬻于不狘。應蹈厲而來馴。性不我違。等淵魚之並躍。和非外感。參儀鳳以同振。不如是。則安得標甚盛于典墳。貫太和于舒慘。齊首瞪目之胥泊。詭狀殊形之同感。儒有賦古之諷。今願升聞于帝覽。

好賢如緇衣賦

心好賢者  
同彼詩詠

賢之可慕。好莫如深。仰宣聖之垂教。譬緇衣而用心。嚮義無窮。極高山之至願。懷仁不已。均適館之餘音。

前典與稽。後人是蹈。伊吉士之咸在。懣我心之匪傲。將使動必立誠。久無易操。謂疾惡之甚。莫如巷伯之斷章。謂樂善之勤。孰首鄭風之篤好。可立非志。可親匪賢。在敷求而顛若。協詠歎以翹然。嘉迪吉之時。又冀龍光之日。宣獎以實行。同敝又改爲之語。樂其縻爵。等還予授粲之篇。況夫百度交修。器非可假。九德並事。任之或寡。必在推愛心以無倦。倣長言而則寫。藹藹胥洎。美髦士之生焉。善善所欣。繼國人之宜者。異夫征吉之文。存乎彙。相求之氣。本于同。因君子之樂善。媿詩人之念功。至誠前定。丕績有融。側席諮謀。美若上卿之服。虛心與進。愛同一國之風。彼羔裘素絲。訂儉德之美。干旄良馬。諭樂告之旨。未若推善職之流詠。爲類能之至理。我實念此。賢將在彼。烝髦甚謹。顧改造以相諧。惠迪彌勤。與申章而酷似。故王者因其教典。列以民彝。縻之我爵。舉乎爾知。樂周國之多士。法武公之采詩。旌迺善人。玆斯謀之允濟。俟夫來哲。賦之席以攸宜。則有運遘右文。時丁作聖。育士類于至教。本言章于遺詠。願一附于芻蕘。爲之歌鄭。

志在春秋賦

宣父之志  
因史成法

志假文表。事由教宣。攷彼信書之作。明乎素王之權。自顯惟微。舉二中而明歲。因初正未。包五始以承天。當其道闕東周。化興尼父。時不吾用。仁非爾輔。由是約史法于當世。尊禮經于下古。素蘊內發。遺章遠取。立誠不昧。方祖述于唐虞。覃恩無邪。遂憲章于文武。志者孰爲。聖人之所之。欲成功于撥亂。非務麗于屬辭。筆靡藏弄。神無越思。隻字論褒。與山龍而並貴。一言示貶。將斧鉞以同施。莫不昭列異同。謹敷名器。賢

雖小不能遜其善。惡雖大無所容其僞。動不遺策。舉皆善類。親則諱而賢則諱。互寫精衷。聞異辭而見異辭。迥分深意。得非聖人之道也。達加乎民。聖人之志也。窮止乎身。故我憫王政之弗著。抗策書而有論文。豈虛設。教將有因。桓靡書王。所以謹明乎罰。豹惟稱盜。所以彰判乎人。是則吾志所存。存乎三代之美。吾志所極。極乎萬物之理。然建乃至道。卽乎舊史。赴告以之不失。盟會爲之成紀。以宣盛德大業。以懼亂臣。賊子。稱族舍族。見尊卑之不踰。傳信傳疑。示質文之有體。故得郊麟表應。斗玉告成。具四時而言備。大一統而化行。外略內詳。游夏之辭莫措。微顯志晦。隱桓之日咸明。異哉。肇述宏猷。敷施大業。旣黜周而拒亂。終授劉而抗法。宜乎繼志之文。貫百王而不乏。

上春釁龜賦

春序之月  
先釁靈物

政有圖始。天方發春。薦幽血以升器。釁大龜而用神。割以全牲。表惟新而嗣歲。授于太史。將致用以前民。丕訓孔昭。攸司慎舉。周官則具載厥職。呂令則叶言其序。月有履端爲重。我乃詔乎官占。物有不襲爲靈。我用藏于君所。始也。斗建寅次。正符夏時。事藏其舊。謀詢乃疑。發居蔡以顯若。取刳益而奉之。煥若塗丹。布十朋顛具體。滂焉流赭。浹三兆之靈姿。然後舉滕籥以見珍。總繹靈而罔越。死且不朽。神無恐歇。貴以天之神物。謹以王之正月。苟玩占于象數。式俾從長。旣取重于宗祧。何傷祀骨。及夫占人獻兆。葦氏告虔。視高惟謹。食墨罔愆。告我猷而弗厭。蔽朕志而爲先。寧不由乞靈肇祀。謹始開年。牢禮初升。旣措廟堂之

上邦儀云展。遂居庭實之前。彼宮室用成。鼓鐘將震。咸重其事。必先其釁。未若我外列邦貴。中參寶鎮。春者益其生矣。冠四序以更端。釁者殺而神之。竦羣心而取信。故王者習祥不爽。納錫有經。登茲備物。赫我至靈。辰有主于勾芒。舊章惟謹。告不欺于僂句。穆卜攸寧。士有洽見典彝。博知名物。惟布和之在候。俾乞靈而罔咈。儻欲紬天下之幾微。冀鄭詹之一拂。

法施于民則祀賦

功被民譽  
長享常祀

法本垂教。祀惟報功。仰茂績之顯著。標祭典以欽崇。大德既昭。勒廟彝而不朽。遺風可攷。歆飲食以無窮。稽古哲王。詳明深志。念先憲之不冒。思隆名而廣被。由是尊以法教。陳于祀事。經邦體國。昔用之而有常。邀福乞靈。今奉之而不墜。蓋以德冠後世。功施兆民。風聲遂以遐布。禱祀從而不紊。據洪閔于當來。死宜廟食。答大功于既往。凜若生人。莫不彰叙。洪猷協宜。來譽此垂法也。物賴其賜。彼崇祀也。民將有助。業成久大。禮亦蕃庶。棄爲稷而龍爲社。薦幣乃興。湯以寬而周以文。奉辭交著。法之備者名大。祀之豐者日長。奉我一德。安爾萬方。昔也禮樂政教之道備。今也玉帛犧牲之品詳。所以軒祖至誠。民百年而肯畏。重華盛德。世千祀以彌昌。且夫法之不施。雖威而曷仰。祀之不永。雖恭而孰享。必在著厥話言。炳夫圖像。立功立德。固咸秩于禮經。先聖先賢。率來思于大饗。異夫法昭憲度。祀載典常。蓋名垂于身後。非政息于人亡。比夫臯陶世衰。潛起忽諸之嘆。若敖寡德。遽形餒而之傷。是則惕厲永圖。景鑠洪美。奮名實于簡策。流馨

香于簠簋。諒非此族之名。不在常祀。

三王不相襲禮賦

功與時異無襲於禮

王既殊號。禮非一同。念典章而革故。因損益以殊風。天地人而異正。繼昭大統。忠質文而參尚。各定元功。至訓攸聞。前經可叙。蓋以教逐民變。禮沿世舉。矧三代之攸聞。匪一隅之所與。前聖後聖。采章由是而惟新。彼時此時。名器從茲而異處。是曰救弊。非專改爲。昔異今教。今非昔時。爾乃車輅更象。旂常異儀。萬邦爲之承式。百世由茲可知。驪翰駢牲。迭舉常尊之制。子丑寅朔。平推相勝之辭。蓋由夫夏之道不可行。商之時。商之風不可易。周之治。周安商教。則僞而蕩。商從夏俗。則愚而肆。必在深察國體。一新民志。歸乎治而則同。抗其同而乃異。闡朝陽之制。祭不一其儀。立坐酬而享尸。各祇乃事。豈不以政必有敝。起敝者賴乎聖謨。道必有失。正失者歸于永圖。此盛王所以斟酌。大禮于焉散殊。俾至治之我有。欲爭心之汝無。時輅冕則異制。立勳作之者聖。松栢栗乃因宜。建社無得而踰。若然。則揖讓干戈。各歸乎允執。聲明文物。安得而相襲。視前跡以交勝。表大勳之旣集。亦由日移月運。各異象而明生。暑往寒來。不同時而歲立。用能鴻名交至。美化迭居。湯纂禹緒。周變商餘。百王仰止。萬物依於。鯨冥稷之恢祖功。並隆。愆祀。夏漢武之昭樂綴。參美前書。誠哉。改作嗣興。鼎新光啓。儻膠柱于舊典。曷轉圓于治體。三王之作也。豈徒然哉。君子謂之知禮。

鷲鳥不雙賦雄鷲之極無有比倫

鳩彼鷲鳥。羽族之雄。挺異稟而邈焉自處。俯衆禽而莫與爭功。厲擊之羣。豈顧連雞之桀。翔翽獨任。寧虞六鷁之風。稽乃物情。驗諸前志。蓋內稟于介特。實中存于猛鷲。所以擅美惟一。爭先寡二。殊姿鶚立。詎知乎入不亂行。迅體鷹揚。但見夫出乎其類。志自我適。衆徒爾爲。顧絕倫而示乃。非命匹以求之。食鮮罕儔。鄙燕燕于飛之際。翰奇寡和。異嚶嚶求友之時。質謝羣居。心存霄極。將專累百之美。以保獨清之德。靜惟介立。靡從舒鴈之行。動必雄飛。安俟比鷁之翼。少之爲貴。疇敢以踰。排天宇以上出。冠雲羅而德孤。蔑飛鵝而在下。視持鷁以如無。介處可徵。方擅威于夏習。羣翔莫得。遂專制于霜誅。不如是。則何以厲逸翮而遠圖。據嘉名而奄有。下鞫而視不留眄。厲吻而擊無遺走。雄姿絕俗。殊雉雉之應媒。隻影戾天。誚舞鸞之索偶。嗟乎。氣皆從類。物必有倫。何茲禽之特異。由至性以難馴。雖同乎必慎其獨。當恥乎比之匪人。臨敵有餘。豈鳧趨之可逮。干霄直上。諒鳥合以無因。別有繞樹可依。搶榆而止。雖攷類以各異。顧呈材而易比。未若我出叢萃而超等夷。一舉千里。

王畿千里賦

畿制千里尊大王国

王有一統。人無異歸。中四方而正位。畫千里以爲畿。總大衆之奠居。式昭民極。據方來而處要。以重皇威。二代而還。維周有制。肇庶績以圖大。廓多方而爲衛。作我上國。垂諸永世。以爲地非中夏。無以示天子之



常尊土不一圻。無以待諸侯之入計。爾乃測圭于地。攷極于天。風雨之所交者。道里之必均焉。郊野錯而回合。鄉遂亘而蟬聯。溝封斯萬。疆場且千。差籍九畿。定夫家于都鄙。出車萬乘。括賦入于原田。是謂辨方。且非期侈。廓焉天府之國。巍乎王者之里。爵祿命賜之供億。朝覲會同之底止。不偏陋以取侮。不誇矜而役美。侔江海之重潤。乃據上游。法日月之徑圍。用張天紀。且其蠻夷面內。玉帛駿奔。內則百官承式。外則四國于蕃。化之遠者。禮益廣。居之衆者。務愈繁。必在制廣輪于有截。示極摯于羣元。倍十子男。大有由而御小。任包旬稍。卑不得以侔尊。亦猶天之高。燾物而無外。地之厚。廣生而咸賴。使高而可度。則寥廓何仰。厚而易知。則沈潛有害。是用控天下以咸。又極宸居而稱大。詩美四方之是則。理乃同歸。史稱後世之無加事。誠胥會。美夫周原。膺膺。禹畫芒芒。或處瘠爲教。或建瓴是防。然皆按成事于神甸。跡前謀于令王。所以漢相論都。首識金城之廣。召公相宅。前知墨食之祥。洪惟我朝。奄有方國。託洪基于天地。亘長藩于道德。所以申畫邦畿。是用守之無極。

龍杓賦

彝器爲象  
名有龍者

昔夏后氏之祭也。制龍杓而用之。爰有形于神物。俾致用于宗彝。存身醜罍之中。初蟠縟禮。驥首陶匏之內。遂奮鴻儀。懿夫義著禮經。功參祀事。蓋恭神而祈福。乃觀象而制器。謂龍也冠四靈之首。謂杓也統六樽之義。奮鱗昇几。旣三獻而有容。弭首負樽。俾萬靈之具醉。蓋由象著。且異文爲。登祏室以獻狀。湛醕醪。

而挺姿。始訝躍淵。灑汗樽而俯映。乍同銜燭。焰明火以前施。其用足徵。其儀不爽。炳九采以入用。先六瑚而列象。寧虞探頷。儼祝史以獻酬。自契攀麟。對孝孫之俯仰。則知龍者所以作繪。杓者于焉寓名。匪徵奇于假象。蓋絜意于精誠。雄視爲鹽之虎。俯連酌兕之觥。暗想召雲。蒙鬱香而宣氣。潛疑窺牖。歷清廟以持盈。外實而有文。中虛而思受。蜿蜒于鼎俎之外。天矯于豆籩之首。雞彝莫得以同列。獸樽視之而何有時。乘斯驗。固當神享之初。勿用可知。蓋在禮成之後。且夫超騰祭典。攄變禮容。將挹旣清之酒。用圖莫智之龍。垂名不俟于紀官。司存盡在。屢進何憂于過亢。酌獻彌恭。夫如是。則昭事上神。外迎純嘏。取鱗長以爲飾。配雲壘而在下。是故觀其龍也。則而象之。用其杓焉。禮無違者。

琬圭賦

王賜之節  
修德崇好

彼玉之貴。待人而彰。嘉琬圭之作瑞。旌列辟以勤王。使介奉承。殺鋒芒而見美。縑文升薦。挺溫潤以含章。古者利厥建侯。寵其受賜。琢茲纘栗之質。獎彼蕃宣之懿。事備著于周官。職兼存于漢紀。秉爲瑞節。爰發采于帝庭。奉作龍光。自凝華于國器。始也效珍美璞。獻狀攸司。圓首露粹。方形究奇。信爲寶之尤者。非假人而用之。申錫以庸。居有握瑜之美。保持在德。絕無磨玷之疑。及夫臣告成功。君嘉茂烈。則是圭也。出國之府。旌邦之傑。外碌碌以云堅。內溫溫而表潔。其致也。行人達命。邁刻虎以爲符。其聘也。大夫以時。越鑄龍而用節。噫。治德本乎無怠。講好在乎勤修。爾功之昭。則贈圭之重。彼績不建。則貽玉之羞。是以上無虛

授下靡妄求。初疑前詘之葵。光昭臣範。終比不趨之玉。茂對王休。是知嘉乃愛民。觀其述職。保邦則據以爲重。命事則陳而有翼。什襲之緹。是奉何患。越鄉五等之爵。不踰蓋將比德。和難者安能均美。判規者未必同功。曷若我徽章所被。禮典是崇。蘊虹采以自照。賁天光而有融。受事于朝。式並舜頒之瑞。永孚于下。本非周剪之桐。美哉。元后嚮明。多方匪傲。不愛寶以酬德。惟協邦而結好。爾公爾侯。宜念吾王之厚報。

〔案〕此賦係明道元年召試舉士院所作。祗即直史館見東原錄。

水涸成梁賦 先事成績人則無患

水涸于澤。梁成在川。欲濟民而有要。務底績以爲先。仰視天根。爰謹度材之始。坦成周道。居當病涉之前。伊昔哲王。深圖能事。謂土工不可不集。故用于有節。地險不得不達。故成于豫備。國守舊章。人資長利。歲云暮矣。弗踰收潦之辰。工則度之。潛識造舟之地。徒觀夫三農云隙。百穀旣成。天寥寥而雨畢。波渺渺而川平。由是鳩工無慮。爲力有程。一之二之日。徒杠旣飭。三之四之日。輿梁悉營。架濬壑以航聯。遂知攸濟。截重淵而虹度。蔑有留行。何則。措事以時。有動而無斃。均利于下。未勞而成績。我乃攷時令之閒月。舉津塗之力役。欲俾從橋乃安之士。惠爾肯來。遇深則厲之徒。昭然有適。況夫關防者何國。蔑有啓閉者與時。而新。又焉得怠。經始于餘力。壅方來于後人。使馬腕來足。車停去輪。是以芻道未除。單襄有以垂其戒。乘輿而濟。子產不得稱其仁。噫。惟上所以教民。惟官所以垂則。此不善用。彼焉保力。是用乘戒寒之調節。煥

濟川之丕式。寧比夫營澆詭計。矜懼服于隨人。獨權取財。務誅求于漢國。夫然。則候人在境。司空視塗。著以成法。又夫永圖道路之行。既遠。風波之患。終無。作者匪勞。濟畢九州之險。事方有備。何存一日之虞。美夫時倣交修。茂功無間。據嗣歲以獻狀。俾臨深而除患。敢告有司。宜先時而物辨。

# 景文集卷四

賦

日在北陸而藏冰賦

寒盛之月  
藏著冰室

古者上求辰次下立正端視北陸以爲候納層冰而命官枵次可瞻既乘陰于窮谷輿人畢入方用牡于司寒茲乃順天之經降邦之命使陰不得閉而成眚陽不得越而爲病是用測日所在居冰方盛一之日氣方烈烈乃俟顛頊之躔二之日鑿焉冲冲遂舉凌人之政觀夫順攷舊典申嚴有司彼日之道在虛之維有史氏以戾止有虞人而致之乃曰藏乎以道今也其時愛景方融霜有至堅之象隆冬聿暮狐無可聽之疑然後積水並營窮山異伐丘聚鄉縣玉堆城闕投治鑑以彩凝射清壺而光發動而合禮當呂紀之小寒居不踰時本邠詩之七月嚮若官失其業君怠于常歲日旣易川池弗藏時則有淒風苦雨時則有厲雹災霜人誰禦之物薦臻于疵癘咎常燠若天取譎于陰陽我是以利不素愆事因微著步暑歷以潛測厲嚴凝而豫慮六龍回薄仰觀象以告期九澤腹堅悉送官而待御噫恭授惟日畢賦者冰二端以協百度其凝用能俟朝覲而惟謹逮火出以同升獻羔羊而始開廟祧云薦祓桃弧而後賜祿位其承宜乎左氏直書中豐善述示後代之成憲著先王之要術日之至今冰之藏敢告凌陰之室

去邪勿疑賦

明后之政  
除惡無惑

邪惟害政。令貴必行。嘉討惡之無惑。示爲君之至明。暨讒說以並除。志無留斷。放儉人之甚速。奸不容生。事表前經。功歸哲后。將欲杜乃多僻。用以垂于永久。謂拒衷說者。本乎義勝。瑩疑心者。絕乎膚受。果于除慝。戚施之計何從。利在繩愆。猶豫之心奚有。朕志先定。爾無我欺。竄庸違而一盡。蕩惶惑以無遺。非由不早辨也。但見削而投之。銳撥亂之聖功。寧煩顧慮。決擒兇之治典。豈俟沈思。蓋由邪不可與守邦。疑不可與承命。故我總攬衆議。裁成庶政。不終日以明罰。靡踰時而出令。所以四凶並殛。彰大舜之重華。七日必誅。表宣尼之至聖。則知邪不必大。去之于初。疑不以細。察之在予。繇君慮之昭若。乃國經之晏如。邦憲必加。貴干將之立斷。佞言必遠。防蔓草之難除。況夫決惟智君。存乎主略。懦者不事。戒乎紛若。兩端之慮。儻起。三至之言。必作。衆方共棄。何傷速卽之刑事。苟有猜。將致不悛之惡。又安得恢明治本。鞏固洪圖。絕邪道于彼有。俾疑情于我無。禁僞防奸。詎稽遲于天罰。去貪攻昧。敢猶豫于靈誅。宜乎縣代垂言。方來作式。示必信于研究。詎致疑于典則。然後不仁遠而至道昌。撫安萬國。

與人不求備賦

君使臣下  
無責其備

才不求備。職惟有分。伊專任之臨下。俾竭誠而事君。人各有能。敢十全而責實。臣無虛受。但一善以圖勳。古有辟王。善于任使。精較民極。稽參國紀。以謂性旣萬變。道非一揆。或工大而拙小。或樂成而憚始。故我

差以物序。合之天理。事無俱得。異全能于聖人。功靡兩求。殊不器于君子。徒觀其外。盡羣慮。中經大倫。登于朝。則求文德之士。扞于國。則求武功之臣。過不掩善。言無廢人。尺有短而寸有長。迭期就效。韋自寬而弦自急。各俾修身。且夫百行至難。一人至寡。苟取盡美。必乖御下。昨之非也。未易輕棄。今之是也。胡能遂捨。所以由于扞難。但論績于受戈。裨謀經邦。豈責成于謀野。豈不以能否並列。功惟萬殊。賢佞異稟。理非一途。猶夫良匠度材。長短隨其制。巧冶造器。大小盡其模。然後用物不失。遺材則無。易治潁陽。可驗薛宣之教。優爲魏老。足明公綽之徒。如是。則何往不臧。惟變所適。材不吾過。官胡爾責。豈徒列于訓典。乃備存于方策。隻輪甚恥。穆公忘一眚之微。冠玉非賢。漢后收六奇之畫。噫。內不兼外。尊無預卑。儻上案于天秩。曷俯經于國彝。用實咸若。功將總其聖。在孔門。尙四科而辯論。明于舜典。猶九德以疇咨。宜乎古訓騰文。先王著義。覽萬國之共理。豈一夫之必備。儻推用人之心。可研天下之志。

十二管還相爲宮賦

宮則時主相繼而王

十二之管。還相爲宮。自函三而資始。播吹萬以無窮。協构建于斗綱。互分正位。應雌雄于鳳律。狎至成功。尙矣聖言。淵乎太極。包二氣以躋隱。參五行而垂則。氣物相盪。盈虛並得。迭處迭去。忽微由是靡差。一往一來。休王從而可測。懿其自律。召呂猶尊及卑。氣逐候至。陰隨月移。天不能以道愛。日不能以氣欺。隔八數以迴旋。來皆有次。定三分而損益。動各乘時。且夫管寓其形。宮謂之主。我當其會。則衆音不得不集。彼

據其正則羣倫不得不輔。蓋以下括人紀。上分天部。陽唱九而陰唱六。密極毫釐。呂生子而律娶妻。應如規矩。豈不以二儀之氣。順之則爲祥。三辰之序。差之則降殃。故我轉五音而並劭。如四序之旋相。遂使春不愆暖。秋無迭涼。本自黃鍾。始同功而異位。終于南呂。遞捨短以從長。故得均校盈虛。宣精啓閉。本本無失。生生相繼。彼既舊而此新。吾將崇而爾替。風由氣發。六十數而成聲。月以辰同。三百旬而作歲。美夫一動一靜。或煦或吹。得之者空積咸若。失之者慘舒遠而亦猶三統體元。惟紀正于升降。六章凝采。互爲質以彰施。宜乎萬寶該成。一氣洪暢。顯厥應而有旨。當其時而自王。故吾于宮律之間。見天人之情狀。

大信不約賦

誠著天下  
無取於約

君惟去僞之道。約乃未孚之名。既外盡于末節。俾中含于至誠。化自不言。表聖人之執契。衆將來助。非君子之屢盟。原其至治有開。羣生在御。五教既備。百志中處。乃謂信者本也。本立則道化可行。約者末也。末成則僞端益著。故我悉蕩偷薄。專求明恕。同底于道。詎屑屑于至期。不戒以孚。豈孜孜于豫慮。何則。信出于我。感物而能宣。約徇于彼。致疑而易愆。在顯猷而祇若。胡約請以紛然。得不遠取諸物。仰觀乎天。萬彙生成。本宜符于氣候。三辰盈昃。孰邀會于經躔。薰然太和。納以純嘏。蓋明亮而格物。匪誓言而接下。武有不期之伐。功乃告成。蒲稱胥命之辭。違之蓋寡。勿謂信之小行而永孚。勿謂約之至久而必渝。譬夫道之深。反見其不器。德之盛。乃謂之若愚。理自吾有。詐將爾無。明允克敦。令未行而已應。篤誠斯至。祥不召而



先符亦猶神無言而四時行。海不爭而羣流聚。況夫君唱臣和。聖作物覩。由衷之教鬱興。久要之文何取。鄭交質而無益。足驗離心。周作誓而始疑。終乖禦侮。曷若化行輓軌。功被豚魚。俾大猷之廣矣。寧宿諾以依於。發乎身而加乎民。克昭上德。推其心而置其腹。詎載盟書。宜乎大禮攸稱。明君卒度。體天地之覆燾。總邦家之興作。苟允執以存誠。亦何勞而用約。

祭如在賦

躬主明祭如彼神在

祭惟首義。禮乃慎終。念奉先而勵翼。必如在以欽崇。肅薦尊彝。悅先靈之可接。祇陳籩豆。訝警欬以潛通。用能敦至孝于前牒。貫純誠于厥躬者也。作訓其誰。聞諸宣父。稽明祀之備物。欲致恭而爲主。謂夫祭則惟爾有神。謂乎在則莫予敢侮。相其志意。但見懷然如生。儼乃衣冠。孰云無念爾祖。蓋以自邇推遠。居幽達明。彼耿默以無朕。此吉蠲而有成。奠獻彌勤。若奉杳冥之信。齋莊愈篤。如聞歎息之聲。且夫物之感者。莫盛于神。禮之修者。莫大乎祭。所以交乎不測之用。立乃惟馨之制。思所樂而思所嗜。寅命有加于此乎。而于彼乎。精衷益勵。則知祭煩則數。祭怠則疏。故我嚴祀事以駟若。遵時思而穆如。奉鬯而前。望若有求之際。潔粢以進。優同將見之初。若然。則故能立教哲人。垂謀翼子。苾芬之至如彼。濟漆之容若此。其用足見其徵可擬。類謀事而就祖。必取致誠。譬入虛而有人。寧忘率履。異夫祭之垂範也。節之以禮。在之告虔也。先誠其身。念酢侑而咸舉。若音容之不泯。允謂孝子能享。至誠感神。亦猶事亡如存。顯周文之永錫。闕

爲君難賦

天下之大  
王道非易

於鑠元后。尊臨普天。將圖難而自戒。宜克己以爲先。守則至艱。慮極置危之器。行非孔易。居深若隕之淵。稽夫萬有實繁。一人蓋寡。巍然居上。岌然御下。儻內怠于兢慎。必外彰于滿假。循是要道。茲爲難者。側身修德。答愛戴于黎民。積行累功。念勤勞于宗社。斯蓋憂以啓聖。治無忘危。務謹戒以欽若。敢安懷而守之。堯不糝而舜不羶。方隆國本。湯爲犧而稷爲稼。始定皇基。是則此謂之難。以兆民之吾賴。彼謂之易。以爾躬之彌泰。民賴者允定聖功。躬泰者必悼後害。言之惟訥。我則出令不私。人未易知。我則進賢爲大。亦猶防近者可以慮遠。誠弱者可以禦強。必在祇畏一德。勤勞萬方。懼乎災而災息。敦厥化而化光。所以夏禹克艱。訓黎民之乂德。周公無逸。誠孺子之將王。是則知罰之難者罪不繁。知賞之難者功可攷。聖人憚之。則克此永世。叔葉易之。故失乎大寶。小心翼翼。敢輕視于萬幾。思日孜孜。冀力行于至道。況夫天命弗僭。道心惟微。伊前鑒之有作。誠後圖之習非。七月陳王業之風。由茲可見。一言示興邦之道。于此其幾。宜乎寶業阜安。皇威翔被。昧者謂我不遑啓處。知者謂我靖恭爾位。非深識乎險艱。曷馴致乎簡易。

乘石賦

名器無小  
因禮爲重

物有因君而重。禮非以陋而輕。偉介石之致用。由乘車而正名。盤委堂陛之間。始空國步。踞重和鑾之地。遂啓乾行。愚嘗眇觀古經。深探聖意。攷上禮之云展。總羣倫而咸萃。求有大而必給。體有微而莫棄。斯石

也。所以賤而獲舉。彼乘也。所以待而後備。惟進退不失其正。仰奉帝儀。非左右先爲之容。自參國器。有方不毀。匪德而隅。旣出類于瓦礫。敢較珍于瑾瑜。履也非患。憑焉則無。本匠石之載磨。發于穹谷。保詩人之不轉。邇及丹塗。觀夫觸之孔堅。瑩如增皎。常抱璞以在下。罔自他而飭表。厥容有扁。旣接之于至尊。其履不疑。故重之于雖小。及夫廟朝有事。采物畢陳。大輅儼而竢駕。華旒粲而承辰。爾乃詔隸僕以進御。對皇居而肅振。洗以示恭。肆夏爰回于步玉。蹈而升駕。屬車遂汎于清塵。可謂勤王而后貴。執禮而相因。彼擊而拊者。樂律所諧。嘉而肺者。民情攸啓。各著邦典。皆參治體。然未若屹如帝所。邁投水以效忠。密爾車前。類補天而賀禮。不如是。追琢何取。平鑿罔施。賤目弗尙。多礪見遺。諒以延帝暉之戾止。輔國章之禕而簡。在王庭。實奉時行之典。始于足下。居呈不磷之姿。異夫元后有求。攸司是奉。竦彼寅畏。格其虔鞏。故曰。捨我兮。履之卑。保我兮。用可重者也。

黃鍾爲律本賦

陽氣之琯聲律茲始

中之色莫盛于黃。鍾之氣孰尊于陽。本生律以類物。爰配辰而奠方。一以函三。肇無形于子午。九而唱六。列有象于宮商。茲乃研化之先。索和之貴。寓乃氣數。強其稱謂。遡寸管以在下。衍大聲而不旣。推而上據。萬物之始基。左而旋孕。四時之茂氣。作者其誰。伶倫是司。裁筠均厚。聽鳳雄雌。爾乃制其形。取長之最者。比其度。皆可以生之。我作爾信。爾無我欺。以候八風而風應。以呼六氣而氣期。乘二除三。由忖該而有得。

上生益一。咸按歷以前知。然後效陰陽慘舒。參日月盈滿。以定權衡輕重。以均律度長短。先靡益疾。後無加緩。諒由應乾而位初九。處乎太陰。全寸而黜餘分。異夫衆管。且其黃君也。化得君而明。鍾種也。物待種而生。其統天極尊之號。厥位子執先之名。用能包五六以作合。無忽微而應聲。亦由至道開先。萬物之區。遂判。太極資始。兩儀之象斯成。若乃八音有文。六同命律。二十五之數。十二宮之實。雖動而徐生。皆我之自出。數不敢紊之于首。神不敢藏之于密。異爻得應。見林鍾生子之辰。同位均尊。著姑洗娶妻之日。噫。推歷于彼。統氣在茲。一寒一暑。或煦或吹。本本資于眇忽。生生著于云爲。候氣揚灰。冠地至而首出。旋宮統月。倚天數以無遺。異夫妙算攸先。正聲有始。尊同心一統之用。助宣氣旅陽之美。諒非軒轅氏之聖功。疇能及此。

誠覆車賦

前轍之覆來者爲誠

大道有蕩。傾車在前。伊來者之深誠。思遠途之曲全。顧轆轤以摧輪。安能繼進。視彭彭而改轍。式鑒先顛。仰味至言。遐稽往哲。于車誠而引諭。譬人謀而有說。將欲以敗警成。因工棄拙。追昔時之失御。大爲之防。在今也以回轅。下視其轍。徒觀夫流水競穀。輕雷奮輻。千金之子不倚。五達之莊載馳。力且竭矣。遠猶致之。旣嗜進而味退。倏忘安而遘危。敗厥載于積中。金胡及柅。棄爾功于引重。轄靡遑脂。得不矯爾前非。求茲後福。彼諒出乎一失。此宜存于三復。諱是險易。潛虞蕩覆。望前驅之致患。足見存亡。念後乘以方來。敢

矜馳逐。豈不以圖。今者視昔。觀往者知來。據福可以慮禍。守正于焉救回。故我假一車之申鑒。協萬物以兼該。拒險還軒。式戒乘槐之蹶。去危發軌。深防債濟之災。況夫訓難誣于後人。諫罔施于往者。必將觀患于外。防微在下。苟遇喪乘之道。引而避之。儻行脫輻之郊。吾其還也。亦猶詩取商鑒。周仁始基。刑誠秦失。漢章有宜。率自先王之道。咸成後事之師。則車不徒喻。誠亦有爲。前瞻泛駕之人。自貽伊感。卻視執綏之子。豈不爾思。異夫身其晦。必思于明。志乎夷。必防其隘。然後卓爾自立。惕然垂誠。周流乎中道而行。決無淪敗。

德車結旌賦

車結旌者  
昭德之美

德美中尚。戎容外除。示同軌于函夏。爰斂旌于大車。清道以行。盡屏垂繆之飾。展輪載効。還同卷旆之初。禮典鋪觀。訓言備列。以爲車之崇德也。不取乎盡飾。旌之曳綵也。宜從乎善結。因乃器用。敷乎帝烈。此駕而俟。蓋專講于禮章。彼舍而藏。示不矜于武節。諒以聖洽嘉靖。邦臻治平。思闡化于偃革。詎飾威于抗旌。纓就煥然。絕搖搖之曳影。鸞聲嘒爾。收子子之流英。盛化當茲。未儀可舍。言車也。尊君乘之至美。語旌也。陋軍容之相假。方且假赫奕于轂佐。輝聲明于帝者。輿音在御。纏乃旒而弗彰。輪節載和。曳爾旂而蓋寡。則知車必稱德。以其當偃武之朝。旌必命結。以其惡盡飾之標。然後潤國容之濟濟。藏禮器之翹翹。載戈之德同邵。動旌之譏且遙。鄙楚廣之建茅。但專武事。賤晉軍之畫旆。益昧文昭。在夫外損禮容。內充至德。

越暢穀之務戰。矯寅車之宣力。我衡旣倚。于以斂文羽之繁。我御旣均。于以褫武綏之飾。彼朱髦炳于漢牒。元乘載于周詩。或邗光之克煥。或武怒以攸施。曷若明達至治。裁成上儀。奉乃麟麟之音。文爲貴者。顧厥悠悠之質。卷而懷之。懿夫化極偃修。教臻善美。乘其車也。見作者謂聖之道。結是旌也。示不復用兵之旨。噫。奚由知盛德之然哉。以此。



# 景文集卷五

## 風雅體詩

順祀詩

并序〔案〕仁宗本紀慶歷五年十月辛酉。祔章獻章懿于太廟。與此相符。

臣某言。伏見去年七月壬寅詔書。章獻明肅皇太后。章懿皇太后。並祔真宗廟室。有司擇日具儀以聞。其十月辛酉。皇帝步自文德殿。奉玉冊玉寶至大慶庭中。再拜以命丞相臣昌朝。臣執中曰。假爾節。其遂告于廟。臣昌朝等再拜受命。容衛焜煌。不譁不敖。款于奉慈。昭告如禮。然後奉章獻明肅皇太后。章懿皇太后木主。納諸太廟。有司至孟月之饗饗焉。已事。丞相率百官詣閣稱賀。有詔大赦天下。釋罪已責。賜羣臣軍校各有差。恭念盛德形容。所以告于神明者。宜有聲詩頌歎。以播樂府。臣某被學已舊。受恩寢深。前日預聞朝廷末議。今茲攝事省闕。不當以斐然捍格。自棄諸儒之後。輒夙夜齋戒。撰詩一章。前侔猗那。後訂清廟。刺取經誼。以輯其辭。又惟三代以來。娶止一姓。姪娣有序。勢不相踰。故配食納寢。止一后而已。由漢而下。盡革周制。繼室誕聖。均極尊名。而諸儒拘摯。仍執故典。競無實之偏論。破適世之至權。遂使漢祠別園。梁建小廟。礙禮不厭。抑感弗通。罔極之報。則篤于一情。以時之祭。則判爲兩祀。列辟未悟。庸可嘆哉。且善教者不拘古以妨今。善禮者不後情以先物。唐明皇帝主于合祔。失于敘升。故一王之典。闔而不昭。先

帝獨啓聖慮。順躋二德。侑太宗之尊。陛下述遵前憲。寅奉二章。參文考之祐。然後天下之議。披聾發聵。知前古之謬闕。當今之適宜。親親尊尊。粲然無惑。故詩之所陳。揚推熟復。繁而不簡。亦咏歌不足。不知舞之蹈之之義焉。臣某頓首以聞。

孰順其祀。明明天子。天子謙讓。詔羣臣其議。惟章獻章懿。遂祔先帝。宜索而典。而古而今。順攷攷宜。慰我孝心。羣臣稽首。不遠厥成。伊先猷是程。伊大孝是經。匪祥符孰從。則莫我京。三代廟寢。止一帝后。漢制已遷。儒臣罔究。禮缺不稱。因樸趨陋。親靡祔尊。神挈斯祐。帝曰。兪哉。予奉二慈。匪曰無典。實成訓是依。促灼爾龜。爰薦爾儀。琢金追玉。昭款信辭。不敢先後。惟以順躋。孟冬十月。大饗其時。朕不憚勤。于庭遣之。吉日辛酉。帝自文德。至于大慶。奉寶授冊。永懷劬勞。孝貫天極。虞賓在位。百官承式。顯顯太歲。惟冊寶是將。和鸞有容。龍旗孔揚。既至于廟。是承是告。奉遷后主。合侑文考。有主則止。有匹得行。遂旅豆籩。以及芼牲。明水太羹。有飴有澄。鼓鐘欽欽。鼓瑟鼓琴。考悅妣安。獨我德音。德音惟何。帝受純嘏。不專斯饗。用赦天下。開釋罪辜。賜逮九軍。一人作孝。庶邦蒙仁。禮非天作。托始于聖。聖克正始。萬世攸定。作述交善。神人胥慶。天謂皇帝。既付所覆。帝克孝治。奉親以侑。其收丕祺。蕃衍後昆。萬有億年。繼繼存存。

上許州呂相公嗣崧許康詩二首

并書〔案〕宋史呂夷簡傳夷簡封申國公景祐四年夏四月以鎮安軍節度使同平章事判許州

十一月一日。尚書刑部員外郎直史館宋祁敢再拜奏記相國申公執事。竊聞古者堯有四伯。是爲四岳。



實佐文命。降宅九州。帝庸嘉之。故賜姓曰姜。命氏曰呂。在周宣時。有申甫者。能左右王室。以興周道。國人美之。爲作崧高之詩。道降神之異。仲尼掇焉。以什于雅。在春秋時。有齊許者。盟會糾慝。幹不庭方。以大承厥祀。有祚在下。史世有家。爲諸侯選。由是言之。呂姓之衍于申。曼于許。厥惟舊矣。恭惟相公。憑極天之峻。秉蒸民之彝。慶叢祥發。與聖參會。言行而帝采亮。謀奮而天綽和。散爲九功。宣爲六德。沛如淵回。湛若陽休。勩相丕后。十有四祀。助薰燎而郊者四。導農輅而東者一。而鬼神無遺歆。戴斗之使歲通。戎蠻之費月來。而疆場無猜侮。士之賢者進。無能者退。邦之不足者與。有餘者取。而上下無尤違。三辰澄霄。百穀露野。佑我不業。格于皇天。跡夫感會之隆。幽贊之協。要可知已。有太岳基其兆。有申甫奕其先。有齊許蕃其系。靈光孫謀。是相是鍾。天而未忘。叔仲之德。是故復申之字。以陪敦章大。卽許之舊。以濟美顯庸。傳曰。惟其有之。是以似之。公之謂矣。某不佞。學于舊史氏。知吉甫史克之作。以事美一時。託文見志。遂得聲滿天地。于今稱誦。不自知量。謹作嗣崧詩五章。章十句。美公之國于申也。許康詩五章。章十二句。美公之安乎許也。立言之體。略細語大。故推而上之。以及于祖。辭必欲類。不容虛美。故循而下之。後及于公。古之賦詩。義取卒章焉。嗣崧之亂。曰壽考是承。士大夫之祝也。許康之輯。曰帝曰還歸。邦人之志也。雖不足雍容揄揚。其義肆而不隘。輒因誕日之慶。繕寫馳獻。侑奉觴之餘歡。伏惟一加觀采。裁貸其罪。不宣。某惶恐再拜。

嗣崧詩

嗣崧。大丞相四岳之後復國于申也。

彼嶽惟崧。天作其神。嗣生我公。我公斤斤。嘉猷矢陳。柄國之均。帝親命之。纂成前人。不顯其道。惟申是保。公邁厥德。祇祇翼翼。柔嘉而直。模我彝倫。揉我方國。施于夷貊。百度是毗。庶績允熙。罔敢不恪。惟公是若。帝詔執事。徹申土疆。衍沃腴良。賦輿溱溱。莫樂于申。昔在四岳。佑堯象禹。爲國心膂。受民作邦。于今以光。帝告于公。紹胥爾宇。憲是文武。如申如甫。爲周之輔。誕錫爾祉。惟申甫是似。乘車錯衡。淑施英英。式遄其榮。公拜稽首。敢揚王休。祈天之久。爲天子萬壽。彼嶽磐磐。松柏丸丸。公福祿實蕃。有崇而岡。有大而陵。公壽考是承。

嗣崧五章。章十句。

許康詩

許康。申公均政。勞而康乎許也。昔四岳之裔。在商周間。有申有甫。有齊有許。而公又作屏焉。邦人宜之。故作是詩也。

許麗而康。岳孫奠之。曰公之屏。實維似之。公徒增增。朱綬綠縢。不懟不驚。鈎膺鏤錫。稱妮顏行。噦焉綏章。總我列侯。式時南疆。公之相攸。孔樂于許。其原膺膺。其川訐訐。有芄禾麻。有京稷黍。藪焉糜廬。渚焉魴鱖。有李有桃。有柘有檀。樹我之園。令居則安。公視于庭。師兵翼翼。孔武有力。公適于府。陪卿髦士。罔不就緒。

公宴于堂。嘉賓我從。琴瑟鼓鐘。或楔或撻。靜好鏗鏘。萬舞有容。左拂其殺。魚鼈燔羔。給鮮于庖。右烹其敝。筍落蒲菹。柔嘉惟馥。旨酒且多。其飲溫克。攝爾攸儀。侑公宴嬉。俾胖而樂。俾艾而耆。明明天子。股肱一體。于蕃于宣。邦人咸喜。主芼之山。浚灑之渠。弗童而材。弗竭而漁。皇惠斯人。俾公焉依。公報其成。帝曰還歸。許康五章。章十二句。

### 五言古詩

#### 夜直省舍

省舍諸吏休。前軒成獨步。月色淨車首。星痕隱溫樹。稍聽班馬鳴。猶見昏鷓度。索居易興感。幽抱邈誰晤。自問濩落姿。胡撻文墨務。企歡無剩娛。卽事有盈慮。遠寄江海心。冷風儻能御。

#### 省舍晚景

日稷城陰生。塵露稍云歇。密樹抱烟沈。高禽映天汲。外物既不優。清機亦徐發。何意義皇風。吹我襟袖末。少駐北堂陲。娟娟待明月。

#### 正言田學士況書言上庠祭酒廳北軒予所種竹滋茂

昔承上庠乏。蒔竹北堂軒。飭吏勤浸灌。冉冉榮孤根。日晏到官下。對賞忘塵喧。海月影宵朏。天風籟晨顛。去年主人斥。負謗爲淮藩。後來異好尙。欲諉不敢宣。何幸覲時哲。乃加封殖恩。千里走書驛。語竹遙相存。

不才好冷局。異日期歸旋。千萬屏剪伐。勿令孤願言。

仲夏愆雨穉苗告悴輒按先帝詔書繪龍請雨兼禱霍山淮瀆二祠戊寅歲祀己卯獲雨謹成喜雨

詩呈官屬

盛夏挾驕陽。于以構炎燠。歛塵空天蓋。烈御煽雲漢。稻穎苗然秀。涸流不勝灌。田峻卹歲功。釋耒共愁歎。太守忝農使。閉閣重慙惋。曾是謬政綱。曾是濫囚犴。一食三失匕。冀亦思過半。馳祝訴羣望。願以身塞譴。先帝隱民瘡。致和格靈變。圖龍著繪法。令甲布州縣。愚計不知出。奉行安敢慢。外日築層壇。丙夜封舒鴈。奉匱再三跪。信辭靡虛薦。幸勿爲龍羞。敢不報神眷。翼日耿弗寐。徂野視宵奠。幽血粲靜燭。執事便傳讚。薄誠蒙昭享。距躍私自忤。回車未及稅。雲油默焉徧。窮海遂涔涔。籠山茲漫漫。旱麓衆卉蘇。焦原喝氛散。寸苗蔚如振。新波鱗欲渙。何意一溉窘。有望千箱衍。揆予乏嘉績。聖詔仰成憲。恤祀神罔恫。昏作人肯勸。抒藻拙言詞。竊用慰羣掾。

長葛道中作寄侍讀梅給事

仲春告言歸。道次古長葛。水窮旣舍舟。僕具始脂轄。南登高原望。天宇莽廓豁。溱澗澹無波。芡隴森相軋。春鳩日夜鳴。陽膏淺深達。田峻挈壺漿。稚子勤糲襪。驅牛洒先稜。趣車載輸結。郊柘色欣欣。梢溝流活活。縣官恩澤美。農節未嘗奪。賢牧謹詔書。民隱罔遺察。射蠲贅聚勞。鄉兵初免閱射賦檢誅求猾。我亦占一廛。聞茲

慰饑渴。矢詩雖不多。要附許風末。

去郡作

解龜淮陽區。浮鷁暮春月。州民擁前道。重爲使君別。尊酒卻略跪。絲管參差發。共謂君此行。寵命煥朝節。進伏丹泥卮。勉之奮芳烈。使君暫且嗟。處躬素衷拙。雖爾荷賜環。安敢冀榮轍。頓首謝上畢。行當避時傑。願移邦人愛。孤根保勿伐。

壽州十詠

〔案〕十詠題熙熙閣、白蓮堂、清暉、式燕、秋香、狎鷗、齊雲、美陰、望仙、清漣等八亭、今缺美陰亭一首。

熙熙閣

東譙已自高。復此構層宇。誰謂淮南遠。風物美無度。飛岑納晝碧。流月遺宵素。揆予乏仙氣。樓居庶可慕。

白蓮堂

堂皇敞而華。欄牙照池水。鈿葉蠹新團。玉葶粲繁蘂。游鱗竟潑潑。幽石仍齒齒。寄言採秋芳。何必涉江涘。

春暉亭

涉園憇何處。道左蔭華棖。幽尋乏朋往。勝晤徒自知。文禽弄不歇。惠風至無期。含情重徙倚。物色到霞霏。

式燕亭

使君班春還。于焉衍吾屬。四阿住暈棘。聊以便涼燠。棟表飛雲逝。題端邀月宿。無德與斯人。式宴良自慝。

秋香亭

蘭菊被秋坂。危宇冠層巔。雜樹自隱日。脩條爭刺天。石斜苔附秀。樛窮蔓倒懸。擷英欲誰遺。伫立徒娟娟。

狎鷗亭

昔人有機心。鷗鳥舞不下。太守心異昔。寒灰與時化。爾既不我猜。余亦無爾詐。隨波以全軀。于茲伴多暇。

齊雲亭

肇允締層宇。岌岌少城隈。憑軒肄師子。予始創此。下臨都場。時于此閱武戲。中坐合賓壘。白日披霞上。蒼山障霧回。眷言西

北道。吾師安在哉。

望仙亭

嘗聞淮南王。雞犬從此去。至今山頭石。馬跡尚有處。使臣辭從官。終日絕塵慮。望望雲漢間。想見賓天馭。

清漣亭

煙篠環曲隄。飛軒俯幽渚。水容靜可鑒。倒見城頭樹。青蒲蠹爾秀。白鳥瞥然去。勝晤與時新。遂歌奚能叙。

草木雜詠五首

楠

童童挺十尋。一蓋摩空綠。斜月礙枝回。涼烟附葉宿。拙斧無妄加。要經匠者目。

藤

虺蔓相結蟠。虬梢互回屈。紛若未契繩。繁如已綸綉。峭格外團陰。尤堪庇炎日。〔案〕此詩宋詩存缺。結韻作五言絕。

櫟四時開花作實

紺實紛纍纍。柔柯緩若若。葉以代新陳。花仍開續落。味雖不常御。香能破醒惡。俗傳醉者嗅香輒醒。

海欒

哆熾風葉張。困斂雨皮厚。叢櫟列蓋端。攢旄注旗首。物以希見珍。材緣怪志醜。

枇杷

有果產西裔。作花凌蚤寒。樹繁碧玉葉。柯疊黃金丸。上都不可寄。咀味獨長歎。

塞垣

塞垣八月暮。百卉已凄然。沙驚甌脫路。霧暗單于天。衛霍始開府。辛趙數屯邊。塵霜犇金戟。攢月駛飛鋌。彫弧六鈞勁。犀札七重穿。一戰薄瀚海。再討窮祁連。露布報天子。稱觴壽萬年。

春集東園詩并序及李獻臣以下六首附

春集東園詩者。端明學士獻臣李君。翰林伯中王君。天章侍講原叔王君。館閣校勘景純刁君。永叔歐陽君。子莊楊君暨予。仲月既望之宴所賦。是集有三勝焉。地之勝。則如左睨都雉。前眺畿隧。林簿灌叢。鋪棗

自環時之勝。如載陽之辰。戢慘僚舒。惠氣韶華。怡豫天區。賓之勝。則如朝髦國俊。清交石友。駕言相從。簪盍就閒。三者先具。吾人所以擠天下細故。徜徉蕭散。而自適其適也。若夫頰擷仰援。有藹有枚。參行迭饋。有載有醪。時哢嚶然。可以悅耳。野芳芑然。可以藉席。輕風舞于快餘。鮮雲曳于曬表。樂斯咏。咏斯陶。僉謂會之難常。詩之可以羣也。俾永叔列韻。坐者陳章。予與題辭焉。以詫其美。昔鄭區區一寰內侯。使七子從趙武賦詩。以觀鄭志。陽秋尙之。今多士樂事。萃此王國。選言足嘆。一出治音。使如武者觀諸君之篇。則知賢鄭人遠矣。章別十二句。句五言。雜附左方云。康定紀元之次年序。

賦得筍字天章閣待制宋祁子京

茂氣遍春達。結客並游軫。勝踐屬園墟。歡言駐騶引。跼情適野豁。遠日向天盡。林馥樹纒花。町踈篁未筍。飲來無留醕。嘲往有餘鞮。耳熱謝時人。戚戚良可憫。

賦得藁字端明殿學士兼侍讀學士李淑獻臣

東城桃李春。結客玩珍藹。試過辟疆園。兼屈中郎屣。筠苞煙蔽虧。柳帶風眠起。岸幘藉芳芳。銜杯嗅新藁。留連魚鳥適。放曠山林喜。意賞殊未闌。更作櫻廚擬。

賦得葉字翰林學士王舉正伯中

芳辰聊命駕。郊野賞心愜。亭幽路鬱紆。樹密花重疊。暫紆朝紱勞。喜與朋簪接。談塵逗松枝。宴賞澄竹



葉含和寄蕭散。選勝窮登躡。行樂且躊躇。此遊非日涉。

賦得萼字天章閣侍講王洙原叔

燕退朝事希。鳴騶出雲閣。近遊速朋彥。名園接闔郭。幽芳尙閒整。新樾已清漠。歡談一坐傾。遞飲百分涸。我亦醒而狂。遵溪縱行樂。晚駕方惜歸。正巾墜香萼。

賦得翠字館閣校勘刁約景純

託載東城隅。選勝名園地。不問主人來。聊適尋春意。簪花照席光。藉草連袍翠。烟霏遠樹迷。風獵繁英墜。促行澁灑觴。少駐雍容騎。四者信難并。安敢辭沉醉。

賦得節字館閣校勘歐陽修永叔

綠野秀可登。遊駿嘉初結。芸扁苦寂寞。禁署隔清切。歡言得幽尋。況此及嘉節。鳥哢已關關。泉流初泱泱。紫萼繁若綴。翠茗柔可搨。屢期無復時。芳物畏鷓鴣。

賦得蒂字館閣校勘楊儀子莊

芳節未畹晚。名園好澄霽。停車沒徑苔。移席傍叢筍。蝶粉留紅房。蜂鬚抱香蒂。微波生酒杯。輕吹拂衣袂。何當名教樂。況復昌時世。歸鞅惜餘歡。陽烏不可繫。

七不堪詩七首并序

昔嵇康有書抵山濤。自謂有七不堪。恐不可居世。雖抗言自任。亦篤性使然。予年過四十。抱支離之疹。移告時滿三月。臺家未之効也。而因病成老。習惰成愆。向之不堪。予皆有之矣。自念官在史氏。執筆右螭。不容頽放。以安于無用。聊作七章。自歌之。亦自做云。

一不堪。性嗜日高寢。疊鼓震餘夢。星毛欹倦枕。冠劍朝已盈。當關視門闕。  
二不堪。草野樂垂釣。潑潑錦鱗游。籊籊翠竿掉。夕負槁桐還。行吟面煙徼。  
三不堪。坐痺不得搖。湯沐乏薰濯。蟣蝨喜爬搔。俯惕板在手。回慙綬結腰。  
四不堪。不喜謝書疏。正無刀筆能。拙作餐飯句。自勉信非長。愆酬亦逢怒。  
五不堪。未始臨喪弔。倍重秦失號。禮譏老聾笑。勉順當世情。爲哀損真妙。  
六不堪。不樂俗人共。聒聒沸蠅集。紛紛臭孛衆。怒遷多市色。禮煩方聚訟。  
七不堪。束紳對文案。吏若鳧鴨趨。文驚朱墨沓。自爆安所能。深心託蕭散。

庫部閔員外還都

望郎東南秀。齷然悟真理。身雖宰官身。子卽諸佛子。畫諾閣鈴下。塵慮未嘗滓。成金不復礦。見月詎存指。東道整朝珂。西亭摻離襪。無用樂山林。山林卽朝市。

劉藥染新蘼插鈿成密房  
仙人文玉字宮女道家妝  
聞說藥間露能令肌骨香



景文集 卷五



# 景文集卷六

## 五言古詩

### 和登山城望京邑

子牟懷魏闕。陳咸思帝城。他鄉豈不美。吾土樂所生。況復撫凋節。憑高懷上京。山川不可見。葱鬱凝神縣。紫氣抱關迴。玉斗侵城轉。負羽長楊獵。撞鐘平樂宴。高冠照華蟬。英俊皆比肩。朝奏主父牘。夜召賈生賢。五侯交薦幣。諸公亟爲言。我生流離極。十年悲去國。葉願洛陽飛。魚寧武昌食。當棄關下符。一對危言策。

### 送平陸知縣尹象先

之子被尉薦。走馬赴關西。西人待賢相。撫育庶有宜。羌羶汙右鄙。秦隴含創痍。健將貪屯聚。砦柵猶鱗差。四年結不解。糧餉先自疲。兵分勢已弱。賊入縱橫馳。營陣訖不立。安得張吾師。比來守禦計。尙復紛相訾。子今位苦下。何由能奮奇。悉力字羸瘼。姑守簿書期。

### 次陝郊

驚風吹客夢。西落劍南天。自問何爲爾。官牒見嬰纏。邊傳非久舍。黎明徒御喧。俯輪千仞底。仰轡百尋巔。憑高一以眺。野氣正蒼然。崖奔仆僵樹。湍躁啼荒泉。羈禽易去木。奔鷹不擇阡。撫物重增嘆。去邇邈以綿。

何爲久行役。坐使歡心捐。

提刑使者還嘉州

使者艤行舟。是行及淒序。祖帳俯平沙。從騎羅前渚。一進酒惟醴。再進魴及鱖。遠客已少惊。況將睽宴語。勁風自薄林。寒流稍分浦。訟矢久已閒。農坻矧就緒。歲晏亟言旋。無爲負延伫。

提刑勸農使者還嘉州

案部聊北征。肅飴復東下。江澗澹泱泱。檣鳥紛雅雅。離醕不餘杯。征棹亟沿洄。遠岫隨時見。幽花無候開。清氛霽平陸。林卉信重複。熨路繚山顏。馳田耨巖腹。屬此屢豐期。仍當省斂時。擊壤係途樂。餘糧尋畝棲。嘉陽信嘉處。時與賞心遇。霽樹抱空輪。寒濤下翔鷺。還轅眷仲秋。秋序日方逾。歸諾果無負。遲子臨江樓。

雜詠三首

有客款我廬。念我衰暮齒。自言上真書。有藥名不死。黃金乃能化。白髮安足治。謂我刀圭餘。已足度年紀。驅還扶桑面。黃昏付蒙汜。主人詭謝客。吾生本塵滓。少來誦詩書。不識怪神理。驚聞河漢言。浩然弗知矣。今也病未能。異日從吾子。

金爐焚蕙荃。香播蕙已灰。郁馥誠可貴。無乃爲蕙災。上瓦編翠烟。下礎挺沈質。所用不必同。相濟成宮室。樂羊振歸旅。光艷充國都。矜心激盛氣。奮若長虹舒。君王勞軍罷。爲出一篋書。避席再拜跪。功非臣所圖。

不待一盈篋。寸書已有餘。成功在主君。斯語不可誣。

### 玉玫瑰

瑤楮鏤空濛。冰紈捲重疊。寒光欲衝斗。迴秀難藏葉。誰碎辟邪香。氤氳飛作蝶。

### 劉伯誠見惠僕所作中山雜詠石刻

衣冠昔奔波。晉社亦中徙。水府擁宮闕。六姓傳劍璽。名卿入理窟。黔首多兵死。真人剗墉障。六合如平砥。三山屹不化。城郭無形似。冥冥桑麻村。殘鋒出耘耔。前朝絕遺老。故事稽野史。我頃爲中山。蠲租案田水。剗木枕波濤。礮刀伐荆杞。叢祠及荒壠。幽處無不履。車停客登席。酒盡詩在紙。游深造遐邃。語苦出奇詭。投囊凡幾時。蓬塵失料理。劉侯見之笑。謂此那可毀。濡毫請揮灑。買石親鐫紀。嗟予政理疏。無德行裒壘。編民願尸祝。有愧庚桑子。惟茲楚客謠。可以傳下里。何時見椎擊。斷仆清江尾。

### 寫懷寄獻樞密太尉

僕本草茅人。守植自有素。偶與力運偕。牽絲及榮路。矢將保獨行。安敢邀詭遇。朝躋綠霧閣。夕舍金馬署。鷄志屈鴻翼。珉質謝瑤圃。內省實空虛。焉得久留處。悟非不必老。斑領況云屢。竟獲一麾來。果此避賢趣。載以朱轡車。佩以銀符兔。君寵寄華冕。癩醜不成惡。淮郡梁楚交。刀筆紛民務。粗欲逃官責。何暇收民譽。平生觀宗工。亟爲拯淪誤。慙負知己言。遂貽越鄉慮。何圖霄與泥。肯問簪與屨。辛勤風波事。尺牘奚能訴。

代馬愁南嘶。鷓鴣憎北翥。所戀明主恩。未理歸田馭。

瓊花

唐昌觀中樹。曾降九天人。鑾駕久何許。雪英如舊春。豈無遺佩者。來效捧心顰。

扞懷上孫侍講學士

僕本寒鄉士。始願託田隴。偶與亨會并。遂竊空名寵。黷冒信清閒。文書無倥偬。牽絲玷外舉。挾册陪春誦。縹帙芸葉香。清池璧流壅。雖均五能知。猶冀三陌踊。有志慕孤直。多言畏奇中。往往犯怒狙。時時遭嚇鳳。脅肩方病畦。洗足幾成漚。言充衛士譽。賦蓋吳人甕。但望不汝瑕。安能賈子勇。叢雲屬帝辰。烝汕樂賢共。前追三代風。旁鼓天下動。方正召華郤。賢良命晁董。務擢平津對。無罪賈生慟。哀然羣雋來。燦若春葩縱。咨予苦澁訥。望風猶陰拱。愁多目似蒿。疾久帶移孔。直慮醒而狂。遂同微且燠。三千御上方。八九吞雲夢。訂正清廟詩。白罷旅葵貢。夫寧本無志。良憂拙于用。擊轅固歌鄙。殫金誠外重。中夕撫躬嘆。明恩愧孤奉。況復年苒苒。坐驚頭種種。閒居昔有潘。廣宅今非仲。塵容化衣襜。雨氣昏刀鞞。所賴庇明慙。盱衡顧閒冗。每辨驥垂耳。力排儒發冢。不爾謝病歸。鉏釣事江葑。

溪上

溪上玩秋水。使人意自清。烈烈回飈餘。鱗鱗夕浪生。有魚可垂餌。有蒲可芼羹。況值新酒熟。鮭菜辛鹹并。



興來命一樽。樽至壺自傾。便值人間虛。浩然滄海情。

送行

秋日苦淒淒。味若蠶白辛。如何多感地。更送將歸人。高蓋浮清旭。長纓縛素塵。慘色動車僕。離言發坐賓。霜珂響征馬。星脂滑行輪。契闊何所道。良飯自寵珍。

曉櫛

曉櫛理斑鬢。蕭蕭徧愁顛。多病始計日。蚤衰不待年。青青固未幾。種種今乃然。寡髮有異象。施髮慙莊篇。且復委蓬葆。言就東山眠。

筠亭

山阿彼有人。蒼宇映脩竹。露籜新舊斑。風梢動搖綠。此君自虛心。主公今實腹。

送屯田張員外

飛霜遂凋節。歲籥忽已闌。奈何送歸客。置酒長江干。十載始一遇。別易會故難。此地嗟素領。昔日皆朱顏。詎意前歡餘。更爲後感端。行舟望不見。留驂相與還。芳訊幸無保。時付凌風翰。

古意

薄宦若秋蒂。飄然去林枝。盲風不我愛。吹墮清淮湄。淮南苦膠慄。九月繁霜飛。晚蕙相爲歎。崇蘭偕此衰。

凋落雖云苦。芬香終不移。但願陽春動。要當三秀期。

秋氣

清濁還二儀。秋氣颯然肅。溪潔潦已殘。林疎條自蠹。寒蛩思長塔。歸燕眷華屋。凋年自茲始。鄉懷念松菊。感舊送虞曹楊員外

曩笑長者言。感恨歲時遄。不云笑未幾。倏已及衰路。卻懷眼中人。落落星向曙。寧無新相知。論新不如故。夫子惠然至。適慰離羣慕。締交三十載。契闊不同處。醜老向來妍。鬢黑今也素。伐木喜求舊。谷風念將懼。我願濫榮班。君乃嘆奇數。根柢假容進。纏牽以長誤。久領一麾行。江湖極沿泝。杯酒曾未款。僕夫告方具。前樂暫還衿。後戚已盈慮。丈夫固有志。膂力經世務。何必常相從。卑若堂下屨。歲滿亟來旋。中朝著翔步。

擬杜工部九成宮

雲山鬱嵯峨。宮戶莽轆轤。摧峯隱馳道。鑿岫啟繡闥。游鷗邈飛鬪。陽馬恣陵突。危淙注銅池。翠激激崖骨。落虹拖晨軒。奔蟾守夜窟。憑高眺鴻洞。念古一超忽。咄嗟有隋後。締構窮剗。徒矜昔日工。乃忘後世拙。居爲唐家保。功業何汨汨。牛酒望幸民。巖廊衛守卒。殘松抱空偃。臥楊委新伐。千載徧荒愁。金鋪鎖嶒峩。

望仙亭

淮山相蟬聯。萬景歸宇下。來波澹天末。歸霧滅巖罅。淒淒草色繁。肅肅桂叢亞。吾人愧攸館。僊屬冀來會。

湖山

一水抱天回。干巖互相映。寒湖嚙沙痕。狂峯貫霞景。持此寫琴心。寧無子期聽。

勸酒

酌酒奉君壽。勸君慎勿辭。只今舉酒罷。已異行觴時。波瀾前後來。日月分寸推。稚容不耐久。縞領無停緇。獨醒信勞人。茲事定何悲。假今古無死。晝夜常倭遲。正恐爽鳩樂。後人非所希。

種竹

世皆笑幽獨。可不少自貶。種竹南軒間。亦足以相驗。況茲歲華晚。衆卉日凋斂。清節良自如。栽培匪爲諂。

涼蟾

涼蟾嚙殘雲。飛影上西廡。鵲鴉依空墻。蠨蛸已在戶。君行閱三歲。确戰亦云苦。新衣本自綻。故裳復誰補。朔風萬里來。儻或從君所。風過無傳音。徘徊獨誰語。

楊祕校秋懷

上天分四序。素秋獨可悲。商風勁危條。寒露鮮繁蕤。依依燕去巢。嘒嘒蟬抱枝。撫物喟然嘆。流光忽已馳。危衿慙新壯。華領移故緇。願君策高足。無後功名時。涼風颯彫年。遙昔耿多慮。列列寒螿鳴。離離客鴻度。之子懷茂器。有志康庶務。未蒙徐樂召。方感董生遇。

道局駿願遠。絃絙危響赴。此際怙悵情。借之歲云暮。  
治畹當樹蘭。治林當植桂。蘭生可香國。桂茂絕蕪薶。  
邈哉志士節。所趣與人異。意經千古上。心包九垓際。  
道勝外物輕。矧復韁鎖細。所以搶榆者。局局笑鵬翅。

真珠龍柏

彼美夜光喻。益之新甫名。纍纍雲際艷。皎皎月中英。  
勿謂素爲絢。相期隆德聲。

度飛石嶺

人不怨飄瓦。何用罪飛石。石墜不可常。人值亦其適。  
去去走嶽崮。千金幸自惜。

擬王右丞瓜園

荷鋤往瓜田。煙蔓紛廣疇。植杖未及憇。有客眷林丘。  
騶哄羅戶前。冠蓋蔭道周。進客北堂上。藉以氎毳柔。  
持盃再三跪。酌我清白酎。時時高興酣。矯首望神州。  
長衢貫廣陌。反宇注飛樓。惠風林間翔。早暉花上浮。  
新葉向蒙密。穀雛已啁啾。時哉物可玩。況復忘吾憂。  
故人心儻爾。駕言時見求。

寄題宮師相公宴息園

相公納衡樞。卜築來東里。恤他匪足尙。自適乃云美。  
中園興夷爽。薄言謝朝市。壤石非遠遷。松竹皆故蒔。  
絳藟謝游軒。素波鳴楔屺。遐蒼眺京隩。側縹抱嵩趾。  
畦塍互演漾。灌薄紛蠶靡。峩峩相向山。濺濺自流水。

高雲靡還期。冥鴻無慕理。公時挾勝想。竭來遵逸軌。逢觴卽陶然。坐樹亦欣止。冲情舍天倪。妙歌怯物類。揮金屢空鎰。愛客輒畱屣。式俾衛公壽。弗取安石侈。有守臥淮壩。聆風竦予企。他日果西歸。角巾望松梓。特源纔自潤。流波愧挹餘。

小渠

曉過二里山

黎明走蒼山。千仞勢如削。北斗挂西巔。徘徊久未落。驛道轉巖肩。人烟聚岑脚。太虛交昏旦。顛氣自噴薄。陽光排暗升。陰氛值明卻。翔禽散喬枿。啼猿思空壑。逢隈霧尙屯。投險泉爭躍。生平好山意。每遭事嬰縛。安得乘冷風。窮躋叩寥廓。

思賢閣圖予真愧而成咏

忝中二千石。罷去輒圖真。揆予本完士。蚤蒙善養仁。執笏班華位。飛綏侍邃宸。如何金紫服。乃裹丘壑身。西南一面重。竭來駕朱輪。牽拙歲再期。初無德在民。形象安足紀。崖畧聊自陳。質陋眸子瞭。志泰眉宇伸。誰謂彼其子。而傳阿堵神。爵里三十八。自參豫呂公而下凡四十一人赫赫多名臣。瞻前謝前哲。垂後慚後人。

九日藥市作

陽九協嘉辰。斯人始多暇。五藥會廣廛。遊肩鬧相駕。靈品羅賈區。仙芬冒闔舍。擷露來山阿。斲煙去岳罅。載道雜提攜。盈簷更薦藉。乘時物無賤。投之利能射。饗苓互作主。葳薺交相假。架音曹植謹雁今。韓康無二價。西南歲多癘。卑濕連春夏。佳劑止刀圭。千金厚相謝。刺史主求瘼。萬室繫吾化。顧賴藥石功。捫襟重慙喏。

# 景文集卷七

## 五言古詩

### 迎春曲三闋

青陸斗杓回。河內動新灰。冰際綃紋綻。雲邊鶴影來。漢宮行慶罷。花樹剪刀催。東郊風馭軟。嚴署漏籌添。柳拂將軍壁。梅飄公主奩。舞衣裁幾許。新人解織縑。荔達陽膏動。冰解水紋融。天花四面碧。日氣幾竿紅。不言雙燕晚。爲嘆玉箱空。

### 散關

磴道何盤盤。百步人一憩。弭節高山顛。關存不置吏。昔緣暴客須。今爲有道廢。

### 和成上人

西山有尊者。秀出于稻麻。徧參居第一。諸佛素所嗟。錫聲來赤縣。被袂垂青霞。流出一切妙。普見大千沙。我法果無在。昧者茲有涯。是凡方是聖。歸正卽歸邪。妄懷萬緣息。舉意千里差。有客謝病免。清辭春月賒。靜眠金粟室。厭坐馬融紗。伯氏比多齋觀化哂罽勒。自呼嗤鏤鄒。瞻言世外友。相期心不遐。揮斤郢匠室。流水子期家。披雲示駛月。拂果去空花。師嘆未曾有。君對無以加。清襟互默遣。所得非齒牙。層陰朋盍阻。

坐久丹霏斜。涵毫泚仙滴。抒藻揚晨葩。

水文疊石

曉波清蒼痕。厖激翠將腐。奔濤已東決。磊塊畱不去。巧匠取之出。入資園亭趣。陰罅嚙餘苔。寒凹逗輕露。彼怪予弗談。不轉吾所慕。

遠行

楚人巧悲秋。分作四種戚。最極有遠行。百感攢羈臆。林鳥戢和哢。屯雲獻慘色。客久歸念長。年驚壯圖窄。撫物盈近嘆。驅駢擁遙惻。曉斗亦告勞。垂杓臥樓北。

早秋有感

一葉飛足驚。要是變衰始。毛澤自茲竭。多露方夜委。涼蜩抱空號。腐燐變幽燬。怛然感物化。鬚髮不常美。羲和鞭白日。已復向濛汜。功名未及見。軒冕胡足恃。坐客憫予憂。粲然啟玉齒。輟嗟謝諸郎。長年行自爾。

讌集

素節倏已宴。高風送浮涼。拂席進賓客。醺酒羅壺觴。黃鷄跼跼美。紫蟹螯螯香。莫矜來歡早。須念後戚長。奔川無緩瀾。徂日不還光。願客且安坐。調絃未遽央。

水月



渺渺遡雲波。盈盈柅霜馭。碎璧擁舟來。流金映沙聚。夜寂波已休。何人薦真趣。

和君貺學士宿淮上見寄

使舲既邇迴。淮溜劇沿泝。我行非不遠。君節自前路。烟汰歷濠汭。霧氛逗荆樹。感此言邁情。慰予索居慕。日歸歸未辰。慘別別已屢。努力保素衿。天途遲還翥。

鈐轄冒上閣就移知雄州

聚散非一端。賢逸難兩遂。擁節北臨邊。安得久交臂。此行詎不遠。印瑞三且二。拜官領職自東閣以降凡兼五名背劍車。炙輠徑秦驂。舞轡雄州乃劇藩。喉領塞南地。譯通老上庭。道係單于使。適館授主祭。乘韋交客贄。列戍儼趨風。諸將走咨事。應變君所長。立功今可冀。君家誠易知。世烈在青史。齊楚異姓王。陰鄧后家里。券字金對行。戟帶霞交尾。濬源無近波。高峯本洪址。行矣勵壯猷。公侯當復始。

常山楊氏有二怪石奇險百狀田曹張中行家雒陽徧見都中諸家所得異石皆出此下予他日思之恐常人忽而不珍作詩以詫其處并邀中行伯逢同賦

塊然兩奇石。譎怪狀難悉。千仞裂嵯峨。一氣與嶒峩。四隅薜剝膚。萬古雲漬骨。補餘天所委。隕罷星不沒。橫蒼對偃蹇。怒翠競騰突。神媪祕弗露。狂鼈抃而失。由茲落人宇。得用玩奇質。屹如不可轉。挺若無所屈。鬪虎攫餘痕。乖龍臥殘窟。撐掉壯士槩。奮立直臣笏。危頂烟天矯。窄竇雷鬱律。濤頭縮不長。魑臂憤相猝。

變現載靈牒。呵護費神物。窮陬苦陋庫。珍碧恐湮汨。各保堅礪姿。以待封山日。

反騷

我聞上天樂。仙聖並游賓。離楚何所據。招回逐客魂。騷辭魂無上天謂門有九關。虎豹代守閭。砥舌饑涎流。觸之輒害人。譏呵自有常。帝意寧不仁。窮壤苦恨隔。傳聞恐失真。我欲稽首問。無梯倚青雲。塊然守下士。此憤倚由伸。

懷三封墅

寡求願易足。久計還中林。君恩容有報。宿留音留未抽簪。淺謀乏經濟。流景倏頽侵。企翰羨鴻羣。俯泳愧魚沈。榮名非不勉。高坻良可歆。奈何賈生慟。又將莊舄吟。投沙乃聞古。懷春方在今。三封何所懷。懷我東南畝。方春原田秀。是時簷笠聚。杏花燦晴落。菖葉甲陰浦。泱泱雲抱岑。眇眇林鳴扈。野老攜晨饁。薄醪間炊黍。安知五熟滋。但慰四友苦。日作夕還家。烟火青林下。嗟我仕易稼。窮年宦三輔。誓畢尙生累。將從平子賦。自省非大人。請事學農圃。

風雨

昨夜東風急。疎牕薦雨入。溪南梅正花。狼藉隨塵沙。皓皓多易汗。不得同春葩。春葩能有幾。紛紛入桃李。時哉小興衰。人生猶物理。明發簷沈聲。鳥雀喧新晴。老農脫襁屨。一犁原上耕。

秋興

西顛肅涼氛。天寓正岑寂。淒風條未吟。浩露林下滴。寥寥燕辭楹。促促蛩在壁。池潦湛寒綠。鱗雲屯晚白。齊紈不復御。桃笙已復易。嗟哉無壯士。翻車忽西匿。有客過我廬。問我何悽惻。氣索不能對。披襟長太息。

金雀花

疊葉倚風綻。翩翾凌霧排。齊名仙母使。寫樣漢宮釵。俗眼未應妬。忽憂珠彈來。

浮屠

乞食古爲恥。浮屠名自修。黎明抱應器。禺中飫乾餼。果腹固其願。之播非所羞。歉歉常不足。遑遑茲有求。素飽聊安坐。調饑復來游。顧爾殊靈輒。翳桑何用酬。

四季花

羣葩各分榮。此獨貫時序。聊披淺深艷。不易冬春慮。真宰竟何言。予將造形悟。

雜興

寒暑亟徂謝。日月如崩波。稚容不再妍。戚戚奈老何。聞有遯世客。安處西山阿。手操九籥契。晝夜養丹砂。藥成可化金。舉身凌紫霞。我願從之游。脫身此世羅。辦裝秣吾馬。臨路更自訶。古來松喬流。矜己好浮夸。萬一爲藥誤。得無我計差。速還具肴酒。毋爲後人嗟。

河東有賢守。帝念不能已。欲置之大夫。徵軺疾于水。畱邸月餘罷。君恩詎可恃。召以一人譽。去由一人毀。鉅平名世賢。媚者強相軋。毀語填君聰。亡吳計中奪。人生不如意。在十常九八。茲事可奈何。惆悵千載末。殘暑辭遙夕。初涼澹蕭辰。燕索西飛伴。雁作南來賓。霽巒靜蟲蟲。遠水清鱗鱗。由來搖落恨。先付長年人。

錦亭晚矚

長夏宜高明。緩帶散煩窘。憑軒一超然。目與天共盡。山從雲端現。日就林外隱。風來草樹披。烟生井閭近。自公況多暇。沖臆無畱蘊。卽此可宴居。何須事遊軫。

初伏休沐

伏時詔休偃。閉門謝朋儕。羲和挾升陽。晚氣紅崔嵬。炎林鬱歆露。焦原橫赭埃。怒甚峩峩雲。旱始隆隆雷。況我庇茨宇。煩襟安得開。囚拘訴巾幘。仇怨被酒杯。湯沐未及具。反爲蟣虱哈。北風硃杏嘿。羲人安在哉。

遊矚

顥風肅九旻。樓榭注明迴。林爽無剩繁。溪澄有餘映。四阿延清霏。六幕盡高興。號枝蟬腹厲。掠野鶻拳勁。山意日久高。差差插空淨。

送蔡元翰賢良昆仲

美箭出東南。之子哀然秀。綽綽令兄弟。茂器偕年就。九流無近討。六藝乃遐究。詔書求異等。二惠茲來觀。

牘均方朔多。輻比吾丘湊。蹠足蝮封場。刷羽桐花囿。孤音或少和。至寶不期售。肇允褰褐衣。薄言返巖竇。江臯看魚樂。山徑懷雉嗅。無忽豫章材。行參栢梁構。

送伊闕鄭著作

君年已艾服。沿牒困風塵。礪新始發刃。鳴晚逾驚人。毋辭滯下邑。姑欲慰斯民。此路塵車往。明年郊雉馴。恨乏雙鳧鳥。從子伊水濱。

攬鏡

晚匣寫菱影。試觀憔悴顏。支離骨不媚。蕭颯鬢垂斑。安得長康畫。致之巖壑間。

望月西廡作

夏琯倏已新。夕杓見南指。孤月霧中來。餘光淡前屺。賞襟初不淺。極睇天漢涘。浮雲竟未還。多露已徐委。太虛本自寂。遊氛強爲滓。安得千里風。披霄玩澄晷。

歲豐

皇天降豐年。本憂貧士食。貧士無良疇。安能得稼穡。工傭輸富家。日落長歎息。爲供豪者糧。役盡匹夫力。天地莫施恩。施恩強有得。

題信相院默庵

對言方有默。因默乃名庵。庵畱默不遣。一物遂爲三。龜掃泥中痕。正恐力弗堪。自問呵默者。了然成妄談。

感懷

夕風搜前林。墜葉快如剪。老月扣戶低。傾河去人遠。吉士感物化。勞勞意不展。輟飲屏樽杓。畱釭討墳典。觸事孟軻迂。臨途安國蹇。不歎歲月適。所悼功名晚。

念衰

歲月不待人。驅我向衰境。朱顏日辭貌。縞鬢颯垂領。意昏若坐霧。歡墜似羸井。病多茲及慵。志怯遂依靜。問我何功德。乃玷鷄翹省。始願常謬悠。薄霄圖振景。棧車值塞路。蹇蹇莫吾騁。君恩蓋如天。分虎向東郢。沈憂誠萬緒。通宵付耿耿。失旦安暇鳴。值露徒能警。私計狹且偷。榮路浩方永。惟餘昧死章。將露乞身請。

七言古詩

擬東武曲二首

甘泉烽火照黃昏。候騎駸駸入鴈門。光祿塞前逢夜月。黃龍城下見愁雲。隱隱輕雷逐車響。顏行使者樂相望。勞軍細柳尊亞夫。持節雲中赦魏尙。自從天子樂休牛。故障遺亭豈重修。李廣不生高祖世。豈得今封萬戶侯。

我家世世山西士。二十期門從天子。始隨驃騎破祁連。晚逐樓船下梓水。漢北雰雰飛雪暗。海中跼跼翔

鳶墜歸來武庫祭蚩尤。得從甘泉參豹尾。何意一朝兵後期。簿責侵誣屬軍吏。黃金納贖爲庶人。白首還家事田里。結髮從軍七十戰。利鏃金瘡猶可記。龍鍾雖入玉關門。止呵還遇灞陵尉。不及金張藉舊勳。七葉華貂長富貴。

少年行

君不見漢家五陵諸少年。白馬驪駒大道邊。紫綸裁帽映兩紐。黃金錯帶佩雙鞬。經過主第賜綠幘。歸宴前堂羅曲筵。長安多逐韓嫣彈。別藏仍收張氏錢。傳言天子將羽獵。千乘萬騎向甘泉。奉車金吾共馳騁。外家戚里見招延。徑去平岡馳狡兔。虛彎天際落飛鳶。竭來別館恣行樂。胡姬當爐酒十千。薄暮聊歸渭橋曲。明日復會黃山前。

天台梵才師長吉在都數以詩筆見授因答以轉句九關十八韻

九霞凝標倚霄極。爾時師在雲巖側。坐中不起見諸方。滿袖天香嗅薝蔔。海嶠嶰嶰萬佛螺。赤髭半領誰相過。卓錫時攀三宿樹。翻經詎著四圍馳。何年擲鉢來京穀。抱蓬成畦紫蘭馥。王公撤席爭逢迎。不意當今有平叔。第一多聞師子兒。碧雲餘力嗣工詩。盡把天光注言語。真將清氣入肝脾。有人官冷抱窮愁。客坐無氈塵影流。吃口倦談真寂寞。移書避事喜旬休。愧慙禪嫡來相問。刮目探懷授珍蘊。已輕安石爲老生。更惱王筠賦強韻。比來緇侶言頗文。局促啁啾寧足論。私地蛙鳴徒聒耳。長沙國小僅回身。惟師墨海

多雄藻。具足身中無欠寶。先追禦寇跨冷風。後伴騷人拾香草。跋子投報乏瓊瑰。日睇金園剩九回。籃輿  
盤珊兩生舉。定容元亮醉中來。

謝提點刑獄李郎中贈扇

規裁珍素裂輕雲。柄剪春篁燥叢露。製以爲扇持贈君。拂君懷袖祛君暑。蜀天六月苦炎歊。赤龍秋秋駐  
雲霧。火走膚脉汗若流。暗逗浮涼下天宇。畫作飛蠅緣誤點。徐隔游塵不成污。何以爲報我知之。奉揚仁  
風慰黎庶。

詠西湖上寄潁州相公

湖邊烟樹與天齊。獨愛湖波照影時。崖蔣渚蘋春披靡。佛樓僧閣暝參差。相君萬一來湖上。手弄潺湲更  
憶誰。

和賈相公覽杜工部北征篇

唐家六葉太平罷。宮豔醉骨恬無憂。阿鞞詬天翠華出。模糊戰血腥九州。乾瘡坤瘻四海破。白日殺氣寒  
颼颼。少陵背賊走行在。採梠拾橡填飢喉。眼前亂離不忍見。作詩感慨陳大猷。北征之篇辭最切。讀者心  
隕如摧軸。莫肯念亂小雅怨。自然流涕袁安愁。才高位下言不入。憤氣鬱屈蟠長虬。今日奔亡匪天作。向  
來顛倒皆廟謀。忠骸佞骨相撐拄。一燎同燼悲崑丘。相君覽古慨前事。追美子美真詩流。前王不見後王



見願以此語貽千秋。

羅承制自戎州罷歸

乘障一麾速出守。終更三歲今來旋。巴雲晨趣東北道。夔月曉背西南天。故人把酒數卷白。離亭贈柳長于鞭。屬羌羈詔久款塞。歸為天子細論邊。

高亭駐眺招宮苑張端臣

蜀天向臘寒未極。倚檻綿睇亭臯分。一萍團紅江上日。數葢淡白樓頭雲。杯中竹葉與誰舉。笛裏梅花那忍聞。願君枉步數相勞。他時離緒徒紛紛。

嘉祐庚子秋七月予還臺明年始對家圃春物作

十年去國老蒙召。今歲始見家園春。雙燕初來即賓客。羣鶯相逢如故人。蒙茸草樹延野色。碎瓊鮭菜供盤珍。多慙吾黨共醒醉。收得澤邊憔悴身。

登齊雲亭

少城西北最高處。憑檻極眺襟懷開。模糊烟樹鳥邊靜。突兀雲山天外來。歸檣櫛櫛逗淮浦。涼颺獵獵生巖隈。雖非吾土信云美。伴客留連傾一盃。



景文集卷八

五言律詩

太廟侍祠雪霽有作

喜雪靜氛埃。繁雲即日回。清光動冠劍。餘素著樓臺。樹雜瓊枝竦。途平玉轍開。惟應餘兩騎。知是海神來。

和吳侍郎朝謁天慶宮

上路鳴騶遠。叢霄故館開。華簪堯豸出。輕舄漢鳧來。探妙雲敷笈。蠲煩露溢杯。直須重締約。飛蓋一徘徊。

後苑賞花釣魚應制

清籟披蘭路。雕輿眷蕙辰。漢池平浴日。溫樹暗留春。樂石來威鳳。恩波上翠鱗。成文傳睿唱。賡曲徧華紳。

元會詩

寶典叢三朔。中闈闢九關。羣臣深拱宇。列仗儼屯門。輦出東房祕。辰居北極尊。熊羆連案負。日月傍旗翻。

奉和聖製清明日

璇杓臨乙位。羲御屆婁初。碧浪桃花湧。珍叢錦段舒。輪蹄晴縹緲。鐘漏夕虛徐。穆穆宜溫殿。披文日有餘。

晨赴書局

上直蓬山遠。輕軒截九逵。曉光銜睥睨。秋色靜罍罍。漸覺蘇裘敝。行嗟潘領衰。鷓鴣自有志。不羨帝梧枝。

和道卿舍人奉祠太一齋宮

素秋來藥館。瑞祝達霄晨。蘋薦祠無餼。樓居地不塵。擲波琴鯉樂。傍時漢雞馴。此際清懷極。盈杯沆漭津。塵氛不可到。深注五城樓。素瑟少今韻。仙春無俗秋。晨杯三秀潔。夜檠九光流。順報通霄極。紛綸瑞福遒。地占叢霄勝。人持禁橐來。詩長清夜徧。祠罷素秋回。爽籟天中發。虛絃月際開。無容以風解。身自到蓬萊。

和天休舍人奉祠太一宮見寄

順祝齋琳館。翛然隔世埃。空歌靈鶴下。祠節寶雞來。瑞木千尋竦。仙圖幾卷開。如無清夜唱。誰識帝車回。

玉堂感舊

七年辭玉署。再入佐黃扉。樹與青春換。人將素領歸。墀花仍可記。廈雀稍驚飛。爐蕙非無意。逢人尙襲衣。

旬沐二首

薄澣還私室。陶嘉屬小園。筍餘林嚮密。花後果初繁。燕口將泥重。蜂脾抱蜜喧。此時蕭散意。都欲忘乘軒。待詔官非急。還家體不動。里無休汝騎。牕有上義人。密樹稍迎夏。晚花猶及春。幽懷誰與晤。杯酒強相親。

學舍直歸晚霽三首

驟雨挫炎威。歸軒廣陌西。渠聲流作瀑。日腳側成霓。換錦龍媒埒。淹花燕子泥。比來巾角墊。李郭定相攜。

雨罷殘陽在。風微酷暑收。餘昏淡雲翳。聚沫泛河流。桃簟雙紋展。盤瓜五色浮。潘郎最多感。庭樹莫先秋。密霧披層宙。濃雲霽四溟。亂流初漱玉。紅日不藏萍。萬葉張晴幄。千山卓翠屏。無煩事鏡吹。蛙響自堪聽。

赴直馬上觀市

上直驅羸馬。凌晨望百廛。墟喧滌器市。簫暖賣錫天。流水隨輕轂。翻花送駛韉。區區市門吏。無復子真仙。

初到郡齋

專城四十外。中石二千餘。曠日慙良術。班春賴細書。學慵前志忘。身遠故人疎。姑俟天藏疾。雌堂日燕居。省分由來拙。操心本自危。十年今得調。三匝此逢枝。攘臂貪豐粟。裝懷倦訴詞。竹林誰見憶。迢遞始平麾。

初到郡齋三首

暫解樞機任。來從海上閒。浮雲富貴外。一馬是非間。月袞生潮浦。風香墮桂山。蒼生雖繫望。要作冶城還。我里誠云樂。公今況釋勞。秋葦不下鼓。霜蟹恣持螯。林靜來晨燎。江喧入夜濤。功成奮嘉藻。寧欲傍離騷。溫省綢繆罷。鄉州偃息時。鶴情歸不怨。鳳德老無衰。月樹供園蒔。仙囊續宴卮。自慙淮守薄。千里與言詩。

到官三歲四首

芳歲已三換。寵名仍再遷。平生一丘壑。衰晚右囊鞬。客眼登樓外。鄉愁把酒前。巾箱多舊賦。只是欠歸田。一忝中山守。仍班第四春。老應無所事。少尙不如人。適野愚謀短。將蕪舊產貧。須慙文二組。羈束最慵身。

儒帥非真帥。瓜時定幾時。丹心雖許壯。白髮不藏衰。苦密游鱗駭。山遙倦翼遲。歲成無奏最。準擬鴈門騎。塞下靜無事。軍中奚告勞。青山側身遠。白日舉頭高。作奏閒雙筆。流年耗二毛。惟應不能飲。元解讀離騷。

王孝伯曰。能痛飲酒。讀離騷。可為名士。

穎上唐公張集仙相勞

〔案〕張瓌字唐公。全椒人。以翰林侍讀學士知濠州。

去時成恨恨。喜見眼中人。共東西崑峽。唐公與予同書局。又相次得郡來。都為左虎鄰。年華衰意早。酒所故情親。後日孤舟遠。離懷怯重陳。

同張子春淮上作

南風今日好。歸棹上淮津。川迴舟如葉。山遙石似人。波光篙底動。沙壘漲餘新。誰信機心少。溪鷗伴此身。

思歸

去國條三歲。頗知歸思紛。南心曉城斗。北眼暮樓雲。珥筆行將脫。朝珂冷不聞。莫論持帥節。吠畝尚思君。

有詔換淮陽

比出淮陽守。今移寰內州。真無弱翁治。只是茂陵求。換節矜新假。循襟釋故愁。桑榆知未晚。前失庶能收。

次江都

道險疑無地。巖高欲近天。家收代田粟。民耕山上。一歲一代。官鑄卽山錢。山多鐵冶。州鑄錢。雲變陰晴候。林容旦暮烟。落花

真有意時解拂行韉。

江溜灘灘急。崖腰棧棧新。天深罕見日。路險不容塵。遠草資緣綠。幽花落漠春。逢津何必問。夫我自知津。

齊雲亭晚矚

山暝日云稷。天清風寢和。樹花紅暗淡。城草綠坡陀。歸艇衝烟去。昏鳥接翅過。年華無限樂。判作是狂歌。

惠民隄河晚矚

遠水同縈帶。聯隄類築垣。行舟壓天底。臥木擁沙痕。魴鱖逃空罾。鳧鷖泊迴村。層波真可羨。由此到都門。

九日至衛南

良辰獨據鞍。節物強相干。酒駐衰顏淺。風吹客帽寒。暫吟非有屬。倦曲不成歡。多謝黃花意。還如故國看。

鄭子產廟

不知東里叟。遺跡但堪尋。語愛東家淚。論交季子心。故墳猶有石。遺鼎遂無金。謬政爲邦久。千秋謝所欽。

疊嶂樓

州衙北城上可  
以望孤射霍山

霍射盤西北。高樓勝覽井。景閒思謝守。名重擬宣城。宣州疊嶂  
名在天下天闕雲來緩。風微鳥去輕。客憂銷更有。須

到此中傾。

去鄭暮次中牟

暮投京縣宿。氣象已紛羅。苑樹道旁密。侯田關內多。高城切星斗。秋水似天河。自問還臺馬。猶餘幾子珂。

廢鄭河

民間呼此名。或曰即古洧水。河蕪塞。惟春夏汗潦所集。

當年食溱洧。鄭國語。主菜。魏而食溱洧。此地控長津。卻見爲陵日。難尋病涉人。落霞遙送鷺。荐草暗留麀。代往詩風變。

田渠數報春。

宛丘作

宛丘真善地。承詔幸班春。鈴下聽無訟。日邊來有人。吟餘多感客。睡足本慵身。蟻蝨休相賀。吾今湯沐頻。

望漢江

西導岷源闊。南浮楚望開。弄珠嫌蚌隱。投壁讓蛟迴。岸翠山烟逼。波紅日影來。萬艘徒擾擾。誰是濟川材。

次劍門

昔驅千騎往。今解五魚還。誰憚老銷髀。自憐生入關。春風來迴野。曉斗掛空山。卻整康成帽。依然愧賦顏。

隴州魚龍川石魚

織鱗藏介石。物化自何年。無復西江水。長依東海田。苔紋堪代藻。雲葉卽成蓮。琥珀藏蚊影。佳名共此傳。

次梓潼

行行芳序深。秀色媚諸岑。早葉易經吹。暖雲難久陰。擁條孤狖嘯。戲荇一鳧沈。不是無樽酒。其誰共獻斟。



張亞子廟今封英顯王

偉哉眞丈夫。廟食此山隅。生作百夫特。死爲南面孤。鹿庖償故約。雷杼驗幽符。潼水無時腐。英名相與俱。

敝俗

陶姚民屋富。梁魏敝風存。士闕游卿校。人爭倚市門。椎埋時結客。博掩競成喧。誰與遷荼堇。移甘撫臙原。

城外

次舍梁陳外。風烟周鄭間。徐驅四郊路。徧識屬城山。野雪融殘素。岑霞就暝殷。幾宵星影動。知伴傳車還。

題蜀州修覺寺

蜀嶂紛重沓。祇園隱寂寥。花供法界雨。江助梵音朝。海水聞鐘下。天風引磬遙。少陵佳句後。物色付吾僚。

杜子美詩刻今在

巡視河防置酒晚歸作二首

古戍連沙曲。層阿屬岸隈。天長倦鳥沒。山晚跛牂回。斜日低官樹。輕寒犯客杯。還城聞暮角。三疊落江梅。夾石雙隄轉。逍遙千騎留。川昏多晝霧。水落足寒洲。岸石危相倚。橋澌暮不流。風烟非渭曲。誰有釣璜鈎。

轉運彭季長學士小集數辭宴集

此日疾爲解。遂將杯酒疎。多愁庾開府。苦瘦沈尙書。倦曲琴僮後。霏香藥裹餘。莫令詩思劇。正是落花初。

比見告中有  
詩書感槩

送張法曹

駛騎柳枝鞭。春遠望雒塵。賦才賓在俊。掾諾府中賢。宮楯含櫻密。王渠泛醪聯。勝期資一笑。刑矢措周年。

送呂太初法曹之許田

時相國彭城  
公鎮許田

秋涯艤客臚。潘鬢不勝梳。去決卿軍事。還親城旦書。驛鴟啼月早。庖鯉躍冰餘。白晳公庭步。翹材首曳裾。

農歌

農歌非度曲。新樂信蚩蚩。迺父知田事。吾王采諺辭。折楊時動笑。鼓腹自成嬉。日暮牛童笛。連聲下遠陂。

初宿東閣追憶文簡丁公作

〔案〕宋史丁度傳  
度字公雅謚文簡

辭閣玉堂東。依然昔所從。

予慶歷初入翰林公雅為承旨獨  
與余更直凡歲餘予以避親罷

舊池空嘆鳳。

公雅歲餘  
進歷二府

殘友不成龍。制藁流

塵積。博花駁蘇重。過車三步約。何日醉瑩松。

三司晏尙書西園玩菊

涉園求勝賞。時菊豔秋光。散漫仙潭餌。離離瑞鵠裳。酒熏吹晚葉。蜂冷抱殘香。公意周盈感。留杯盡夕陽。

玩齋前菊

高秋玩佳菊。繁采照前除。似粟金無算。為裳鵠有餘。不甘興惹謗。長免共蘭鉏。為爾浮罇酒。非邀栗里輿。

望僊亭書所見

危軒冠層堞。永日付登臨。寒鴈猶能陣。喬柯自不林。溪流橫趣島。樵路側依岑。西北雖堪望。浮雲易作陰。  
南國冬無雪。居然氣候迷。柔蔬傲霜甲。幽鳥逆春啼。神鼓聲無歇。樵歌韻不齊。舉頭看白日。還過太山西。  
和楊學士同晏尚書西園對菊

歲秋無異卉。佳菊自成妍。薄采稱觴客。繁開落帽天。抱池閒沮洳。畱蝶小翩翾。爲結胡公賞。并懷酈水邊。  
尚書詩有并懷  
過舊玩之句

東亭

左圃魚鱗闊。前軒輦翅開。虹將一雨罷。潮送萬艘來。山淨秋妍露。林虛晚籟回。此時蕭散樂。誰奉醉言杯。  
隴西都尉禪會圖

宴場禪集盛。霜幅繪毫工。竺社同開葉。嵇姿宛送鴻。法身甯滯相。世眼願瞻風。廚鑰方傳寶。非專巖壑中。  
善惠大師禪齋

丈室傳心地。安閒歲臘賒。水能涵寶月。風解去萎花。鵲焰紗圍短。牛香篆引斜。化城無憚遠。門外卽三車。  
晚夏北軒

暝崦霞霏罷。嚴城鼓疊通。梧陰破階月。筵吹亂林風。浩露來無際。明河望若空。玉繩低影處。知是建章宮。

呈胡希元進士二首

離邦嗟病免。道舊樂明簪。刻畫忘齊醜。膏肓倚鄭箴。軒鴻遡霄路。和鶴答溪陰。爲薤求羊徑。時容一往尋。  
煢煢官綬解。落落飲瓢空。君惠容藏疾。交情助諱窮。倦談嗟墨客。掉首觀鴻蒙。已卜良鄰計。無憂吾道東。  
贈罷征邊將

罷征光祿塞。初入玉門關。殘月邊兵盡。寒風壯士還。旗光侵桂卷。箭鏑半星閒。歸賜將軍第。長銘寶憲山。  
惠泉

遙源辭疊嶂。澄派鑿晴虛。流迅無汾惡。波長盡楚餘。隱之徒酌水。鄭伯謾名渠。不必西江去。憑君起鮒魚。  
寄沂州王學士

舊租丞相國。新治使君州。坐樹貪循政。懷鉛倦雅遊。猿驚鄉嶺樹。蜃結海天樓。誰見行春盛。東方最上頭。  
途中新歲憶三城兄長相公

馬上逢元朔。忽忽記物華。趁盤呈柏葉。偷筆弄椒花。臆暝殘晨炬。春暉上早霞。三城今日酒。知我獨思家。  
入壬辰新歲

五十爲衰始。仍餘五歲衰。雙眸不明鑑。殘鬢已紛絲。銅虎雖頻剖。荷囊信濫持。何須依老格。新詔七十不致仕許有彈  
先作故山期。

送餘姚尉顧洵美先輩

蓬葆已蕭蕭。從官越絕遙。山圖禹穴近。濤氣伍神驕。臥帳藏新論。舟行問故樵。寄聲時謝我。江上足蘭苕。

送張士安同年赴上元尉

千名聯唱第。一尉滯徒勞。山入黃旗國。江浮白鷺濤。苑葩依日晚。官樹共秋高。少賦思歸恨。潘才是二毛。

同賦飲舫

飲有乘舟樂。舟因得飲名。能招習池客。便載景山鎗。暫擬畱顏玉。徐牽倒醉罌。莫辭沿泝遠。雙楫自逢迎。

閱古堂

〔案〕宋朝類苑韓魏公知定州作閱古堂後子京知定州有樂歌十闕此首疑即其一

堂皇對岑蔚。歡酌坐怡然。蟹美持螯日。魴甘抑鮮天。楊淵五湖賦連沉抑鮮〔案〕芥隱筆記作鱸香抑鮮天渚翹幽處鷺。林響靜時

蟬。老去興非淺。無妨清夜旋。

胡寅赴明州慈溪尉

久困天官調。東南亦第如。客篙新溜急。春樹雜花餘。越隴豐池鴨。吳袍競庫練。還音與歸夢。併附淞江魚。

孫景赴懷寧尉

一行爲吏日。千里背淮人。蘭助朝昏膳。絲垂宛轉綸。雲容侵驛曉。江態引帆春。靜治龍舒邑。鼇生盜向秦。

送王鼎同年尉滎陽

氈毫聯署榜。蘭酒悵離杯。作吏緇衣國。工吟白社才。浮涼御風至。澄翠溢榮來。盜息連殊課。章封刺吏臺。  
奉節朱尉

初命東南尉。征途上下弦。傳家萬石貴。結綬半綸鮮。邑籍饒岷芋。公囊滿鄧錢。仙才今有助。銘閣待新篇。  
送靜海勾稽高洎

豪錐殘試墨。綸綬照恩裳。沿牒天官調。承家父任郎。曲長溪舫遠。宴密酒螯香。得助江山國。仍縫古錦囊。  
送倪敦復朝奉

倪侯喜清曠。遇物乃虛舟。富貴知輕視。胸懷肯誤投。青雲非近器。滄海納羣流。道在從藏顯。功名晚可收。  
寄王共

沸蟻雲壘溢。離鷗雪苑開。吏催東府計。卿待楚人材。舊隱周蘿月。前期禹鑿雷。我慙芳歲晚。猶俊蹇修媒。  
寄葉道卿

懇乞東南節。貪榮綵繡衣。禁中嚴助往。江上子牟歸。併覺秋萸美。時驚夜鶴飛。遙知具雞黍。日與故人揮。  
秋霽二首

曉河迴北陸。夕雨淨西郊。水足魚忘煦。林寒鳥戀巢。閣苔浮綠暈。社橘老丹包。誰與同真想。清風是淡交。  
氣爽無餘暑。天高不住陰。霞殘仍是綺。風冷卽名金。烟沼雙魚樂。霜郊一鷄心。此時靈運唱。無復答愁霖。

玩晚菊

佳節雖云晚。繁英尙獨開。新醪相伴熟。寒蝶不空來。細折愁香破。長吟恐暝催。自嫌霜白鬢。將插重裴裛。

殘秋霽景

霜旻初畢雨。日氣上熹微。寒水流無急。高雲薄未歸。書閒仍積篋。琴燥乍移徽。負郭泥妨轍。翻勞急掩扉。

冬日呈應之

〔案〕應之即吳感。吳郡人。

賓席滿浮埃。勞歌倦撫懷。囊風寒薄木。鷗雪夜平階。莊室虛仍白。顏心靜已齋。北山如借問。矯首謝丹崖。

秋夕不寐

械械始遙夜。騷騷無寐時。啼螿思歲晚。寒葉伴人衰。白髮生將遍。丹砂化苦遲。多情是殘月。通曉共遙帷。

冬日野外

霜郊堪極目。萬籟共騷騷。遠水無窮綠。寒雲自不高。候鴻差入渚。田雀短翔蒿。歲稔期民阜。中田饁凍醪。野迴人來少。天平鳥去長。魚梁四寸罟。樵市王家漿。谷轉畱寒霧。霞休罷夕陽。不須教目極。卽是到迴腸。朔吹低凝野。層陰迴匝天。葉飄霜外柳。烟出燒餘田。晚晚流芳後。嶢嶢急景前。平生魚鳥志。寧免爲留連。

行春野外

綠野陽膏動。春旗出曉衢。川長羅後乘。林轉隱前驅。早蘂紅粘杏。輕苞紫綴榆。桑郊不敢問。直爲使君愚。

贈文雅度大士

高臘領鬕霜。棲閒寄寶坊。祕園金側布。薰夾字旁行。賜服恩華重。分燈祖意長。祇陀學久徧。餘力在雕章。

守歲

已覺新杓動。猶聞促漏餘。夜寒窮臘尾。春色併年初。事往成追計。身羈況索居。明朝爲壽酒。無奈故人踈。



# 景文集卷九

## 五言律詩

### 歲晚私感

已嗟官落魄。更值歲崢嶸。一絀區中累。千慙谷口耕。休文偏恨瘦。夷甫太鍾情。借問長安米。侏儒有底榮。

### 送同年葉文卿尉高郵

檜楫艤河滸。東南再命新。還家倦游客。隱市謫仙人。驛舍霜梅早。鄉壺蟻酎醇。時君復過疎林搖落盡。持底贈蕭辰。

### 春晏病體少悵退臥北齋有寄

小有負薪疾。早成憔悴姿。無人來迓跛。賴酒與扶衰。樸斲知林短。腥膻厭席卑。西山一丸藥。何忍獨相遺。

### 殘花

林下感餘歡。流芳逐雨殘。香歸蜜房盡。紅入燕泥乾。夢短休成蝶。腸迴卻掩鸞。故應成異果。持去擲潘安。

### 王秀才贄賦乞詩爲別歸毗陵

矩步敝長裾。清漳訪病夫。得交欣鳳舉。賞賦怯霓呼。道勝稽論秀。人遐亟去都。一篷江上雨。歸思滿菰蘆。

春郊曉望

睡足猶欹枕。歡沉卽掩樽。風花飛有態。烟絮墜無痕。野色兼山遠。溪流漲雨渾。淵明有歸意。惟是對桐孫。

送王識游洛陽

上京漫客刺。西道摻離裾。天倚呼嵩外。川橫鬪穀餘。敝褫琴晦軫。行笈簡聯書。卻見槐花候。期君促計車。

僑居二首

抱病苦幽憂。都城困勸游。身拋禿翁版。言入稗家流。世路風波惡。天涯日月遒。危心正無泊。持底喻窮愁。

春晏北園三首

春物在無幾。景隨人意閒。筍生迷塢缺。花盡失林殷。墜絮來何所。輕雲久未還。持杯問流照。肯信有朱顏。

屏居寄獻侍講孫尙書

僑版農塵陋。飛灰歲琯周。危疴負薪困。生事播精求。雨露遺幽谷。乾坤占一丘。惟餘道邊樹。獨爲報春遊。

和丞相小園雨霽

霽碧凝天宙。規紅轉日車。鵲輕來燥枿。蜂濕抱寒花。林果高仍在。菹菘晚自嘉。須知窮僻處。要是鄴侯家。  
送人歸衡陽

別曲慘鷓鴣。沿湘望翠微。人從南浦別。客向洞庭歸。曉鴈并蘆遠。宵禽負葉飛。還家落秋後。社橘老金衣。  
松

冒雪虬枝密。凌空塵影勻。葉傾秦帝雨。華老宓妃塵。不見棲鸞客。多逢繫馬人。寄聲遭匠石。千尺謝輪囷。  
聞蟬

秋風日夕驚。庭樹喝蟬聲。衰意先鶻馱。繁音伴沸羹。斜陽掛高柳。落日淡遙城。此際君懷苦。非徒客子情。  
聞蟬有感三首

初聞蜀樹蟬。含喝晚風前。便把淒涼意。催成搖落天。易驚惟遠客。所得是流年。空腹悲何事。繁于五十絃。  
殘蛻拋何處。新聲集迴枝。歲芳鴟後妬。露信鶴前知。風塢嘶清御。霞梢咽暝規。此時兼一葉。併助長年悲。  
勞君驚暮節。助我思流年。擘若橫吹管。繁如未破絃。城殘嘶外月。林暝噪餘烟。塊坐秋風裏。潘郎鬢颯然。  
遠行

平原已超忽。山徑亦紆餘。匹練迷征馬。孤蓬伴客車。江楓極目外。隴水斷腸初。行行不顧返。秋露沾人裾。  
夜緒

炎氛歇層寓。清氣肅重帷。籟遠天人雜。宵閒甲乙遲。漢制有甲乙至戊夜江湖牽客慮。日月與人衰。經國謀安在。悠悠空我思。

幽禽

已伴傳書燕。休隨匝樹鷗。春鳴變高柳。暮散落餘花。格磔林烟迴。啁啾觀月斜。寧同七十二。鎮在莫愁家。

集江瀆池亭

五月追涼地。滄江剩素漣。林烟昏午日。樓影壓池天。篠密工迷徑。荷欹巧避船。機忘更何事。魚鳥亦畱連。

出郊

茂草平堪藉。長楊綠自垂。郊晴艾帳遠。橋迴犢車遲。有鶴迎飛蓋。無蛇賭賜卮。秦樓何用識。馬尾結青絲。

清暉亭

亭外大江流。亭前萬里舟。春波賦別地。秋水送歸愁。客路風烟闊。年光日月遒。瑤華何所爲。從古伴離憂。

不言

不言非巧宦。要是乏高符。託社天教散。爲公谷與愚。桂枝懷隱樹。荆葉戀歡株。榮路多高足。爭傳八列呼。

朝天嶺

天嶺循歸道。征旗面早暎。灘聲逢石怒。山氣附林昏。谷轉如禽哢。塵交作馬痕。萋萋芳草意。無乃爲王孫。

讀張巡故事

叛將闕華日。英臣死節年。城當勁兵處。人甚綴旒然。直木摧貪隧。長隄制盜泉。羯塵雖覆馬。不污沛南天。

兔

脫兔馳岡地。飢鷹厲吻天。爲煩麋狗顧。遂給獸人鮮。狂目兼槐落。驚毫共月捐。可嗟多狡穴。歸肉助庖羶。

江休復潞掾

君家能賦別。釋褐重凄然。客袂移緇素。離杯並聖賢。坐曹煩折獄。奏牘竚懷鉛。十載青袍困。須饒草色鮮。

同年李宗太平法掾

俊名參吏啟。掾事補編堂。盡取黃金酒。重紆碧鶴裳。佐庖鮭菜厚。束帙祕廚香。認得公庭步。鬢鬚白哲郎。

答安陸龐掾

囊文嘗奏御。軍事此參卿。座隘升堂友。鄉榮乞墅甥。清言飄塵毳。慎疾搴芝英。談幄尸官久。煩襟怯報瓊。

出城暫憩林下

下馬清林下。儵然忘俗情。山禽不辨種。溪草盡無名。露笋披斑箬。風葩抗紫莖。徘徊漱巖溜。未忍濯塵纓。

林下

林下追涼久。山西反照初。蘭苕香自怨。蟬腹飽猶虛。李暗傾冠外。基殘折屐餘。蕭然臯壤樂。何必羨池魚。

南國

南國豪華地。東風駘蕩天。露蘭薰夕夢。烟柳重春眠。歌斷雲空度。書長燕未傳。吟成休自許。芳草更緜緜。

送鞏漢卿同年赴五原理掾

再赴天官調。仍還多士鄉。華陰餘霧散。光祿故垣長。春柳侵湖綠。秋雲際幕黃。片言民訟息。編美冠州堂。

馮彭年蘇州法掾

竹箭征艫駛。驪駒客袂分。倦游銷仲產。參事厭卿軍。象闕天中隔。鄉朝月外聞。西山朝氣爽。拄頰待談雲。

吏上

吏上重門鑰。樓喧疊鼓搗。翠沈遙嶺樹。紅斂暝蕞花。杼促蟲聲急。眉拖月魄斜。煩心銷熱盡。不待鎮嘉瓜。

曲幌

曲幌囊風入。前軒峽雨收。醉羅初解夕。珍簟暗知秋。衰柳金城恨。幽蘭楚國愁。更堪聞短笛。珪月在西樓。

林缺

林缺榛苞綻。溪平芡觜開。衰烟稍辭柳。寒雨併饒苔。天意淒淒早。鄉愁袞袞來。此時論四戚。方驗楚人材。

送朱十翁

手把臨渦酒。人歸如夢城。何言一歡笑。便作兩離情。園樹丹蕤老。家山鈿髻明。不妨還軫促。芝崦趁春耕。

司馬相如琴臺

故臺千古恨。猶對舊家山。半夜鸞鳳去。他年駟馬還。死憂封禪晚。生愛茂陵閒。惟有飄飄氣。仍存天地間。

黃孝基歸上饒

街微曙。琴喧。行人岸。艤船。杓星背。城隱。萍日過江圓。霧晦書囊竹。塵昏劒室蓮。他時漢廷用。未減賈生年。

送謝處士南歸

歲晏心無著。時清道更肥。江蓴縈箸滑。海鳥傍帆飛。鄉思生閩霧。吟懷入楚霏。趨庭多令子。綵服間荷衣。

登望臺

年華無限景。況復上高臺。曉氣先明樹。春寒不著梅。幽禽仍早囀。戲蝶卽雙來。此地流霞意。同誰一醪杯。

連秀才東歸

烟樹徧雲中。迎君馬首東。鳴雞關下曉。歸鳥漢陽窮。勸客辭城闕。深耕託灌叢。還將數日惡。故故惱衰翁。

謝安曰。中年以來。傷于哀樂。與親友別。輒作數日惡。余年踰三十。多難早衰。竊用自況耳。

徐帥北歸

舊國青山闊。仙巖綠桂春。金壺柱史客。玉札上清人。學霧應成市。冷風肯待旬。他年畱半劑。牝谷願凝神。

北歸

一水清波駛。還將檜楫歸。纓綉成素濫。猿鶴恐長違。斗外城隅出。雲端闕影微。定知朝夕鳥。卻望漢臺飛。

宣徽太尉鄭公挽詞二首

祕幄畱高議。雄邊倚茂勛。風流自南國。禮樂得中軍。臥疾初無損。遺忠忍遽聞。寢門今日慟。長作死生分。誰爲云亡恨。曾無可贖身。江山歸國路。桃李泣蹊人。追冊君恩厚。題功史筆新。所嗟經濟事。不及相平津。

肅簡魯公挽詞四首

〔案〕宋史魯宗道字貫之。諱人。參知政事。即魚頭參政也。初謚剛簡。改肅簡。

拂世謨謀盛。端朝載采熙。上前推汲直。天下詠曹隨。密啟多焚草。加飡饜嗜葵。不圖霜露疾。奄忽喪元龜。震邸陪翔鳳。天壇侍祭牲。參謀大丞相。別對小廷英。上棟方隆國。頽山遽奠楹。武公年不至。輔德是功名。憂國神無愛。呼醫體寢臞。人憂一臺坼。帝遣兩騶扶。臨視回襄御。遺言入舜謨。七兵榮贈冊。沉礎賁龜趺。密勿千齡旦。生平三命恭。承家男得鳳。擇壻女乘龍。鄴邑窮遺產。邢山卜素封。空餘弔客淚。傾海望長松。

王沂公挽詞三首

盡瘁辭當國。均勞得偃藩。幄中畱祕畫。天下滿危言。日企還三事。寧圖闕九原。誰將河海淚。一灑問乾坤。下閣成憂疾。飛郵走詔醫。遵鴻徒望渚。浴鳳不歸池。宣室君朝罷。翹車客涕垂。正應廊廟上。畫一奉蕭規。娶路風號野。松阡水溢榮。滕君今見日。傅魄上騎星。詒訓金籊滿。圖功籀史青。空嗟令君坐。千古掩餘馨。



自樂顏居陋。非論晏市囂。西山宜託疾。東路便歸樵。穴邃狐情樂。巢完鳥意遙。居然深隱去。寧待左生招。

太冲有  
招隱詩。

### 訪隱者不遇

青蘿白石扉。霞薄動春暉。鶴去書空在。鳧閒鳥自飛。驂鸞僊馭遠。出岫昔心違。拂衽雄風動。猶疑禦寇歸。

### 退居五首

干祿非三釜。躬耕戀一丘。才無作奏巧。窮有著書愁。雀噪門羅晚。蓬飛鬢葆秋。平生鷗鳥志。未去戀滄洲。  
貧極非關病。憂多信自傷。悲歌一頃豆。驚饋五家漿。擁耒宜耕石。沈鉤豈爲璜。中林環室在。開徑望求羊。  
昔愧公車牘。今投海岸簪。逢齋還忌熱。居陸更憂沈。楚岫偏藏玉。燕臺豈乏金。前途見楊阮。只是有沾襟。  
利固慙龍斷。長非累繆牽。難求迎鮒水。空望戴盆天。喘急常悲月。驚多遂惡弦。誠非窮者歎。民頌正堯年。  
勇退方藏密。營生信有涯。千株素封粟。五色故侯瓜。虞骨誠非媚。潘毛故易華。履穿誰復問。新進競青緇。

### 詠苔

雨牆蒼暈合。烟渚碧紋通。賦閣并塵掩。詩階伴藥紅。萍流煩結實。絮亂枉因風。少闕回腸恨。春閨隔歲空。

### 南齋二首

隱有山林願。閒非江海身。孔書罕言命。莊意闇同人。敢銜能鳴鴈。須慙不獵鶉。緣何無麗句。多病極漳濱。

曩宦緣三釜。今歸一分丘。杯棬非柳性。塗尾是龜謀。薪意矜來仕。瓜名託故侯。恍然桑下計。蠶妾詎相尤。

哀故文節公

〔案〕宋史列傳。張知白諡文節。

早傳黃石系。未伴赤松遊。暴疹驚牀蟻。深恩賜養牛。谿璜俄碎玉。川楫遂藏舟。蕭相今無嗣。夫人紹鄴侯。順采思忠藎。宣謀歎巧勞。慙遺無一老。投弔剩三號。撤奠哀笳引。追榮斂袞褒。欲知憑厚慶。弟覽得傳刀。霜露纔嬰疾。龍蛇已喪賢。神騎尾星次。家託寢丘田。長樂申君弔。東堂罷襖筵。佳城白日掩。從此卽千年。

章靖馮公哀詞

華殿推名學。南宮重亞卿。心無二何佞。身有兩龔清。歸沐賓綦鮮。幽通筆思精。邦人爲公恨。不見相承平。讀易三編斷。當朝萬事知。由來不語怪。何意遂無兒。酒德歡長絕。書林藁尙遺。異時逢玉尺。方爲阮咸悲。皖簣綿疴革。中楹奠夢還。絕儀猶在野。書副卽藏山。友酌生芻潔。君恩刻印頒。一朝交臂失。寧復易睎顏。風旌引素轅。歌紉遠猶喧。此路成千古。何人歎九原。未亡鍾淑儷。不朽寄空言。兄子今爲後。春秋無餒魂。

光祿葉大卿哀詞

八十浮齡盡。三千去日長。叢蘭秋寂寞。卿月夜蒼茫。里友歌迎紉。州民酌續漿。英魂知所託。橋梓藹成行。偃息朋三壽。生平定四知。鄉人榮衣繡。光祿號能詩。未赴安車召。遽成埋玉悲。方珉紀遺愛。無誑冢中辭。

辨才少白師歸天台

壤色擁行肩。南方應有緣。歸艤素車浪。寶屐赤城天。宴樹春園密。談花晝械鮮。憑師無閔智。呵黜二宗禪。  
自南北異宗。學者多尊師授。以喪祖意。惟仁者尙圓成一案耳。

懷滕祕校書

解職青袍困。驚年素髮多。囊中彭澤米。門外下邳羅。露鶴驚霄島。風蜩喝暝柯。此時潘簞冷。爭奈近秋何。

送黃祕校書

妙齡看試牘。共嘆俊登喧。十載重來調。猶參軍事煩。吳艤沿迅溜。京炙伴芳樽。東觀他年選。當求江夏孫。



景文集卷十

五言律詩

公會亭

日下炎氛歇。風生涼意添。樹花閒纂纂。樓月靜纖纖。倦綆仍垂缶。昏鈎半上簾。畦瓜已堪摘。納履自無嫌。吏罷得休沐。襟懷蕭散中。靜時飛蝶夢。閒處上皇風。稚篠因依碧。疎花磔索紅。素餐無所事。天幸一衰翁。

和小飲

天齋暮雲消。飛觴夜正遙。洛吟聊擁鼻。陶舞惜廻腰。露曉蟬嘶樹。河秋鵲映橋。客歡殊未幾。離恨又霞朝。

夏日江濱亭小飲

飛檻枕溪光。歡言客徧觴。暫雲消樹影。驟雨發荷香。辛白橙齋熟。庖刀膾縷長。蘋風如有意。盈衽借浮涼。

朝陽

縮宿沈榆彩。滄溟轉若華。纔晞漢盤露。便映洛神鴉。鳴鳳梧岡迴。桑柔桂籠斜。照梁休自許。城上已啼鴉。

唐李衛公廟

斯人天挺傑。賊膽畏膏肓。疾戰江陵破。長驅頡利亡。成功在不伐。垂烈付無疆。血食雄京輔。于今異姓王。

夜出溪上

隴首孤雲斷。坳塘綠水周。螢光不欺夜。蟲織自悲秋。早鴈離離度。歸舟泛泛流。萱蘇共搖落。底處是忘憂。

秋晚溪上

積水增波潤。蒼霞變露餘。斷煙隨鳥遠。寒葉向人疎。萍老猶迎日。蓮衰尙戲魚。臨川方病涉。誰借鄭卿輿。

出城所見賦五題

二月雨堪愛。霏霏膏澤盈。添成竹箭浪。催發杏花耕。迥濕風頭冷。微含日腳明。居然嘉應在。誰是束長生。

二月水堪愛。泮流清復渾。影深天在底。紅亂日搖痕。鶯沒小舟度。魚噉新藻翻。有人無限思。慚愧仲長言。

二月花堪愛。全開未落時。香輕長抱蕊。霞破卽團枝。舞蝶何曾定。流鶯不待期。勞君金縷唱。更盡拍浮卮。

二月草堪愛。一番芳意還。遠迷天泱泱。低隱雉斑斑。細雨鮮原潤。東風古道閒。王孫歸定否。持問桂枝山。

二月風堪愛。悠悠天際生。向空鳴籟細。乘暝作寒輕。拂水紋層浪。穿條杙紫莖。煩君期素魄。相伴倒春清。

重葺敝廬有作

屢市喧卑極。家林改築初。藩傾猶置筆。楹破尙逢書。徑草臨江府。園畦洛涑居。憑誰遣真意。仁義亦遽廬。

華州西溪在路左百步

山近重嵐逼。溪長匹練分。霽波平撼日。寒崦側藏雲。溪側有松崦中隱佛祠弄荇魚差尾。投汀鷺列羣。如何去尋丈。

塵路已紛紛

送客

西出都門路。橫參送客鞍。低雲能作暝。輕吹不成寒。天勢高無極。原姿秀可餐。長年傷別甚。作惡叵能歡。僖宗在蜀諫官孟昭圖上疏言田令孜屏書不奏沈之蝦蟆津詩人鄭谷傷之略曰徒將心許國不識道消時予欽其人作詩投弔

密疏卽儲胥。指言刀鋸餘。難排趙高鹿。竟葬楚江魚。憤魄棲長瀨。冤氛犯太虛。無人抉君目。他日見誅除。

李九言寺丞知懷安軍金堂縣

雲棧馬蕭蕭。銅章庇邑遙。晨暉碧雞路。春色錦官橋。美政方宣布。斯人舊富饒。早須飛兩鳥。歸趁漢家朝。

挽張元常葬母夫人二首

象服流恩貴。輕輿就養榮。新成大家賦。經餉穎封羹。過隙誠難駐。藏舟自不驚。子賢能順禮。三月耐佳城。嬰病曾無苦。期頤未滿年。風酸吹棘地。露泣採蘭天。庀具藏分澤。張琴委暗絃。江流終不竭。懿範此俱傳。

遣吏視諸公塋樹回有感

文正王丞相

〔案〕宋史列傳王曾謚文正

兩朝推巨德。萬務罄斯猷。漢日左右手。堯年忠孝侯。名言天下滿。故事省中留。宸篆旌碑首。刊文又幾秋。

予作碑陰述其事

文靖呂丞相〔案〕宋史列傳呂夷簡謚文靖

慶歷公三入邊陲擾太平。啖金真間敵。撓呼高酒不寒盟。上印情雖切。公被病求退不許然髭病遽輕。上剪髭賜公服之病

愈。惜哉天弗憖。宸幄淚先橫。公計至上在崇政殿聞之對東府長慟

宣獻宋公〔案〕宋史列傳宋綬仁宗朝參知政事謚宣獻

昔去勸明辟。明肅朝公勸還政俄歸參大鈞。公孫未及相。諸葛已傷神。名待天淵蔽。文爭日月新。英魂同玉樹。不

向土中春。

文惠陳丞相〔案〕宋史列傳陳堯佐謚文惠

巖廊號元老。禮數盛中台。萬石父子貴。八元兄弟才。新詩玉可扣。奇隸鵲爭回。今日看碑字。真緣灑淚來。

答客

賤子空虛甚。何煩跪自陳。摧藏不鳴鴈。排迕後來薪。櫛短三秋髮。途奔四海塵。安能得所欲。況是數奇人。

送同年吳毅尉烏程

蓼蓼報曙天。歸趁越人船。闕月長留夢。吳門自是仙。漆書多汗竹。圭祀有名田。剩著凌雲賦。囊帷待奏篇。

送王庾



土甌殘炊黍。津航促扣舷。雲迷孝王苑。星認太丘躔。破瑟弦鷗舞。吟囊錦獸鮮。晚淮他夜月。離思共娟娟。  
捲客衣空化。求知刺欲漫。孤飛回鷓路。別淚溢鮫盤。待舉秋槐老。承顏夏枕安。新篇時寄我。魚信接長瀾。

送祝熙載

昔誓繻仍在。今行綬已新。春鶯得遷友。夜鶴怨歸人。君便道家山。故及斯句。倦枕低潮月。征帆截渚蘋。清時偏樂職。

寒鼈佐吳醇。

寒食日送李公佐歸漢東

有客改南轅。春郊駐祖筵。罇寒禁火國。風暖浴沂天。茂草平無際。殘花慘更妍。鹿鳴偕計近。簪盍約初年。

送連庶

之子遠參卿。勞勞千里行。素衣因客變。華髮看秋生。遇鯉頻爲訊。逢蓴試作羹。塵埃半通綬。何地免將迎。

送陳動之

綈帙拋蓬觀。軍牙佐柳屯。伏熊均軾寵。睡貉襲裘溫。睢苑寒雲隔。漁摑暝鼓喧。帛書無厭數。知有鴈爲門。

送梅堯臣

祖帶都門路。秋風滿客衣。臺舟三鷓駛。官鳥兩鳧飛。鄉思臨波遠。離憂傍酒微。不應緣事事。手自廢談圍。

春暉寓目二首

春序條云晚。高臺芳意多。花成風地纈。鳥作暝林歌。樹氣薰繁幄。池文疊細波。夾城歸騎散。煙絮徧銅駝。春意都無幾。還持歡緒歸。游蜂抱蘂去。驚燕失泥飛。風下幡幡影。霞留暝暝霏。既知瑤席恨。不減欲沾衣。

累夕大風

乘秋萬竅怒。拂野恣離披。祭鳥東門酒。鳴鳶上將旗。有誰樵旦暮。無客賦雄雌。何用呼號甚。枯桑了不知。

武安侯

貴甚宮中勢。軒然帝右趨。所貪惟狗馬。甯是學盤盂。驕取武庫地。氣凌轅下駒。淮南他日語。悔不共嚴誅。

庭石

嗟爾一拳質。塊生天地中。柱雲蒸作潤。山溜滴成空。松蓋何年化。星槎此路窮。無邀什襲裏。近出宋臺東。

感秋

樂事行將晚。華年怯早衰。翻車壯士速。落葉長年悲。別燕風簾靜。驚烏月樹危。播精甯有用。皮骨極支離。

秋日四首

短影悠揚日。薄寒慘慄天。林聲蟬后老。陂影鴈賓聯。悽感客自爾。變衰時適然。何須問容鬢。所遇是凋年。客心驚暮節。天意歇餘芳。蓮罷池收子。榴成露罅房。綈袍親故暖。紈扇委空涼。庾信真愁否。仍能用斛量。禁林成宿忝。愚谷負深歸。未識前途遠。容知昨日非。巧勞真物役。靜勝乃天機。君看琴中意。何嘗在玉徽。

秋氣颯然爽。宴居差有情。蠅休几案潔。蟬罷亭臯清。溪水照心碧。雲山刮眼明。其如歲云晏。天地莽崢嶸。  
晚發

候鼓遙喧岸。行舟逆上湍。輕煙著波面。斜月罷林端。颯沓鳥驚亂。蒼茫葭葦寒。致君何所憚。便道許之官。  
曉瀨雖能迅。寒波不復揚。林聲散棲鳥。隄影度風檣。茲歲方云暮。吾行未遽央。病身非汲黯。安敢薄淮陽。

遊海雲寺

十里雲邊寺。重驅千騎來。天形欹野盡。江勢讓山回。園竹濃成幄。樓鐘近殷雷。斜陽歸鞅促。飛蓋冒輕埃。  
行藥

行藥徧城闔。仍逢搖落辰。塢風焦粟罅。園露飽梨津。遠水多成浦。高雲自作鱗。七丹無復得。魂斷小山人。  
湖上晚矚

湖平潦已收。清興暫夷猶。風舸時搖纜。眠鳧自去洲。荒藤依樹老。殘芡聽波浮。珍重芟山色。蒼蒼到暝樓。  
答京西提刑張司封次韻

乞得二千石。終非循吏才。霜蓬根易動。籠鳥翅難開。夢寤慚封邑。來詩云。疇庸國邑開。此語是夢中做陶  
挺仰鉉台。報言殊麗藻。虛附驛筩回。

閏月晦日

春物都城晚。歡遊一倍慵。輕風生樹態。暖日淡雲容。小閣時翻燕。閒花更少蜂。幽襟真瀟落。所得是無悰。  
贈楞嚴舒上人

丈室錦城隈。庭閒地徧苔。飯從香積取。花續少林開。講晝經殘葉。禪宵燭委煤。無嫌一時學。要是暮雲才。

柔上人

年八十不出。夜能讀細字。

行年踰八十。安坐布金園。指柏仍餘樹。栽桐遂見孫。巖泉晨自濯。經葉夜能翻。顧我生多病。勞師默遣言。

壽上人南游

拂曉鑼鳴月。迎寒毳擁霞。衆香摩詰飯。五葉祖師花。託宿林枝俯。分風夕影斜。前期逢晤賞。持對碧雲誇。  
送梵才長吉還天台

歸袂卷蘭芽。城標拂曙霞。溪行鷗避錫。巖供馬銜花。翠柰經園密。蒼莓渡約斜。暮雲他日合。相望在天涯。  
寄藥山長老省賢

南方有尊者。卓錫戀林丘。演法三千界。多聞第一流。爐烟熏定几。笋脯供齋甌。社約慚成負。霜蓬落幾秋。  
訪僧舍

近郭一牛鳴。金園界寶繩。衆花天作雨。千焰佛傳燈。碧柰垂園老。青蓮雜漏凝。病襟多俗物。時此訪南能。

寥寥

寥寥私沐地。索索晚秋時。高樹足危響。寒花無媚姿。遠砧投會急。昏鴈赴行遲。撫物能無感。年華及始衰。

早秋

脫葉驚彫歲。翻車送落暉。蔗漿晨渴減。桃簟夜涼歸。怨月收紈扇。輕雲怯紵衣。沈愁知幾許。帶眼不勝圍。

山中晚春

新火暮春天。窮山寄一廛。畹蘭催酒熟。溪草作茵眠。落絮輕無定。殘花淺自憐。緇帷談久倦。江上問挈船。

早春

春來人暗知。何物驗來時。林暖樹改色。山晴雲弄姿。歸鴻高的的。生浪細差差。老帥非行樂。劬音農一駐旂。

避暑江濱祠池

溪淺容篙短。舟移覺岸長。煙稠芰荷葉。霞熱荔支房。技疊參搗鼓。杯寒十饋漿。便成消暑醉。官事底相妨。

夏日池上

溪流來不近。永日映霞霏。水荇自相繚。汀禽無次飛。頽沙時損路。幽瀨忽藏磯。誰欲留連我。相將日暮歸。獨坐溪堂上。炎天客少過。紅垂初熟果。碧捲未開荷。曳絮雲更塢。搖金日弄波。一杯聊自舉。涼意雨前多。

揚雄墨池即草元所

宅廢經池在。人亡墨溜乾。蟾蜍兼滴破。科斗共書殘。蠹罷芸猶翠。蒸餘竹自寒。他楊無可問。撫物費長嘆。

秋熱

風物連南國。炎威逼早秋。墮飛波上翼。誤喘月中牛。雲杼衣全解。冰壺渴未瘳。此時班女怨。虛爲素紈愁。

晚冬行園

官舍同山舍。蕭然日杖藜。饑鷗守冰沼。寒薺犯蔬畦。霜逼晴空迥。霞牽晚照低。城鷓棲已定。無事莫驚啼。

過惠崇舊居崇工詩。有名于世。

人往名長在。欽風歷故居。社殘蓮卽老。園廢柰仍疎。塵憶清談外。雲經合座餘。裴回視齋壁。行草暗殘書。

師善行草。齋中多自題寫。

雖味平生契。懷賢要可傷。予爲郡之年。師之去世已二年矣。生涯與薪盡。法意共燈長。遺畫空觀貌。殘詩孰補亡。本院惟

詩藁數軸。神期通一語。無乃困津梁。

和鑒宗遊南禪別墅

鹿園開別墅。牛駕此回輪。花識莊嚴界。林容宴坐人。遠煙時誤晚。靜塢若遺春。共照前溪水。煩師洗六塵。

對月

林梢霞尾暗。海面月華新。一水開天鑑。千金上佛輪。幽巖涵靜桂。潛蚌溢涼津。不必姑山去。翛然自玉人。

月華真可愛。堂上共徘徊。白露方徐貺。清風適共來。蚌津隨照滿。烏闥爲啼開。萬慮方岑寂。愁看雲漢回。  
望月

早月始娟娟。西南寥泐天。魄中藏暗樹。輪外上虛弦。傍漢舍銀淺。過雲漏葉鮮。遙知今夜鵲。猶得穩枝眠。

同小姪珪璞溪上汎舟〔案〕郗兄庠有子五人。三早卒。惟充國均國二人。見王珪所作神道碑。此名珪璞。或係小字也。

出郭曉雲霽。泛舟春日遲。詩懷隨物放。酒面任風吹。循岸煩鷗起。看山惜棹移。州人輕此樂。賴與汝曹期。

擬明月逐人來

玉漏催成夜。蘭釭換作晨。併花排綵樹。分月送遊人。醉幕星臨酒。天街露禁塵。輕雷與流水。隨意伴香輪。

月

西顥涼颺度。金樞宿靄收。映波休混璧。入幔且迷鈎。蚌冷侵珠潤。羅疎逼帳秋。風流知不淺。庾令在江樓。

新月

幾宵閒北寢。始見映西樓。曲篆臨鈎誤。殘黃映額羞。桂稀山自冷。珠淺蚌兼愁。巧作纖纖句。纔能喻兩頭。

殘月

陰光隨落宿。有意待朝陽。暈缺灰餘影。潮平鷺息狂。殘兵驕子國。隱語大刀郎。此夜方諸淚。寧能減數行。

馬上見殘月

娟娟天外月。正見上朝人。老桂欹藏樹。纖鈎側抱輪。氣清仍泛露。光淡卽迎晨。尙作裴回意。西樓對結鄰。  
落月

已照金樞穴。初乘玉女扉。望花愁桂老。數葉畏萸稀。漢蚌兼珠隱。邊兵背塞歸。持將離妾恨。一問上天飛。  
答勸農李淵宗嘉州江行

嘉月嘉州路。軻義按部船。山圍杜宇國。江入夜郎天。嘉州古夜郎國。霽引溪樓望。涼供水館眠。愧君舟楫意。遂欲

濟長川。來時有寧舍濟川航之句



景文集卷十一

五言律詩

早發大堰

曉戍隴隴白。春流納納深。生煙纔著樹。罷月稍依林。野路趨斜岸。漁舠泊暗潯。尙緣歸國意。差足慰離襟。

新竹

最愛中唐竹。春來百箇鮮。筍殘霞落泊。梢散粉嬋娟。早葉危銜露。昏枝巧住煙。寧孤一日賞。況在此君前。

永興鄭資政鞏縣路逢雪見寄

大旆關河遠。同雲天地浮。凌晨逢朔雪。此路向西州。寒襲生犀健。光催暢穀流。餘情念東郭。穿履趁英游。

峽中逢雪

峽內逢霏叢。凌晨望已迷。寒花纔集棧。斜片旋沈溪。戶入垂繒壤。田成種玉畦。速乾殊未惜。山道潤無泥。

冒雪馬上作

大雪浹天畿。晨驂望禁扉。二儀連皓氣。萬物共清輝。樓迴標銀闕。臺寒壓粉圍。瑞花真有意。偏著入朝衣。

四望亭

秋城聊一眺。物色已蒼茫。爽籟風驅遠。寒烟晚曳長。祠成樗作社。戍罷女留墻。要是凋年感。能回倦客腸。

秋日書懷

秋旻蕩喧濁。茂宰屬高情。水遶溪初浪。林乾籟自聲。醉茵留剩暖。歡瑟泛餘清。尙念江湖守。其如華髮生。

送潘祕校赴潁上簿

捧檄去三銓。招招客叩船。倦游驚密雪。離思道么絃。淮月開帆暝。京塵減綬鮮。枳鸞非久息。刷羽竚來旋。

送南頓胡簿

密雪妍辭盛。垂牕怒翼開。聊從百里佐。初露七年材。集隼趨侯府。歌驪酌客罍。時年無道莠。庇邑邇天臺。

舟中三首

舟行不礙動。縱目望聯隄。稍覺前川近。徐驚後樹低。魚游隨聚沫。禽度帶殘啼。自趣家田路。春清況日攜。漠漠朝煙上。霏霏野氣和。驚鴻自去渚。戲鷺不沈波。田峻耕扶耒。溪童食啄螽。維舟時一眺。牂踐損春莎。霧迴緝林趾。波生齧岸沙。漫紅披杏帶。短碧上蒲芽。鮭菜隨宜有。漿醪不用賒。行行樂蕭散。未覺遠京華。

物外亭

飛宇冠蒼岑。盤盤上百尋。風含太虛爽。雲作下方陰。塢桂寒仍燠。岩猿暝始吟。知君有高興。天壤共登臨。

秋日詠庭樹

庭樹報秋歸。蕭然芳意衰。露危陰處葉。風勁暝前枝。嘒嘒蟬嘶早。梢梢鵲定遲。江潭正搖落。司馬不無悲。  
枯樹賦引桓司馬事云。今日搖落。悽愴江潭。

司徒侍中宣獻公挽詞二首

斯文推舊德。憂國變華顛。夙夜勞三事。東西止百年。溫辭聯冊祕。中宮冊文。公實爲之。時稱名筆。良史大都傳。三朝史皆公參撰。

他日賢臣壠。心知望圃田。

美疢交明晦。浮齡詎控搏。宗盟一箇弱。今與伯氏同參宰政。一時頓稱兩宋。人贖百身難。賜歛榮絺袞。臨哀駐玉鑾。欲知桃

李愛朝紱。共汎瀾。

送蒙城簿謝煜先輩〔案〕謝妻即祁女弟。

曾第飄飄賦。仍勞冉冉趨。嘆時三嗅雉。倦別一飛鳧。句簿虛公几。迎漿溢里壺。異時齋閣閱。明陟在丹塗。

送江陰簿江楚材先輩

曩舍久過從。清言服阿戎。半綸人結綬。一箭水分風。行稻鮮原綠。攀花雜樹紅。羨君談有助。新論得王充。

送炳宗巢簿

世德封胡後。英游終賈年。塵淄去郡客。木落渡淮天。揖吏貪持簿。勞歌勸倚弦。無憂親釜薄。新復古圭田。

觀相國長城公畱題藥師院壁

擁節趨瑤縣。回輿禮梵仙。望雲催覲日。零雨記歸年。蕙露霏毫潤。尼珠入局圓。斯人具瞻地。二絕賁金田。  
題玉溪符上人清風閣

齊撩翠霏間。人高境自禪。閒心溪上月。佛髻檻前山。晝漏依蓮改。晴雲識棟還。誰持快哉意。來此共躋攀。  
李中令挽詞二首

家賜齊侯履。人推郤縠文。結婚榮外館。謀帥得中軍。盛集追園蓋。適章託隴雲。不圖新渚畔。更作死生分。  
贈窆充幽隧。鳴簫異素輪。山丘華屋遠。桃李故蹊春。使幕被愁霧。談犀委暗塵。須知悟生滅。終得法爲身。

龍巖寺

磴齒緣蒼巘。簷牙冒紫氛。樓鳴穿峽瀨。堂宿抱峯雲。鳥散生臺晏。僧歸浴樹曛。居然化城地。長與客塵分。

農閣

菌閣俯江干。西南蜀塞寬。看雲記巫峽。望日省長安。鈿岑峯頭碧。霞皴荔子丹。比來秋物好。誰伴數憑欄。  
聞杜宇

傳聞望帝冤。底處最堪憐。蜀月將殘夜。巴山欲曉天。周軍嘗化鶴。齊后亦爲蟬。物變皆如此。非君是偶然。  
春野觀農事

茂氣回鮮野。寒姿換故林。敗防溪響急。新畊耒痕深。乳雉嬉原隩。歌牛下浦陰。吾廬堪學稼。將老有初心。

唐詔監簿池陽市征

五鼓歇津亭。風帆去斗城。美材王國秀。獨木縣官征。萍蜜浮罌劑。蓴絲雜釜羹。袁郎秋詠去。江月對盈盈。

早秋夜坐

穹旻炎壑歇。顯氣襲中閨。倦鵲兼河轉。初蟾共月西。客愁無處所。世慮足端倪。清客纔成泣。臯禽且穩棲。

秋日書懷

風頭日蕭索。爽氣自西岑。暝戍有傳鼓。寒城無罷砧。未論鄉思苦。且念歲華侵。目羨高高鴈。先時到上林。

得伯逢書

書來何所道。報我二毛生。種種因年化。星星著領明。別離纔幾日。感慨若爲情。且莫悲遲暮。須容四海兄。

予于伯逢不  
齊十年之長。

伯逢欲予買一田野因成自訟

予從大夫後。祿乃二千餘。簪筆論何事。藏山著底書。病教年事早。拙使宦情疎。合治菟裘未。蝸牛尙有廬。

西園晚眺

弱柳蒙蒙密。新花袞袞繁。貪尋芳蔕遠。遂到落霞昏。亭榭銜山靄。池波撼月痕。惜春還語客。慎勿訴餘樽。

李先輩昆仲見過

有客過窮巷。門羅日晏開。南州一榻下。平輦二龍來。霏雪欣談麈。炊菰乏案杯。自慚隣壁焰。時照不燃灰。

公園

幽興足端倪。危橋便見溪。浪輕魚喜擲。山近鳥工啼。弱葦披風激。涼蔬甲雨畦。使君來已屢。林下自成蹊。

八月十四日夜東軒餞趙同州志元吳陝州冲卿徐潤州君章

明月不常值。中秋能暫新。誰言一堂上。相與異州人。適意苦難得。舉杯寧厭頻。清光定千里。他日遠相親。

訪隱者因題壁

巖徑躡雲層。藤蘿失晦明。青谿一道士。籃輦兩門生。山溜足奔響。松風無罷聲。願同沮桀侶。林下耦寒耕。

哭郭仲微三首

倉卒聞嬰疾。何辜遂沒身。哭筵同產子。仲微無兒。惟兩猶子。義當主祀。霜寢未亡人。冢有邢山舊。仲微先塋在新鄭。天為京兆隣。

想君齋志恨。不使白楊春。

我作魚符守。君司鳳詔文。予出壽陽時。仲微新掌誥。他時談笑罷。今日死生分。怨涕翻滄浪。悲魂引鄭雲。山陽懷舊笛。

腸斷不堪聞。

謝氏雖多女。仲微有三女。中郎竟乏兒。人生忽至此。天道果無知。一代英才往。千篇故稿遺。生平同翰墨。不及

鏤豐碑。予解郡時。仲微已葬。內相吳春卿作銘誌。

夕坐

岸幘坐前楹。天圍極望青。日華開嶺霧。風影碎池星。重露驚棲鶴。幽叢帶暗螢。塵機心久息。寧待據梧暝。  
〔案〕莊子嘆讀作眠。但古無眠字。此仍作本字讀。

西樓夕望

炎氛隨日入。岑寂坐遙帷。倦鶯昏投浦。驚蟬夜去枝。桂華兼月破。槎影帶星移。珍重牕風好。羲人即此時。

偶書

悲秋葆髮生。倦客厭離身。九奏莊禽眩。千鈞楚俗輕。媒勞傷偃蹇。歲晏恨崢嶸。誰訝游都久。方歸谷口耕。

答書

纒纒餘病骨。踽踽本孤臣。夷餓懷食粟。軻居憶徙鄰。予方嬰內艱之痛。舊園寬脅帶。鏡刻暗書筠。親見揚雄者。容

儀不動人。

答書牛馬走。卜疏草茅人。久謝輪囷器。羞言阿堵神。觸籠摧勁翮。煦沫曝窮鱗。尚欲求糟粕。心知老斲輪。

和朱少府苦雨

滯渰連春晦。層陰接夜分。曉壺惟發電。愁棟但生雲。里突居無爨。官蛙坐厭聞。遙知霖唱罷。客思轉相紛。

歲除

彫節真如借。良宵此向闌。家儲宿歲酒。鄉送大難寒。舊卉回新物。來情續往歡。匆匆餘幾刻。催具五辛盤。

詠酒壺

刻像小踟躕。無情是所憐。客歡迎指顧。觴冷寄回旋。屢轉疑投節。將休似取妍。勞君戢深意。醒者勿須傳。

答書

經槌摧無幾。書刀削未休。胡能反招隱。更欲傍牢愁。澌硯寒餘滴。牕燈明映篝。子威銷骨盡。何相得封侯。

程子威傳。小史有封侯骨。

望仙亭晚眺

日晏來憑檻。要知刀筆休。晚雲山曲拂。麤飯客稽留。未覺清言減。猶堪大白浮。狂歌誰擊節。只是自搖頭。

明月湖

湖色淡無際。月華相與閒。臨波雙壁映。照浦一珠還。宿火汀洲外。橫烟桑柘間。不妨清思劇。舉國盡溪山。

晚眺

危欄真可倚。極目盡高原。雙堠驛邊道。孤烟山下村。高風生樹響。寒水落溪痕。坐見斜陽盡。歸鴉滿翅昏。

胡同年恢信州弋陽簿

籠櫻沈醪宴。津鼓愴離羣。道出東南水。心留西北雲。秫田供醞劑。練幅換書裙。燁闕方呼俊。歸來竚獻文。



黃垆勾建昌簿

露風徹宴厄。十幅曙帆飛。路入江山國。人兼綵繡衣。草堂空岫幌。偃室聽琴徽。誰識無雙譽。新從口下歸。

元處宗安化簿

軍府沈千奏。邊城佐一同。鄉書黃耳遠。客爨屢屢空。怨曙羌笳月。嘶寒代馬風。未應期會急。平日廢談叢。

同年毛洵勾簿新建

年衰冬集罷。鷓首曉帆催。枳棘非鸞處。膏腴得父才。澄江限天闊。孤鷺透霞來。此地留清賞。誰同耻宴壘。

霜寓

霜寓澹秋光。崢嶸歇歲芳。地形侵楚庫。渠尾入淮長。惠民渠首嵩洛尾入淮。層集牛初下。羅稀鳥恣翔。病悰多感極。

身託茂陵傍。

季秋十九日追還學士院回舟入都作二首

上恩留不遣。仍棹越船回。人忝玉堂署。魚還符節臺。危心摧櫓罷。病眼刮雲開。讀徧淮南詔。慚非視草才。得麾初出守。趨召遽言旋。露藿元傾口。秋槎卻上天。丹塗容蹇步。星弁許華顛。再奏皆聞罷。慚妨此路賢。

古邑二首

古邑逢池上。私居市道鄰。初拋三釜粟。來作一廛民。乞火黔薪突。繙經振隙塵。何從復何去。更欲問圓神。

墜雨離邦遠。編蓬僦庶卑。人非一國敵。家乏萬錢貲。賈禹自云家貲不滿萬錢江海嗟漂蕩。乾坤惜變衰。此時看落葉。寧翅長年悲。

三封田墅

驅馬三封下。還家值日西。林間尋路隘。露裏入山迷。僮勸仍依榭。雞閒已上棲。暫來翻似客。鄰酒夜過攜。清和遷首序。岑寂此憑欄。澗雨虹前罷。林櫻鳥後殘。野麥連草向。天影入池寬。日暮嚴城阻。裴回惜據鞍。

行藥

行藥來溪上。園秋損物華。漫叢繁野菊。荒蔓繫寒瓜。野曠難藏樹。山明卽變霞。病身慵事事。樓鼓謾催衙。江夏更孝恭。數遺新詩。因以是答。

萬里江南客。三年澤畔身。驚弦已瘡鴈。涸轍欲窮鱗。日月奔騰晚。烟花感慨春。誰能爲此曲。無乃數奇人。答轉運王工部到壽陽卻乘流東下以詩見寄

聞到清淮上。還乘清溜回。緣持使者節。難把故人杯。曙蓋星銜柳。昏郵甫亞梅。愴離并感昔。都向句中來。答景毫宣徽吳尙書見寄短偈

玉帳論兵罷。東方靜守藩。有塵都是客。無法可容言。以上四句仰奉海鳥逢觴怯。醯雞戀甕喧。白謂因公四句惠。彌覺對酬煩。

答連生見寄兼簡同邑胡希元

京華倦遊客。顧我損文鱗。道覺窮方勝。交緣淡更親。句成池草夕。訊到隴梅春。欲答雙盤恨。清才彼有人。

答刑部王侍郎病中見寄

請告煩開許。循衰分退藏。病淹三折臂。愁熱九迴腸。凍酌思同醕。仙丸得徧嘗。深慚白雲老。相憶未相忘。

偈答王侍郎

遮莫傳衣去。饒他舍棧回。雪雖爐上見。珠自髻中來。刼刼無真諦。人人止妄猜。公知兜率否。舉足便塵埃。

觀燒

白草開平野。炎暉照暮雲。商原寧易嚮。崑玉怯同焚。田燭宵俱遠。邊烽曉不分。方陽休自任。阮瑀久從軍。

西齋秋晚

霜華零暮節。日氣淡長穹。池減無留潦。林寒少罷風。蟲鳴星杵促。蟬起露綏空。隱几無紛慮。窺園嗜晚松。

西園晚秋見寄

中園秋物曉。清玩日無窮。暝篠深留翠。寒花淺作紅。鶴鳴殘滴露。蛭咽已涼風。誰伴調絲管。心知憶戴崇。

和伯氏小疾原韻


握臂苦悒悒。蒼華倦晝簪。悟非遽瑗早。達想淨名深。齊鹿閑三槩。仙圖戲一禽。獨應吳客問。眉宇識侵淫。

悼祚禪師二首

兩股飛神錫。千金供住園。吹毛曾有問。得髓更無言。蘭紫恩袍異。今宣帥副馬李公素所推重表賜紫衣。蓮香社侶繁。雙林

今奄忽。淚目送風幡。

擊電傳心要。浮漚厭世喧。一牀空病室。五葉識諸孫。風慘萎花墜。塵流舊鑑昏。導師寧怛化。緇侶自銷魂。



景文集卷十二

五言律詩

陪謝紫微晚

積雨漲秋濠。輕舟共此邀。菰蒲斂鉉鏐。蓮芡熟囊韜。岸靜魚跳月。林喧鳥避蒿。歸時興不淺。風物正蕭騷。

答朱公綽牡丹

珍卉分清賞。飛郵附翠籠。蹄金點鬢密。璋玉鏤跗紅。香惜持來遠。春應摘後空。玩時仍把酒。恨不與君同。

渡湘江

春過湘江渡。真觀八景圖。雲藏嶽麓寺。江入洞庭湖。晴日花爭發。豐年酒易沽。長沙十萬戶。遊女似京都。

臘後晚望

寒日繫難定。鳴笳弄已休。凍崖初辨馬。昏谷自量牛。漢樹臨關密。荒泉入塞流。登高能賦未。風物古堯州。

中秋新霽壕水初滿自城東隅泛舟回謝公命賦

齋舫談經後。官池載酒行。斜陽鳥外落。新月樹端生。清漾思江浦。夷猶遶郡城。東轅有遺恨。日日物華清。

讀絕交論

嫌忌蕭朱末。盈虛田竇間。言雖甘若醴。心定險于山。覆轍何能救。頽波遂不還。居然孝標論。抵几若爲刪。

和夏推官奉太夫人就養仲氏次韻

盛府從軍日。大家隨子初。伯兮均潔膳。仲也慶將輿。霧舍嵩塵薄。霜程鞏樹疎。循陔傳詠切。匪夕佇歸歟。

寄涇北都運待制施正臣

我作東南守。君爲河朔行。旌旂向江步。笳鼓入邊聲。共結光華遇。僕與正臣相繼拜恩難禁離索情。惟應指羊酪。未肯下蓴羹。

探題得小橋

尋幽路窮處。畧約跨回溪。一水虹相映。雙華鶴自棲。淺痕過釣艇。斜勢截橫隄。弭節誰憑望。秋光徧水西。

蓬池二首

大道來中縣。餘糧徧近原。狙林朝芋隕。豳屋晝茅喧。短日方催暮。低雲屢向繁。我憂寧易寫。惟有悄無言。天形垂沆漭。原勢帶紆餘。社久熏無鼠。淵澄察見魚。駟駟開牧序。蹇蹇度柴車。卻望斜陽市。行人掉臂初。

雨夜

滯雨兼蘭夕。遙帷更燭房。疾雷方破柱。驚電或生墻。易斷幽衾夢。頻迴逐客腸。新歡誰復得。最是楚高唐。

送睦州柳從事

唱第千人俊。從軍十部賢。雞翹迂賜綬。鶴首赴歸船。別思瑤華岸。懷鄉玉膾天。不妨賓弁側。新曲徧鷓絃。  
城隅晚意

寥寥天意晚。稍覺井閭閒。水落呈全嶼。雲生失半山。牛羊樵路暗。燈火客舟還。暝思輸鳧鵠。歸飛沆漭間。  
卽事

中伏翻無暑。斜陽未卽曛。暫光風處葉。餘墨雨殘雲。圃埒繁蔬甲。堂坳疊薛文。巾幘殊上喜。文酒半離羣。  
水亭

地漬蟻衣接。天澄穀霧開。微風發琴籟。殘月減珠胎。鳥散纖條動。魚遊細浪來。坐堂兼伏檻。恨乏楚人才。  
送戚祕丞典上饒錢監

左典吳山治。行行榜客舟。終無善宦巧。肯爲著書愁。別思都成惡。芳辰信易逾。江南饒杜若。何興奈高秋。  
贈清逸魏閒處士〔案〕閒卽處士野之子。

奕世依岳石。褒恩下帝庭。姓名高士傳。父子少微星。池溜遙通澗。家林近帶坰。分明詔書意。天極賜鴻冥。  
七月二十七日

客鴈歸何處。寒螿鳴不休。兼之清夜永。副以長年愁。家令有移帶。中郎餘白頭。此懷誠自感。何賴怨高秋。  
七月二十八日

秋物向搖落。客心真悄然。高風已涼夜。澹月始晴天。拂幌單練怯。凝塵故扇捐。露華休早滴。羈鵠不曾眠。  
寒夜始長

四海秋風晚。千門夜刻長。梧桐老空井。蟋蟀近人牀。暗燭勤垂燼。離鴻短趁行。生平江海志。耿耿未渠央。  
將歸二首

遠假西南守。三逢梅柳新。衰令宦情薄。老惜歲華頻。郛釀供銷日。巴禽巧喚春。離家何所恨。鴈後作歸人。  
雲棧短長亭。今茲重作經。邛峽叱殘馭。蜀分使回星。旅鬢雙垂雪。羈懷一泛萍。驪駒在門久。此曲若爲聽。  
夏日陪提刑彭學士登周襄王故城

聊隨漢使者。一上周王城。片雨北郊晦。殘陽西嶺明。野禽呼自別。香草問無名。誰復歌離黍。惟興箕穎情。  
寄大固山嘉祐院長吉上人〔案〕上人曾遊京師。得宋祁以下一百四十五人所書般若經。建臺以貯之。

名高身愈隱。孤錫倚巖扃。園布黃金地。臺藏白馬經。菴雲吞暝燭。澗月瀉虛瓶。坐想谿橋路。莓苔又幾青。  
寄淨名菴僧長吉

故人詩未報。恨恨復經年。夢去長江路。心知寶所天。孤情巖桂老。逸思暮雲傳。無奈纓綉累。猶乖方外緣。

東晉

倉卒浮江日。聲名建號初。羣臣讓禁巒。上宰製單練。氣銳開桁戰。心歡折屐書。織兒競撞壞。不念好家居。



聞歸鴈

故歲東南客。新來西北飛。聲迷江月老。陣入塞雲稀。遠恨拋書素。餘音付玉徽。行人落君後。搔首未成歸。  
薛道衡有人歸落鴈後之句。

春夕聞鴈

聲繁知併舉。陣急想斜分。臆飽江南稻。身隨代北雲。足書煩遠寄。箭道怯虛聞。口噤悲黃鵠。相望不及羣。

送黃寺丞謫濠梁

間關羈籍遠。跌宕壯心違。倦逐淮禽去。欣同塞馬歸。時來富且貴。事往是耶非。姑共春清酌。徐徐遣世機。

詠菊

壽客若爲情。風流友麴生。殿秋安晚節。爲隱被香名。曼衍南陽種。淒涼楚澤英。見山應自語。今古幾淵明。

黃花道

驛道雲山裏。悠悠千騎行。猿禽互啼嘯。崖嶺各陰晴。樹合天疑窄。川回地忽平。錦官何日到。菖葉已催耕。

中秋對月

圓期壓秋半。飛影破雲端。明極翻無夜。清餘遂作寒。桂繁團露濕。輪駛渡河乾。且置窮邊思。何殊故國看。

孫抗寺丞宰晉陵

舊筆刑丹燥。新辭苑雪妍。一名遲上月。再擊始垂天。鷓首凌波穩。鳥翁賜綬鮮。邑歌豐暇日。摘句暮爭傳。  
有懷舊隱

官事未易了。田家胡不歸。煙原射雉樂。春糝養魚肥。菜密成巖幄。蘿長代石衣。無爲落吾事。坐老故山薇。  
屬疾五首

腐肉填鴟素。華軒載鶴身。閉關吾有謂。當路彼何人。帶眼移仍數。顛毛變愈新。惟無公幹譽。他味似漳濱。  
淹臥日無聊。年侵葆鬢凋。久衰翻似鳳。危息乍成鷓。筆倦長棲格。琴慵不襯褫。心知煩慮苦。寧望一丸銷。  
自昔聞稱疾。于今是養疴。三盃留客案。五子倦朝珂。落落堪憂苦。星星奈老何。酒希非所嗜。楊宅竟誰過。  
天假支離養。人懷寂寞慙。衰容行得老。苦節遂無甘。飛鳥惟宜下。疲驢詎可驂。吾生知所守。嘲客勿多談。  
里旅居仍隘。臺家疾見寬。何言漢樸學。正似楚枝官。煦渚藏勞尾。投林戢倦翰。上恩何日報。卻步已蹒跚。  
祇答公序相國二兄見寄二首

前時同出守。星鬢各蕭蕭。蹊李伐不食。原禽行自搖。棹前饒沸浪。蓬處但驚飈。素願山林隱。公乎不在招。  
壯引朱顏往。衰招白髮生。危心幾何折。勞尾自然頽。把酒天涯恨。搔頭歲暮情。將何獻康樂。衰思頓如醒。

公近有訊催報。  
故于亂章見意。

智成上人奉陪中山公赴淝上

宗工方出守。大士此相親。不有今平叔。難酬彼上人。昔文殊讚云。彼上人者。難爲酬對。氈毹連榻具。筓脯對盂珍。別後臨川偈。同翻幾葉新。

江南木芙蓉。張子春云。其高如樹。中山地寒。纔數尺。花瘠色淡。八月已開。

江南高比樹。塞北僅成叢。向晚誰爭豔。防寒淺作紅。弄條風淅淅。銜葉蝶忽忽。且作黃花伴。無令歎罽空。

通判茹太博惠家園新茗

雷鼓殷隱山春。槍苗第一新。雲供烹處碧。露餉摘時津。甌潔凝芳乳。羅織撼練塵。貺予知有爲。多渴思遲人。

### 秋興

天地西風徧。亭臯衰意生。寒雲終不雨。危葉自多聲。晚蟬猶嘶樹。啼鷓稍着城。默然孤客思。年序共崢嶸。遙夕何曾寐。孤懷有爲憂。謀多真逗撓。師老但誅求。朔霧摩邊壘。羌風般戰枹。吾生誠用寡。歎罷只搔頭。先日二毛生。秋來無復驚。南風隨楚俗。北斗望都城。塢栗霜開罅。池蓮雨折莖。停罇問天意。何適付枯榮。

### 夜分

夜分羣動息。秋意久勞勞。林淨月華上。河明天界高。街風遙疊鼓。園露暗僵桃。萬事蹉跎外。惟應得二毛。

送駕部俞員外良孺知江州

朝弁辭清曉。齋腥汎暮秋。官華飛雉省。地劇左魚州。溢水遙浮郭。天章近占樓。知君乘月夕。不淺是風流。

賦得新秋似舊秋

新秋搖落意。只似舊秋時。流景預何事。長年真自悲。芙蓉兼露歇。楊柳帶蟬衰。歎罷蹉跎在。惟應素領知。

老去

老去慣搖落。第看芳歲陰。穗殘飢鳥集。荷破曝龜沈。遠岫多餘紫。寒溪有定潯。殘蟬何所畏。緘口抱秋林。

衰感

眩罷目還暗。花殘鬢益稀。長吟病莊鳥。孤憤老韓非。坊酒叨常秩。鵬花濫賜衣。家田耕熟未。元亮欲言歸。

張轉運席上

秋色徧華顛。真成私自憐。身慵寧復事。秋早不依年。作吏惟思隱。從僧寢悟禪。支離果如此。只稱據梧眠。

答張學士西湖卽席

偃藩多式宴。佳雪屢飄霏。意感年將盡。歡容酒剩行。伊公調鼎樂。羊祜衣裘輕。況屬輜軒暇。須容心賞并。

迴堞

勝地紆佳客。高秋會賞心。返霞延落照。餘岫補疎林。捉麈談方熟。持螯酒屢斟。無煩命絲竹。擷句是清音。

迴堞巖岈極。長天蒼莽中。遠溪寒不浪。高木暝饒風。棧層休王馬。槍纍隔苑熊。殘霞牽望眼。時到夕陽東。

嵇中散畫像

顧長康畫中散爲目送飛鴻手揮五絃像世共貴之謂以風韻可想見也

彼美雲章子。翛然天外情。凝眉逐層翥。俯手散餘清。霄迴心逾遠。徽遷曲暗成。千秋想蕭散。方覺繪毫精。

泉

容與下層岑。飛流界百尋。記方誰辨玉。雜溜自成琴。細浪浮烟闊。迴波逗月深。我來聊挹注。嚼藥有初心。

芭蕉

逃臘藏深柢。

圃人至冬掘其根藏窖中。至春復興而殖之。

乘春發故莖。雨障單蓋側。風偃半旗開。脆理繒爭裂。斜規扇欲裁。無

堅喻浮世。金粟信多才。

言志

志豈觀非聖。才猶恥壯夫。窮愁五經笥。感慨八騶呼。昔隱思投耒。今行誓裂繻。莫邪方有請。誰爲鼓洪爐。

寄題元華書齋

比日投簪隱。孟逢列舍椽。值巖因鑿牖。仍礪卽疏泉。斧爛仙基路。花飛佛雨天。諫帷他夜夢。猶在翠微顛。

小酌感春邀坐客並賦

林下復池邊。其如春暮天。花仍無數落。柳亦第三眠。強飲非能劇。狂歌不取妍。流芳何預事。只是自怡然。

喜藥山賢師見過

風林曾語別。王舍此相逢。淨月常涵水。孤雲易去峯。供緣賓閣飲。師與清源參預。領忘言之契。耳界帝城鐘。卻舉當年話。無言促塵松。

寄題藥山牛欄庵壁

昔人牛口下。肯宇化南州。祖地千燈續。荒垣八字留。漏長蓮葉晦。園勝柰陰稠。後嗣推崇意。同風古佛流。

送天雄監兵李中吉

督府監軍重。清時握節榮。長雲抱漢壘。殘月偃邊兵。戍霧漁撾壘。衢風鶴蓋平。不應煩暑路。河朔趁飛觥。

萬秀才園齋

仁里樂丘園。茨茅構迴軒。檻風叢篠密。畦雨晚菘繁。列岫非他境。蔬流卽故源。彥倫回駕日。于此愧驚猿。

水聲

淙波聲可愛。最與靜相宜。激射不平處。潺湲無罷時。擁花含驟咽。礙石濺空危。便作山林趣。寧妨吏隱師。

長安道中悵然作三首

三輔古風烟。征驂悵未前。山園蓬顆外。賈山譏始皇侈葬。言後世不得蓬顆庇冢。宮室黍離邊。樹老經唐日。碑殘刻漢年。便須

真隕涕。不待雍門絃。

興亡作今古。事往始堪悲。宮破黃山在。城空北斗移。走岡寒兔急。啼戍暮鷓飢。灞岸重回首。惟餘王粲詩。

城闕今安在。關河昔所憑。種祠秦故時。抔土漢諸陵。花樹圓排薺。樓雲淡引縈。南山不改色。千古恨相仍。

晚晴

積晦澄天寓。浮涼湛物華。遠雷猶送電。殘照卽成霞。賀燕翻空迥。傾梧疊影斜。披襟無內熱。寧億鄭生瓜。







景文集卷十三

七言律詩

聞園丘禮成肆告

齋幄連蜷駐玉虬。萬靈遙護翠雲裘。寶雞竝雉迎神曲。卓馬爭趨助祭侯。封屋都人差賜帛。賤星牢口闕無囚。露蕭雷解疏恩美。萬和歡聲速置郵。

癸酉六月奉詔修藉田記十一月詔罷賦詩

三時受詔擁緹油。曲筆無功苦思抽。不得成書同太史。須知非我異春秋。空言自合因人廢。殘藁猶應蓋瓠。留記草纖悉印送史院歸臥私庭深閣筆。飽嘗雞膳太悠悠。

和晏公園丘詩

仗外鮮雲斂夕容。蹕聲遙下紫營東。迎神祕座攤金密。臘食清壇烈火紅。七萃禁戈攢月冷。萬侯朝壁照霜空。天心帝意通歡豫。併在柴薰縹緲中。

元夜觀正陽錫宴

雲端嶽闕下呼鞭。綵樹遙分坐狄前。山戲百層平樂地。佛輪千影瑞陁天。祥風入助銀花麗。寶月來供雉

扇圓獻歲承平多樂事。擊靴誰美唱唐年。

初侍講筵有感上呈經筵諸公

邇英何幸奉經筵。俗狀婆娑艾服年。蘭葉初窺圖上字。奎鈞乍識禁中天。坐憑重席慙清問。能讀三墳賴衆賢。猶藉向來稽古力。不然須合早歸田。

再侍經筵有感

露門重幄紫雲開。何意孤臣得重陪。攀樹已驚劉放老。受釐猶及賈生來。華綈藉暖瞻宸几。甘露浮香入賜杯。稽古雖勤成底力。心知不及漢儒才。

奉和晏相公攝事園丘中書致齋

相閣齋居政事西。茲辰正值朔雲低。雪園鷓冷應先舞。雀樹鷄閒欲早栖。擱筆暫停黃紙尾。解驂猶放紫茸題。仙謠唱罷微陽動。誰見林間荔甲齊。

禮局致齋

枌榆秋報漢家壇。齋誓先朝令不刊。抱藹一身依禮署。飯蔬三日屬祠官。天池唳鶴驚宵滴。宮堞棲烏噪暮寒。倦枕不煩神櫟夢。有人無用亦常嘆。

禁門待漏

破月餘光淡禁街。駐車聊候九門開。雙蟠曉闕蒼龍動。斜倚春城北斗回。漏箭急傳催疊鼓。酒爐爭擁賣寒醅。元規塵影真堪畏。已傍游人要路來。

仲冬二日使到頒翠毛錦旋欄

翠裘朝罷轉昕霞。皇帝十月一日初御頒服諸方走使車。泥和五芳中出詔。錦裁雙獸織成花。錦作花地。雙戲獸文。官叨侍橐恩加等。待制官在京賜紫羅。例及和門賜有差。詔并賜在城諸軍校。坐襲餘溫身更寵。不慙多病帶環賒。

朝陽

臚膊雞聲夜向晨。東方飛景到雲林。簾幃已是曈曈曉。庭戶全無曠曠陰。可是梧桐長得地。也應葵藿久傾心。日邊早晚來環賜。見說清光注意深。

觀上朝

鬱葱佳氣護天臺。銜尾茸題隘路槐。金箭忽鳴衡漏盡。火城爭撲相車來。黃人日映仙盤上。閶闔天隨禁鑰開。規地凝深誰得見。渚鸞誰鷺自趨陪。

再入翰林

銀臺路入複門賒。四載重來鬢愈華。況自秋毫皆帝力。何言舊物是吾家。伯氏一為翰林。予則再為之。宮盤浩氣浮襟爽。省樹珍陰疊殿斜。書枕夢殘聞吏報。日痕還復度磚花。

聞後苑賜宴

漢家殿幄紫雲連。萬品仙葩匝賜筵。露蘂半晞仙掌外。斗杓長在帝車前。液池綵鳥棲連籞。鈎盾祥雉徧  
弄田。病客無階陪橐飫。除因斷夢到鈞天。

陪季秋大宴

祕殿霞暎幾刻移。天臨法座儼朝綏。魚龍霧暗充庭後。羯鼓風乾解渴時。山答歡聲來廣座。花留和氣入  
繁枝。自憐侍從非方朔。不識壺醴是隱詞。

憶上苑錫宴

長懷禁籞宴嬉年。帳殿深沉望碧蓮。秦地河流疑象漢。上林宮繚欲捫天。恩盃蘭末流霞溢。蹕道梧陰綵  
羽鮮。紫陌暮歸人籍籍。汗帷揮雨杏粘韉。

謁四陵下宮

四陵煙栢蔽團暉。曉束朝紳拜廟闈。臺下俗無西向射。寢中人護月游衣。垂髯上漢龍難見。耘野連天鳥  
自飛。酌畢驅車循故道。經時回望悵依依。

直講周歲

本自悲涼葆髮多。何緣未至濫中阿。馬肝不食非論味。狗曲猶輕枉爲歌。舊學空疎緣病廢。壯情牢落伴

年過終然野鹿江魚性。長在雲林與素波。

寄南郡直講王聖源

良辰酒所獨持杯。目極南雲首重回。榮路久差冠一免。聖源嘗以公累去官經筵貪愛櫛三摧。多年道勝胸中戰。卽席人推客右才。深詔糊名求異等。佇看揮筆映天臺。

賜禁中所種稻米

中天銅雀長鳴罷。清籟澎池告稔初。刈斂方從弄田出。頒分更自導官餘。霜莖蠹秀紆宸玩。玉粒凝甘剩禁儲。慚愧有年君賜厚。等閒欹枕夢爲魚。詩人夢魚爲豐年之占

燈夕在告聞遊人甚盛

火樹繪山鳳闕前。皇都美景屬新年。烟花併作長春國。日月潛移不夜天。海邊有不夜城道上落梅飄脆管。陌頭繁杏著遊韉。須知鈞會人同樂。莫嘆秦侯抱疾眠。

休沐

出休連日似山郎。坐有蛩氈沐有湯。缸面酒華隨日轉。琴中松韻共風長。官卑寧爲今無巧。愚極曾聞古是狂。自顧支離身碌碌。樸歸囊被亦何妨。

歸沐

彌旬出沐道山頭。傲庶蕭蕭避世游。枉是胸中存壘塊。可能皮裏有陽秋。駕車款段慙鄉品。託乘鷗夷笑客愁。曲突不黔賓坐冷。時聞庭雀一啁啾。

休日

病粟支離月有儲。漢家湯沐許家居。材同曲社真無用。拙比河陽恐有餘。半夜羈魂隨鶴警。九秋嘶腹共蟬虛。誰言舐痔非長策。卻得君王五乘車。

旬休

火雲疊影抱炎曦。霑沐身閒與勝宜。卷葉初開芰荷沼。輕房半繫石榴枝。茶槍早翠吟魂適。蔗境餘佳渴肺知。汗馬屬鞬非我事。到頭攘臂是支離。門依北郭最閒坊。休令歸來白晝長。司馬苦消非我事。次公無酒是真狂。午雞初下繁陰合。夢蝶徐翻倦枕涼。自笑此生疲挾策。不知呼塞亦亡羊。散帶家居首任蓬。閉關窮巷避雌風。官非言責如餘裕。流在儒家覺少功。慢態已成書几積。黠姿無半畫廚空。此生信有天年樂。堪置蒙莊大社中。

和樞密晏太尉元日雪

寒雲萬里送殘宵。面旋祥翼集歲朝。繁影未能藏夜燎。薄花仍欲伴春椒。光含象闕蒼龍舞。氣勒交衢卓

馬驕豐兆歡歌誰不爾。百官兼放五門朝。

學舍石榴

太學中石榴數十株。少他雜木。然其樹率多蟠蠹。

會見芳英上舞裙。緣何此地寄輪囷。烟滋黛葉千條困。露裂星房百子勻。未羨扶南收作釀。曾經騎省賦爲珍。安仁閒居賦云。須知博望來時晚。莫促幽芳趁暮春。

秋日與天章侍講王原叔會明仲正言余安道三學士集普光院

長廊盡北到禪扃。宴坐林間共褫纓。秋氣只知雙鶴唳。塵喧已去一牛鳴。晨鐘暮磬無時歇。翠竹黃花相間明。妙墨仙郎題爵里。他年爲寄此中行。原叔以古篆記是集于壁。

太學建講殿割王第西偏營置

王家賜第曾開府。天子營宮此嚮儒。壞壁有經還闕里。廢臺無鹿嘆姑蘇。泉疑自湧供池溜。柱欲飛來荷棟桴。獻歲成工觀盛禮。願陪希瑟趁風雩。

落花

紫房丹萼旋辭春。素瑟悲多不忍聞。暮雨便從巫峽散。餘香猶上魏臺分。魂銷南浦波空綠。望絕長門日易曛。翠被已空桃穢遠。自今搔首更離羣。

墜素翻紅各自傷。青樓烟雨忍相忘。將飛更作回風舞。已落猶成半面粉。滄海客歸珠迸淚。章臺人去骨

遺香可能無意傳雙蝶。盡委芳心與蜜房。

回郡將東還獻梁相公

留滯符魚素領垂。十年方喜覲彤闈。平臺雪罷鄒陽老。宣室釐殘賈誼歸。疲馬有情依櫪嘆。倦禽知困傍林飛。相君門下餘塵在。擁篲應容一叩扉。

老還

老還東觀復懷鉛。坐對秋風鬢颯然。怨曲未平曾破瑟。故瘡雖愈尙驚弦。蕭條門巷張羅外。闕寂曹司擱筆前。借問不才爲累否。古來山水盡天年。

雪後與張轉運任通判何都官游湖上

湖天初日駐彤幃。雪霽樓臺朔氣嚴。浮隰淺花全裂縞。拂沙殘白暫成鹽。漸迎客棹容徐進。寒著賓壘喜細添。農壤徧膏民癘息。相君餘興付厭厭。

離宛丘舟中作

子子歸檣五兩斜。浮雲盡處是京華。不隨東魯人浮海。正似新豐犬識家。笏首新荷尋珥筆。腰間故印解垂綯。多年蹇足蹒跚甚。卻畏丹泥九城賒。

將還都寄獻臣



茂陵移病在窮年。尙省長安在日邊。生意不隨枯樹盡。危心重伴死灰燃。秋風壓苑檀欒近。夕斗橫臺睥睨連。側注舊冠塵滿屋。定須彈拂故人前。

還都

一封東走罷州麾。卻趁清班上赤墀。侍史香爐留直夜。王孫春草見歸時。虛名所賴天藏拙。晚歲無如病與衰。要在屬車何所用。只堪盛酒比鴟夷。

丞相龐公歸政就第數有新詩傳播都下偶成拙句上紀盛德二首

方道逍遙一品身。盡收和氣付凝神。小車殿裏拋丞相。南極星邊伴老人。雙鶴對眠雲帳月。五芝催耨雨巖春。支離舊客公知否。私計東山作近隣。第門行馬護清埃。拂席時時宴具開。安石風流今日是。平津賓客幾人來。幄中謀熟君籌在。川上身閒汝楫回。絕俗新章滿都紙。尙時疏傅定無才。

寄獻南京致政杜相公

調元罷後久忘機。三見東山拜詔時。公引年後凡三進秩言在典謨經舜問。規留廊廟許曹隨。人間歲月尊黃髮。方外謳謠續紫芝。舉酒祝公千萬壽。逍遙長與赤松期。

答安陸王工部早春郡園見寄次韻

五馬新回金絡頭。方春稀訟釋南囚。荆岑漢許聯形勝。渚月臺風遞宴游。自許良辰偏有感。不知清唱遂無儔。比來酒所聞相憶。對倚層城近此樓。

送劉學士守衡陽兼還故里

名帖唐家十二時。囊封自乞阮咸麾。三行牛酒過鄉墅。九向雲山駐使旗。蘭露夕薰歡潔膳。桂風秋遣怨叢枝。不應晚計還臺約。紫掖深沈竚演辭。

晚秋北園二首

寂寥臺榭使君家。日涉中園到日斜。林下歸心紛似葉。菊前衰鬢晚于花。支離粟飽寧無愧。漫漶書成未足誇。猶有一杯相伴在。判從鷓鴣耗年華。午陰初轉歇餘喧。暫到高齋一凭軒。蒲芡因依殘漲沼。棗梨狼藉晚秋園。輕涼著衽如堪掇。靜境畱人自不煩。須信吏中逢隱趣。隨宜鮭菜伴芳樽。

過洛陽有作

鬱葱喜氣抱天迴。飛柱門深拂曉開。樹綠遠隨馳道出。塵清曾傍屬車來。霧中溫洛浮仙牒。雲表神崧薦壽杯。何日東都參第賦。班生猶是令蘭臺。

聞中山公泐上家園新成祕奉閣輒抒拙詩寄獻

爲樂東平得再麾。公兩鎮別營層閣駐經幃。溢囊祕簡青皆汗。署榜宸毫白正飛。公常削奏于上求飛

喜客來銜酒數。畫疑仙去啟廚稀。門前卽枕春溪路。幾曲歌成使舫歸。

移病還臺凡閱半歲乃愈始到家園視園夫治畦植花因成自嘆二首

十年獨漉走天涯。耗盡流光得鬢華。猶喜此身隨社燕。擬將何面對林花。牢槽續罷文誰讀。塊壘澆平酒

自賒。舊隱不須相掉罄。齊人謂相要須歸種邵平瓜。

臥治無功賜告回。驟叨鳴履上中臺。病中改壺公天壤非真死。術士李士寧來謁予病曰公殆矣形神離

作終制以訓兒息明年至期不死而愈明蒙叟軒裳是儻來。經灌早蔬扶隴出。失刊園菜犯簷開。此身疎拙真丘壑。不是當年

王佐才。

### 送長兄遊隨陽

漢東煙樹露蟬嘶。迴首周南涕易危。梁苑謾傳居右賦。扶風誰識最良眉。仙巾雨墊愁懷路。素壁塵凝憶

問詩。他夜夢魂知不遠。蘧蘧長繞越禽枝。

### 假節

誤持軍印攝中牙。朔雪添成兩鬢華。大抵不侯寧戰罪。由來寡要是儒家。山南近暖先迎日。樹北緣寒晚

作花。歲晏知非宦情薄。潁田歸興滿蒼霞。

覽從兄咸劍池編〔案〕咸字貫之建安人其著述有劍池編詳見李觀集

競爽吾宗屬俊翹。凌雲辭氣剩飄飄。十年締思輕僉賦。一骨評風壓楚謠。縱玩書牕迷野馬。長吟秋社續寒蜩。夫君自有何郎恨。枉使東陽臂肉銷。

少年

關外車徒籍籍歸。章街柳色綠如絲。薰衣別館香三日。卜夜重樓燭九枝。雪市雲迴翻祕曲。蘅臯波暖寄微辭。十年酒美俄星弁。肯信尙書對有期。

自詠

四十爲郎信倦游。虛名韁鎖太悠悠。危心正似葵傾日。衰質先于柳望秋。要路風塵疲驥足。故潭煙雨廢槎頭。穎灘漸報耕疇熟。終乞閒身守一丘。

上都頻見歲華陰。偃息由來本茂林。醉若有鄉須裂地。吏如逢隱卽投簪。予聞南方山水殊勝常有遊宦之願以歲限未滿不收陳請

銜無竄數知容冗。病似支離亦挫針。況自疏家兄弟約。他年獨鼈故溪溇。伯氏尤樂靜退嘗有詩戒予云獨鼈故溪溇

誤懷手版應弓招。汨汨塵容葆鬢凋。潘拙本無鄉曲譽。嵇鶩偏恃母兄驕。雨畦菘葉晨羞薄。風竈茶煙午睡銷。縱到北山堪自笑。春蘿秋桂久寥寥。

聞王侍郎請老

未老辭榮上所褒。官閒猶寄白雲曹。海邊人樂驅先下。龍外天多鶴始高。此路逍遙真有趣。他年侍從信爲勞。清商弟子歌聲妙。誰拌揮金引凍醪。凍醪即詩所謂春酒介眉壽者。

步藥北園

倦持塵簿著綸巾。清眺城隅夏物新。幽鷺儀容高似客。晚鶯言語巧于人。雨邊斜照猶銜嶺。風後餘涼自舞蘋。天借使君仁智地。此來山水更相親。

將解職抒懷上郡守

空函檄草聚浮埃。日愧西園綴上才。著帽每容司馬進。脫巾多伴使君來。孤根易變江南橘。歸夢先隨隴首梅。惟有酬恩無限淚。異時應濺別離杯。

抒懷上南京常山公

緇帷悵別倏經年。榮路心危重惘然。寧死道邊終自真。狂歌河上欲誰憐。魂隨夜蝶星垂地。信斷秋鱗水接天。早晚承明慶三入。願持雲漢續遺篇。

段釋之客都下作詩道其懷

密雪天街客履穿。更將羈思敵彫年。無人載酒誰同樂。有物燒愁便許燃。膈臆文章千牘上。蕭條光景二毛邊。我能知子今何賴。無用長于馬腹鞭。

獻外臺王侍御

濫陪坐諾已三年。始望霜威紺弩前。舊業久辭南郡帳。深恩獨戴故人天。頭欹解散慙星弁。南史王儉腹飽侏儒費月錢。欲託牙琴懇真賞。流塵無奈晦么絃。

送蔣御史漕江南

柱後峩冠久未還。江南行府使旗鮮。陳陳洪庾催輸粟。往往吳山卽鑄錢。暝月早霞千里國。廢樓殘社六朝天。時清憲筆無彈劾。供助騷人藻思妍。

荷花

晚雨跳珠萬蓋勻。紅房高下照池新。採時雙艇須加槳。行罷微波不見塵。解把清香貽密坐。忍將芳意付蕭晨。如何老帥殘風味。三占秋英作主人。

翰長再有北門之拜

病褫荷囊避禁闈。彌年專氣養瓊枝。仙都去後桃尋熟。溫室重來樹更滋。宮月舊蟾涵靜滴。武泥前劄燥殘芝。寶釘賜帶輝腰組。尙苦春來幾眼移。

景文集卷十四

七言律詩

李處士

江天退臥久沈冥。秋入顛毛翠葆驚。原憲桑樞貧不病。子真崑石老歸耕。樵風挂席晨昏至。屐齒登山上下平。邠稻已收霜橘熟。深心寧逐徹侯榮。

學舍諸生罕至。或累旬倚席不講。愧而成詠。

直舍沈沈掩迥廊。學官直舍列于兩廡。古壇槐柳對蒼涼。一囊有客愁饑死。三尺無人問喙長。瞑據槁梧真用拙。束

歸高閣分深藏。日斜廣陌驅歸鞅。更似笞箠作漫郎。

寄題相臺太尉韓公畫錦堂

瑞節前驅畫錦身。堂成署榜示州民。遷鶯賀燕翩翩集。大樹甘棠次第春。漳岸夕波通沼溜。魏堂暎日弄梁塵。君看千古青編上。得意如公有幾人。

秋日射堂寓目呈應之

射圃雲棚枕庾園。危亭虛白敞南軒。霜柯橘嫩金衣薄。風沼荷傾鈿扇翻。謝枕吟魂迷帶草。嵇襟真慮屬

堂萱岸巾畫日聊相對。坐聽凝笳出繚垣。

偶作寄季長學士

已是南宮素髮郎。尙持衰味對風光。愛吟詎敢追梁甫。倚醉時能問葛彊。才苦空踈殘史牒。分從澄汰襮衣囊。江樓夜月清高地。試問同君一據牀。

送常州陳商學士

紅梨秋老石渠霜。併欲蕭蕭伴祖觴。臺上襮綾收柘枕。水邊古獸得鞶囊。浮雲竝蓋辭京輦。曉月將潮促使艎。綠飾有文成政速。剩儲靈氣茹芝房。

寄會稽天休學士

鼻乙天遙水驛長。笠車貪貳會稽章。風從射的迎仙舸。水是山陰作禊堂。鈴閣宴盤留薤白。書林官筆燥雌黃。庾郎于此情非淺。應許諸人共據牀。

寄弋陽王學士

新年給札漢家臺。愛伏枚臯受詔才。假蹇不隨虞弁進。棲遲翻逐阮塵來。倡優技拙飛觴淺。寒具盤空祕畫開。早暮傳車趨一節。敝冠猶望振窮埃。

喜得當塗葉學士手筆



隨岸秋風慘別祛。崢嶸歲晏得雙魚。定因南浦傳能賦。卻到西河問索居。夜月連江金液動。曉山圍國鈿螺疎。端倪欲報懷人恨。滴盡瑤蟾尚有餘。

送越州陸學士

梅天霞破候旗乾。鄉樹依然越絕間。挾策當年逢掖去。懷章此地繡衣還。亭餘內史浮觴水。路入仙人取箭山。牛酒盛夸先墅宴。不妨春詔得親班。

陝府祖擇之學士

白髮書林作丈人。陝郊迢遞駕朱輪。謾誇燕許文章手。未得嚴徐侍從臣。列岫倚牕吟樹曉。亂花窺酒宴堂春。幾篇新詠留珉刻。首記鑾輿八月巡。

和待制龐學士寄獻宮師相公之作

溢榮清溜接家田。白首辭榮鉉席賢。直使斯人歌畫法。後容吾黨記歸年。五禽習戲探仙術。萬法觀空證佛緣。聞道巖谿春更好。許誰飛蓋奉周旋。

河南希深學士

洛霧嵩雲滿眼春。仙郎清路擁雙輪。卻陪賓客趨東閣。已爲陽秋得素臣。淵祕圖書探漢舊。地交風雨訪周人。歲時獻壽嚴君府。誰見家庭玉樹新。

寄臨江知軍劉子先學士

文惠祠前旌旆飛。茫然南望涕橫衣。勤勞塞外凋雙鬢。蕭散江頭把一麾。都水酒樽花下倒。子先判都水監。予爲屬官。屢醉青塘釣艇中。青塘。子先所居。予嘗詣之。與子先及虞資道同泛小舟乘月方歸。薦書繼上公憐舊。何力酬恩與意違。予繼蒙先

送楊學士三首并序

某聞望之補郡。常雅意于本朝。長孺爲郎。每注情于禁闥。皆欲恢明景化。徽序懿綱。宣碩惠于政經。奉清光于晝接。前聞盡在。茂躅可徵。恭惟學士。淑問熙朝。英猷秀世。頌條列土。重季布之股肱。陪議外庭。湊吾丘之智略。果膺綠詔。入覲紫宸。蓋丕績以上聞。表清衷之彌屬。飭東方之騎。飛鞚載嚴。趣舍人之裝。輜軒旣御。而某夙叨恩紀。敢嘿頌聲。才愧巴人。莫預彌高之唱。惠同嘉樹。願廣勿剪之謠。謹齋沐成七言四韻。送行詩三章。繕寫捧詣客次。祇候陳獻。理非逮意。言且無文。甫成怫悅之辭。少係中和之作。

左幡彤赤抗前旌。捧詔西歸覲大庭。漢署餘香薰錦帳。唐家新政紀雲屏。迎秋畫隼開朱旆。別夜哀烏動列星。從此回翔宸渥厚。冠綏清曉俯階墀。

青絲千騎漢臺郎。入奏星藩解郡章。荷橐再親文石陛。班春初捲赤帷裳。百壺帳飲杯醺醺。一劄泥封詔檢香。幾日西清勞侍從。鬱葱佳氣接明光。

觚稜初日九天開。躡蹠桑郊五馬迴。羣玉三山藏冊府。偃壺雙筆給中臺。編堂舊政盤留薤。畫省新辭砌

有苔闕里諸生彌屬望。雪園他日待延枚。

題景陵乾明院湖亭

東眺湖波十里平。竹椽疏舍瞰澄瀛。山花暗落談經地。水鳥時聞念佛聲。薺樹繞天春色晚。綵雲垂地夕涼生。後車官冷曾過此。祇得幽人笑縛纓。

秋陰

擁棟溪雲暝夕霏。蕭辰寥落意多違。寒蟬自爲齊王怨。歸燕長逢阿母飛。杜若汀洲殘綠暗。芙蓉池沼墜紅稀。流塵滿席賓綦絕。誰問西河戰勝肥。

和葉道卿連日陰晴坐曹無緒見寄

霧著青旗燕尾斜。輕陰連日徧天涯。上林已暖先催鴈。細柳猶疎不礙鷗。積潤未妨鏗畫瑟。薄寒仍欲定流霞。問君何事貪官事。只倚雕章念歲華。

和中丞晏尙書春陰

輕寒剪剪著春旗。樓外晨光已暗移。小霧不還添柳弱。餘寒未去惱花遲。幺絃促柱愁成曲。遠水迎船巧作漪。誰在河橋望歸客。莫將雷響誤輕輜。

題翠樾亭

茂樹交軒地不塵。江光野氣望中新。客來魚鳥皆知樂。夢罷池塘併得春。烟竹有痕時拂戶。風花無意自飄人。當年幕客今追恨。不共山公岸醉巾。

夢野亭在景陵集仙王君爲郡日所創

州堞巒岼迴勢回。一暈斜翥四軒開。晴光獵草雄風度。曉氣浮江赤日來。望極長天閒倚杵。醉殘巖角暝休梅。須知故楚多餘感。剩費登高作賦才。

送連氏昆仲還省侍

〔案〕宋史隱逸傳連庶字君錫舉進士弟庠字元禮亦舉進士在鄉里時宋郊兄弟皆依之

酥酪君家伯仲賢。相從黌舍倏經年。三卮酒薄難爲聖。一腹書空但喜眠。庾信刻筠懷舊塢。隱侯題壁有新篇。糝甘調滑思歸養。溢握陔蘭照露鮮。

秋夕池上

楚江楓老樹無烟。池上悲秋一惘然。素蚌虧盈長伴月。戲魚南北各依蓮。風驅野燐寒爭出。露警臯禽怨不眠。伏檻臨流未成下。紫荷聲外轉珠躔。

屈原祠

楚江南望見脩門。靈鼓聲沈蕙捲樽。五日長蛟虛望祭。九關彫虎枉招魂。蘭荇獵翠淒寒露。楓葉搖丹嘯暝猿。賈誼揚生成感後。沈沙投閣兩銜冤。

州舉俊民以藝中第爲詩馳賀

會聯郡將署鄉書。日見函關賣出符。奏頌一揮雲落紙。賜袍三浴蕙飄爐。高軒竝照連乾錦。飲膳分頒萑  
莆廚。病幕日期迎晝繡。塵容甘預弩前驅。

澠池道中

月樞殘白伴征輪。雪嶺蕭蕭久墊巾。此去崤函天設險。古來京洛地多塵。翠含山氣猶疑夜。紫動林梢已  
放春。自笑衰翁應分定。寵光行役兩平均。

屢乞近郡詔不許

避賢求假左朱輪。衝石通章觸罷頻。十駕似驚寧取道。五能如鼠不藏身。危心事國區區在。短領侵年種  
種新。君惠轉深無報日。長教猿鶴怨歸人。

祇役鄰郡道中曉發

故園回眼隔雲羅。野馬征塵拂袂過。息影有時悲惡木。回車無暇避朝歌。風號萬響天衢籟。山矗千頭佛  
國螺。遊子行行歸計晚。庾心一寸奈愁何。

將道洛先寄太師文相公

兩鬢蓬飛歲月侵。收還祕殿上恩深。烏毛落盡那勝彈。古善彈者毛盡禽不死。桐尾燒焦敢望琴。前日化工依大冶。

守蜀改官。今茲舊物特遺簪。塵容喜接熒煌座。未忍公然動越吟。

登樓望郡中美人物之盛

曉色書烟萬瓦間。飛譙極望盡通闌。輪音鬧過叢臺市。歲計多于畏壘山。獵路向寒鷹眼疾。戍亭無事犬聲閒。邑民訟息風謠樂。坐飫雙雞止厚顏。

送史溫虞部佐郡四明

外署清郎出佐州。嘲辭不畏上山頭。天中倦目迷雲闕。江上歸帆避石郵。佳設自隨賓早晏。還書寧畏渚沈浮。嚳田越鑄農知勸。時伴春旗暗綠疇。

有詔解郡作

二年憔悴擁州旂。尺詔初容覲帝暉。何幸復燃灰不死。未應爲失馬重歸。蛟螭對舞瞻層閣。翁仲雙扶識故扉。病骨多憂鰲黑甚。豫慙臺史與薰衣。

塵晦荷囊裂舊縫。驚聞臺召計怱怱。忽從楚水楓林下。還入甘泉豹尾中。卽日遂收西望涕。方春便趁北歸鴻。休誇四入高涼地。已是人間素領翁。

送太常邊博士守永嘉郡

稷野英僚抱薊新。東甌假守左朱輪。吳刀列衛州儀盛。越鑄催耕海葑春。萍渚日華搖使旆。蜃天樓影暗

潮津射堂西出賓簪樂。飛盡歌梁幾夕塵。

送薛學士伯垂同理嘉興郡兼簡太守集仙柳著作

廣內多年鐵櫓摧。監州新命詔函開。河東世擅鷓鴣譽。江左人瞻竹箭才。卽席離弦淒鶴韻。幾程殘魄晦珠胎。興禾善俗蓬仙友。剩舞吳歛恥宴壘。

謝都官監建安郡

郎署新疇出宰功。海閩關夾使旌雄。晨塗倦伏雙毫奏。暮席貪隨五兩風。芳薜摘山唐貢遠。藁魚升豆漢祠豐。漢以乾魚祀武夷君。賭囊貴胄膏腴盛。麗唱行聞溢褚中。

江瀆池亭

一翬掀翅壓溪隅。吏事初閒此晏居。斷岸有時通略約。輕風盡日戰枰欄。雲鴻送目揮絃後。客板看山拄頰餘。菱碧蒲青來更數。江人多識使君旗。

古意

博妖齊詐取侯封。褒貶都歸竹帛中。三虎有無空逞辯。一狐埋伏妄貪功。輪囷自許先枯木。首鼠何曾忌秃翁。堪笑雲羅彌藪澤。不知天外有冥鴻。

寒食野外書所見

一雨初回逗晚涼。近郊連畝儼相望。乞漿易醉墦間客。就養初閒竈下郎。暖吹未休緣迴野。低烟不散爲垂楊。家家鐘鼓爭行樂。肯信龍蛇是怨章。

將到都先獻樞密太尉相公

再試州旗驗不才。卻將憔悴到中臺。相車問罷同牛喘。大廈成時與燕來。守壽春日。方聞爰立之拜。今日謀猷須丙魏。他年賓客但鄒枚。西園聞道餘春在。尙及花前灑灑盃。

送太尉相公赴鎮安軍二首

連章得請避洪鈞。赭案除書天下聞。久冠鵷鷺爲上宰。別驅貔虎作中軍。單車款曲懷遼帳。前年遣使契丹。復修盟好。

一燧平安出隴雲。今年夏人盜首歸罪。今日朝紳回首看。始知知退是元勳。

碧波三宿暫沿洄。豹尾雙驅大旆開。堂上謨成蕭宰去。人間事少赤松來。巖霖舊潤爲軒雨。醴麴餘甘作宴醅。下客無緣陪後乘。只應前席欠鄒枚。

答龐丞相

安車就第上優賢。不使當關損晏眠。勳重舊更三府地。體強初過六身年。游籃淨貯茶經具。醉幕閒垂酒頌天。獨念相如久稱疾。時時令預雪臺篇。

宮保龐丞相以詩見寄次韻和答



本乏微功輔斗樞。避賢仍忝領州旗。病依一室由旬坐。文殊問疾于維摩。設師子坐。高八萬四千由旬。以待諸菩薩。室中殊不逼隘。四十居。憩石雨苔同髮短。嘯軒霜竹伴心虛。掛冠尙有三年調。高躅空瞻廣武廬。老愧專城

送張司勳福建轉運使

晚花吹酒送行人。迢遞風烟上七閩。江海身孤雖戀闕。豺狼路靜不埋輪。陽林擷露茶腴早。側樹烘霞荔子新。毛竹乾魚仙祀古。請君尋徧武夷春。

送友人赴舉

玉樹扶疎入紫烟。鳴騶偕計望甘泉。十行深詔言成綽。三道摛華藻挾天。澤國東風占鵲喜。杏園初日待鶯遷。自嗟擁鼻沈冥極。生看青雲著祖鞭。

送令狐秀才赴舉

薦衡上表獨垂蜺。密雪梁園逼賦期。秦市千金懷拱璧。舜韶九奏待長離。劉楨病久曾淹臥。宋玉才多故剩悲。幾日繡衣榮白晝。郡章驚絨駟車馳。

孫景隨侍赴舉

蠟鳳當筵占美名。文齋大被集時英。人同潁水將車樂。賦待尙書給筆成。鄉酒出郊浮蠲醕。故林馳霧暝猿驚。省知唱第薰雲幄。歸夢因君到斗城。

黃注昆仲赴舉

君家日下有高名。驥子雙馳嗣世靈。滄海賦毫多灑白。南山書簡偏蒸青。縣歌酒醕催鳴鹿。學舍練寒亂散螢。崑玉林枝期帝問。差肩唱第邇堯羹。

送朱進士赴舉

漢家廉詔舉翹英。銀紵觀賓望斗城。北地高門傳玉節。先太傅累持節西京舊學祕兮籊。郵亭續食星軺急。嶺路馳烟月狃驚。幾日東歸榮畫錦。度關遙識棄繻生。

答轉運王工部謝公醪

老依渦曲作藩侯。月例黃堂給宴醕。敢把百壺夸顯父。且將三品敵荊州。味新聊稱長螯蟹。酌淺尤宜小樣甌。珍重故人貽麗句。縱傾家釀若爲酬。

提刑張都官回文詩

歡餘惜對清談劇。遠路行嗟又愴違。寒螿酒空催客別。曉驪歌罷怨人歸。乾風擺柳衰條短。驟霰迷鴻側陣微。殘歲念君同恨恨。麗章貽我慰依依。

祇答延州安撫吳宣徽

共看仙山玉樹秋。慶歷癸未歲予與公同在翰林從簪朝笏記同游。調元遂慶登三府。公卽徧歷樞臺抱袞惟堪讀九丘。予避清要侍讀

迄今十年。重印垂腰榮擁節。公奉征鞍摩體忝爲州。自謂如何卻舐投殘筆。敢與陽春接唱酬。

李祕校省覲畢卻赴乘氏

謝過香囊奕思餘。短亭噉景駕驪駒。客盤飲嗜豐千踈。仙鳥歸飛伴兩鳧。官柳搖搖榮早絮。縣花的的照晴跗。東陽玉骨春偏瘦。省對霞朝憶上都。

陳濟赴舉兼省覲

相從同是日邊人。兩見江南碧草生。馮缺車魚初倦客。梁山風雨苦思親。虹橋刻柱前盟苦。獸錦裁囊麗曲新。袍雪紛紛君莫顧。漢皇終自識平津。予與君孤立諸儒之間。道之行否。惟天所相。

同年梅鼎臣赴鳳翔幕兼省覲

時君家學士鎮分陝。

酪和盤櫻舊宴空。鳳岐新辟逐旌弓。坐陪府幄談成藪。趨問家庭史有公。春罌促浮萍葉紫。夜章催刻密枝紅。青袍玉骨英游盛。上路爭看側帽風。

梁子材宰葉州鄭縣

歲滿林光會計期。天緡還賞動慈帷。貪榮壽母陔蘭養。不過忠臣坂道危。君遷兩使職僚。三銓擬官蜀道。君願還賞。乞試銜宰邑。侍親于近。雲表晨鳧翻鳥影。齋中夜鶴應琴絲。未妨休沐邀清賞。市霧峯蓮共蔽虧。

北樓

危樓孤堞共巘岼。怒激號風結暝寒。校尉登臨非廣武。王孫回望卽長安。來麤蔽隴蹊牛下。密網橫山獵騎攢。梁霰楚氛催歲晏。有人惆悵悔憑欄。

轉運李宥學士

棧外秋高薺樹繁。一星飛影伴轡軒。屬城導騎賓歌密。近野迎漿蜀老喧。濯錦萬梭催貢篋。熬鹽千井算牢盆。行臺自昔書林寵。不爲傷離更黯魂。

送江西轉運李定度支

江西使節擁朱輪。正用中臺鶴髮人。漕米爭銜千鷁舶。卽山催鑄萬扶緡。宴齋螺岫披雲出。醉館星苞照露勻。雙筆詎能藏藻思。落霞孤鶩向蕭辰。

送王太尉被召歸覲

漢廷擇日築韓壇。綠詔連催覲帝關。十乘元戎方叔貴。九天鳴鼓亞夫還。袍薰瑞氣葱葱外。仗入清塵九九間。好爲君王言敵事。早將功業勒燕山。

景文集卷十五

七言律詩

春霽

一雨初晴小霧披。海天羊胛報晨暉。寒消豔雪沈樓唱。暖入重簾御袷衣。柳外輕黃紛漠漠。梅梢殘白悵微微。烟臯笑電無窮樂。行御鯨牙逐錦鞮。

寄鄂渚胡從事

紅蕖薰幕得僚英。膝下斑裳捧檄榮。露茗一槍蠲蜀渴。絲蓴千里佐吳羹。駐車吏識官橋柳。作賦人傳隴坻鸚。夜席兩宮求士切。天官寧復帶糊名。

成都

風物繁雄古奧區。十年僮父巧論都。雲藏海客星間石。成都有一石人。傳嚴君平所辨星石。今在嚴真觀。花識文君酒處壚。兩劍作關屏對繞。二江聯派練平鋪。此時全盛超西漢。還有淵雲抒頌無。

寄題滑臺園亭

有處行春住杏韉。列亭相望鬪鞏聯。花銜曉圃三竿日。樹遶洪河一曲天。芳草細迎吟路屐。翠篙徐轉飲

溪船勝遊惠政成雙紀。乞與州圖後世傳。

史逸人

菑停滯穗壤餘蔬畝。首東南樂隱居。席地雕觴千日酒。振緡丹水百金魚。潺湲弄月蘋汀晚。嗚噤調琴菌閣虛。霄外高情思把袂。西疇何日一巾車。

送保定張員外

傾座仙風冠穎奇。枳鸞移調位猶卑。蘭薰夕膳三林案。君榮侍二親而行草妬春袍一綵絲。烟戍星殘低序鴈。隴

天雲斷送歌驪。報成結課行堪待。慰薦連章達帝帷。

歲稔務閒因美成都繁富

岷峨俗美漢條寬。野實呈秋照露寒。賣劍得牛人息盜。乞漿逢酒里餘歡。錦波濯綵霞湔浦。磴浪催輪雪沸灘。告稔不須騰驛奏。自應銅爵報長安。

蘭軒初成公退獨坐。因念若得一怪石立于梅竹間。以臨蘭上。隔軒望之。當差勝也。然未嘗以語人。沈吟之際。適髯生歷階而上。抱一石至。規製雖不大。而巉巖可喜。欲得一書籍易之時。予几上適有

二書。乃插架之重者。即遣持去。尋命小童置石軒南。花木之精彩頓增數倍。因作長句書以遺髯生。

聊志一時之偶然也。

竹石梅蘭號四清。藝蘭栽竹種梅成。一峯久矣思湖玉。三物居然闕友生。賴得髯參令我喜。飛來靈鷲遣人驚。小軒從此完無恨。急掃新詩爲發明。

白兆山寺值雨呈同坐

飛軒憑望俯丹梯。星雨囊風暝夕曦。翠阜天遙雲待簇。紺園花老樹低枝。巾車預畏烟疇迥。蠟屐先憂磴道危。未似庾公年最少。桑郊盤馬帽簷敲。

祇答洛臺資政房春卿侍郎

青綾襍罷歇徐薰。麈吏多年嘆不文。病合避賢拋內署。老堪爲帥忝中軍。聲名已愧空如餅。富貴原知薄似雲。多謝翔鸞念籠鵠。不然誰信舊同羣。

答屯田齊員外見贈

淹臥清漳續畔牢。平時賦筆謝登高。決科漫欲當三道。作頌何曾敵二豪。久侍經幃慙肉緩。驟歌樓雪覺心勞。兼金滿橐萱憂釋。空仰文星在漢曹。

送馮彭寺丞長興知縣

天外仙鳧鳥影翻。河干畫鷁棹聲喧。奇才欲向菰蘆國。麗賦空留霰雪園。短柳搖搖迎去袂。初花的的伴離樽。汀蘋續賞饒清思。爲拂吳興舊墨痕。

寄贈高知縣

綠髮如雲艾綬青。絃歌百里久沈英。琴臺滯訟投刀釋。月觀雕章夢草成。紫芋蹲鴟編富籍。飛觴浮蟻析朝醒。何當入會甘泉計。玉樹扶疎倚太清。

送梅學密赴并州

連天橐筆侍天臺。始見東方畫隼開。路避晚風嶠外轉。人瞻冬日絳中來。笳簫後隊聯幽俠。壁馬中軍聘楚材。自昔河東股肱地。不應歸節嘆淹徊。

送河中司馬待制

從祀天壇歇翠薰。西門征轍愴離羣。暫違冊府三重閣。先過樓船一曲汾。寶炙擊魚開左席。戲壺爭馬宴中軍。鶴樓西北懷都思。盡日憑高不礙雲。

抒懷恭答待制施正臣

誰謂斯人玷玉堂。憂懷易得復難忘。素書不答還堆案。長簟無情但竟牀。涸思論文成軋軋。流年著鬢有蒼蒼。病襟殊忘支離醜。爲恃君家白雪章。

喜屯田凌員外至

昔歲裁詩送爲郡。今年把袂喜還臺。逾妍賦筆悲秋罷。寂寞衣囊被謗迴。勁節肯凋霜外葉。驚湍須畏岸



前堆撫塵舊友今皆在。笑口何妨爲數開。

寄連元禮屯田員外

憶共西州把酒卮。酒酣風味未全衰。人驚李郭同舟日。句索羊何共和時。省帳飄香君覲早。篋書騰謗我歸遲。予留爲鄭他年會面須驚悵。瘦盡崑山玉樹枝。

張生南歸

謁舍修容倦刺毛。紛紛采紫笑銀袍。吳天破月愁歸晚。楚俗傷春忌唱高。江步挈舟雙打槳。酒亭橫幟一持螯。平臺鄒馬英游盛。霏霰連天待賦毫。

冬夕酌酒

艾夜更壺幾沸殘。尙持杯酒禦輕寒。半分沈令傷多瘦。數刻劉郎惜暫歡。天外月痕迷倦鵲。庭中霜氣伴衰蘭。接羅不倒糟難藉。坐見丹煤委燭盤。

答常山屯田張中行寄贈

紫荷焦脫燥宮毫。萬里邊霜擾鬢毛。不稱衰年開幕府。只堪平世掾功曹。飛蓬轉野初無定。瘡鴈驚弦久未高。猶有一愁何計奈。擲硿難報美人刀。四愁一曰美人贈我金錯刀。何以報之英瓊瑤。

答郭仲微以予記注見慶之作

曉趁霞暎立殿螭。翠凹濡墨慶逢時。褚生徒記爲郎事。方朔猶慙待詔飢。目極天關趨窻窬。步依宮柞蔭華滋。故人雅意相憐厚。親唱陽春護草衰。

送袁進士赴舉

秋郊帳飲曙烟銷。素籥涼颺滿沆寥。南國大沾三獻玉。西京催駕一封輶。頻年衣敝緇塵化。幾夕文成密雪飄。奏御前期深底處。紫清仙闕鬱岩嶠。

次韻宮師相公答太傅相公秋書

巖樹蕭蕭秋興歸。師臣仍此褫朝衣。羽觴聊欲同賓壽。玉體何曾待戰肥。風圃薄寒浮醉衽。雨滌新浪拍漁磯。清篇自有夔龍舊。方外相從屏世機。

登樓

百尺危樓照綵霓。憑高不見羽人歸。桑田海上悲深淺。城郭人間歎是非。急檣征帆來未定。遠雲低樹去相依。古歡今恨成多少。詎減江聲與翠微。

送元諍歸中巖并序

予昔家景陵。與師同預北禪祚公法席。後三十年。予守成都。師自富順監肯來。洒然話舊。昔之壯也。今瘁。昔之鬢也。今華。師雖忘懷。予不能無感。俄而告還。作詩一解。以慰其行。

景陵同坐貫花筵。日月飛馳三十年。兩股尋回江上錫。一燈分照劍南天。巖雲護鉢龍降呪。林露侵衣鶴警眠。此地相逢須重別。在家靈運已華顛。

同年王聖源南都講授聖源嘗以事免職

刻意悲秋髮未華。諸曹頻費杜陵嗟。歌緣郢客高難和。璧是秦人誤指瑕。綠底恩書褒振滯。烏衣羣從慶還家。離宮萬戶經庠盛。卻對諸生坐絳紗。

守塞三年上北京。留守賈相公

天心北顧倚長城。上相元戎兩印榮。雞羽靜沈傳處檄。虎皮間裏戰餘兵。河朔兵甲盡貯北都武庫。九宵冬日人蒙惠。

萬耒春霖俗勸耕。和氣愈充身愈退。只憂難避是功名。公屢乞閒郡。蓋避功名之地。

雨洗星街夜禳空。暫持魚牧守離宮。臯陶舊曲明良內。郤縠高談禮樂中。載筆後車雲蓋密。鳴鐃前隊錦構紅。不妨華髮千官上。始稱凌烟第一功。

暮春

伏檻臨堂更曲池。鮮風淡蕩燕參差。蕙殘已覺銅盤冷。梅落猶煩玉笛吹。拂世只愁衣帶緩。當筵但訴玉杯遲。羲和辛苦真何益。不放金烏宿故枝。

感懷

俯首周南淚未乾。驚開魚素得雙盤。心隨月樹烏三匝。病費仙山藥一九。久許橫經陪闕里。更憂舉步學邯鄲。髀銷衣緩風波苦。鴻陸歸飛燕廈寬。

續抒感懷

出案屯營臥治州。黃雲三結塞垣秋。敦詩未必真謀帥。有恨何妨老不侯。百慮參差非壯境。一樽寥落但邊愁。此時自躍知無愧。萬物爐中許見收。

官廩月錢不足經費

俸微纔給斗升儲。煬竈烟沈乏爨蘇。下澤出游無款段。長安飽死羨侏儒。病杯殘蠹分蛇影。夢管流塵晦鼠鬚。天極包荒恩未報。敢隨張翰憶秋鱸。

書懷

顏徒陋巷不堪憂。日晏南榮擁敝裘。已識交情一貴賤。寧論書置自沈浮。爭名在昔聞探穴。嗅餌何人肯直鉤。強欲誅茆啓三徑。邑中無客繼羊求。功成有意避齋壇。睨柱無瑕玉更寒。萬里長風收戍旆。三年零雨拂歸鞍。樽中酒美催高會。圯上書閒得細看。歲晏雪園賓蓋少。要須枚叟奉餘歡。

春雪

銀礫欺春亂眼來。重陰萬里壓平臺。光沈後牖將飛瓦。艷補南枝已落梅。池曲平翻冰共泮。山腰未積玉爭頽。長安併長旗亭價。蜀女當壚自滌盃。

春雪寄鄭府尹

風御憑空攬玉塵。急飄斜舞碎霏勻。九重闕裏都無夜。五出花前自作春。賸借薄寒添鴈夕。強留餘晦惱鶯晨。須知柳絮紛紛態。迷殺章臺便面人。

看雪

慘淡繁雲密霰狂。結瑤城堞儼相望。偷尋柳絮思隋岸。誤折藜光認洛陽。斜透綺簾欺翡翠。旋迷樓瓦失鴛鴦。平臺賓客今何在。誰繼鄒枚從孝王。

望仙亭真酒看雪

雪壓春期蔽曙空。憑高把酒思無窮。光侵病鬢都成白。寒著醅顏久未紅。淮許亂迷珠罅月。柳園狂誤絮時風。使君醉筆慙妍唱。半落巴人下里中。

答通判張太博賀雪應期

親祝星魚裂繪綃。再旬方見瑞英飄。陰連臘底寒威在。潤壓春頭癘氣銷。碎粒有聲欺瓦屋。亂花無次惱林條。府中上客真才子。首爲常民續楚謠。

對雪二首

風過龍山萬里沙。密霰疎霞渺無涯。臺疑穆滿都成壁。樹憶黃奴併是花。曾許輕姿饒白羽。解將寒力減流霞。梁王不悅鄒枚老。同坐睢園念歲華。

縈叢著樹半瀟瀟。皓氣妍華混沆寥。爲倚風流偏解舞。故藏朝暉未成消。玉繩四徹仙峯迴。銀界三千佛國遙。向曙紛紛殊未已。九門知有謝莊朝。

和晏相公乘輿宿殿致齋日巡仗遇雪

天京飛雪灑車裝。九九清塵御路長。斜影不迷宣曲騎。薄花纔點羽林槍。觀邊麗色含鳩鵲。蓋外輕陰亞鳳凰。誰識憲驄巡趁盛。賜袍衝霰入林光。

和晏相公夜歸遇雪

孝王臺下糝花飛。草草歸驂驟碧蹄。斗作暝寒凌冒絮。更回餘舞拂鄴泥。城連迴闕迷蒼鳳。人度長橋壓素霓。頽玉正酣天幕靜。不妨清思入新題。

漢南都監官廨射亭

的暈遙連射圃牆。碧簾烟瓦鬪暈翔。庭中桂樹含春早。席外簾衣拂地長。鱸縷薦盤編項縮。酒杯行算蟹螯香。主翁綬帶多歡極。賓轄沈聲在井牀。

寄獻許昌晏相公

右輔風烟接上都。功成番愛駐州旟。爐經萬物爲銅後。田是諸侯假璧餘。合宴金匏催大白。當年賓從照紅蕖。向來病守成惆悵。不預懷鉛奉相車。

絕葷

多年臥病厭腥膻。香飯初依竺國流。宣父蒲菹真可學。鍾馗蚶蠣更無求。爐銷午篆天花泊。几隱宵燈偈葉留。割肉魚羔非我事。此身今悟一浮漚。

寄題眉州孫氏書樓

魯簡多年屋壁藏。始營輦棘瞰堂皇。髮廚四匝香防蠹。鏤槧千題縹製囊。定與鄉人評月旦。何妨婢子誦靈光。良辰更此邀清賞。庭樹交陰雋味長。

南峴候館晚春有感獻郡守

春暉明淡上三竿。風苑愁紅邁蒂殘。夢後單衾凌晚薄。體中餘酒向醒寒。山梁嗅雉晨羞飫。楯鼻磨鉛藻思乾。深愧府公賓禮厚。不教持版預羸官。

三月晦日

靜彈塵幘照溪流。落泊春芳向盡頭。早葉乍濃留客坐。晚花猶在索人愁。最憐幽草能縈帶。已覺浮雲解

映樓玉髮未多須劇飲。羸輸寧屬阿戎籌。

夜宴

卜夜金華逼綺寮。星河垂地漏聲遙。吟龍遞怨先供舞。留鳳愁寒不傍簫。隔坐聯章催鏤管。分行度曲認金翹。平明便是驪駒別。莫使衣香即日消。

答燕龍圖對雪宴百花見寄

百花洲外六花寒。使幕凌晨把酒看。舞袂回風人鬪麗。醉山頽玉客留歡。斜霏北渚離鴻下。密灑東風寶騎攢。猶念平臺舊朋侶。遠將清句代幽蘭。

休日閱古堂小宴

宴堂叢檜倚晨霏。客在風清酒力微。曲沼新荷能碍釣。霽林濃葉不通飛。盤紛素膾魚腴美。齒漬寒津蔗境肥。一笑相歡無吏責。張扶應悟坐曹非。

陳奉禮宰四明

大庭聯袂挾英華。龍鳳池名在一家。鴈塔墨痕鴿繼序。桂林春色棣交花。袍薰茂草萋萋遠。檣豎歸風櫛櫛斜。靈越弦歌皆勝踐。遞膺清思賦餘霞。

答彭州職方朱員外公綽



四忝方州換隼旗。九番官樹老儲胥。淹留太史編殘藁。廢忘河東篋裏書。遠想淵雲才不逮。略通卬夔計  
仍疎。夢迴密友偏矜我。時損瑤音附鯉魚。

艤舟懷信亭

使麾得請印垂腰。不畏秋風病鬢凋。游子已攜河上手。客槎猶在斗邊橋。水從南浦傷離劇。馬近東方作  
意驕。曉榻夢回翻自愧。臥聽人赴午門朝。

省判李度支碩相過敝別兼述感懷

君趨召節向中臺。我滯邊州未得回。頭白羞論天下事。眼青欣舉故人杯。池蛟得雨鱗先動。霜隼乘風翅  
始開。見上若詢頗牧將。爲言儒帥果非才。

監中會兩禁諸公飲餞吳舍人梁正言富修撰葉龍圖以計省不赴作詩見寄

殊庭詔蹕斗車回。學省歌驪宴豆開。孺子橐閒同放筆。景山鐘暖不停杯。橋門細溜生寒沼。經市斜光落  
晚槐。捉麈知君非興淺。枉教華劇計籌催。

客自茂來言元禮日觀基劇飲

寒山倒影入樓扉。鈴唱悒悒少諍辭。左手持螯人嗜飲。一斑窺豹客爭基。萍游倦罽傷醒夕。星落殘枰鬪  
劫遲。日日忘懷還憶否。戍時瓜老是歸時。

冬夜飲散悵然有感

醜顏夜酌醕蘭卮。悵憶彫年事半違。雪墅隴雲寒寡色。霜天幌月暗通輝。素書有恨隨鴻遠。遽夢無成伴蝶歸。可得延陵重一聽。流波雅引在金徽。

東湖禪院

像閣緣雲一水東。鹿園珍樹蔽青葱。漂殘劫盡神池浪。吹去菱花講坐風。仙石拂衣寒起霧。層沙聚塔遠凌空。赤髭淨侶移談久。牛首青烟匝篆紅。

# 景文集卷十六

## 七言律詩

### 送客野外始見春物萌動

苑路高高雪作泥。始知春信到芳蹊。綠波水暖魚腮驟。縹色陂長麥首齊。萬里碧雲隨望合。半規紅日有情低。榆牙柳目相看數。枉是迴腸付解攜。

### 送客不及

祖齋難留十里筵。亭臯衰柳但長烟。班騅不及來時路。黃鵠空驚去後絃。曾是松心同歲晚。忍無梅信發春前。南樓漫作憑高計。望盡天涯更有天。

### 江上送客

十里長臯五里亭。天涯送月淚緣纓。洛辭但許凌波渡。桃曲猶煩用檝迎。遠信卽時勞裂素。客心何日免搖旌。芳晨莫遣歸期晚。碧草江南正亂鶯。

### 勸客

貂裘敝盡飲瓢空。身滯平臺勸客中。濩落本依莊櫟社。飄飄誤閉隴鸚籠。心緣遠別長依旆。髮近窮年已

付蓬素願祿儲過六百。雲羅天外有冥鴻。

登師利寺文殊閣

寶梯斜級上盤空。千里亭臯一眺窮。翠柰自生經苑地。萎花時墮佛天風。橋橫潁岸淙幽碧。日下嵩雲插倒紅。暫滌六塵憑檻久。可嗟歸御太怱怱。

中山公損疾二首

自有西京七發才。蠲疴不待更延枚。搃金廣樂迷魂寤。蔽月飛雲病膜開。宮鼠晦鬚拋賜琯。蓬魚霏縷強晨杯。何人過問維摩室。定有文殊作禮來。公深究淨名示疾之典。故疾間有讀維摩經詩三闋。申其妙旨。

懇避嚴廬十拜章。一麾重許出東方。批成詔鳳多焚草。戲入仙禽不亂行。麗正書編爭授簡。荊州象笏別持囊。絳帷有客悲秋早。預怯臨流奉祖觴。時公有肥川之命。

長兄冬夕遞宿偶成長句上寄

絳幘雞人唱夜籌。宿廬遙忖道山頭。夢思園吏成羈寢。書掩冤家倦對讎。雨閣氣昏蓮蒂井。燭簾光動蒜條鈎。孤吟一夕懷康樂。廣陌黎明望紫駟。

和王龍圖七夕直宿

二星秋早駕雲車。此夕聞君寓直廬。月在宮中穿線處。香傳樓下曝衣餘。橋烏徑度明河近。巢鳳歸翻暝

閣虛寂寞潛郎誰晤語。只應藜燭伴離書。

和宮師相公待制龐學士賢年二韻續川然兩字

龍樓一品亞臺聯。佚老歸來帝養賢。商皓嶺芝追隱伴。胡公潭菊得高年。客盤梅熟經調鼎。宴渚舟橫舊濟川。延閣裁章紆和曲。玉音風馭共泠然。

友人書齋

雩上鮮風拂袂過。訟庭談樹自婆娑。東家屋壁韋經絕。左氏門庭賦筆多。岫幌蟾蜍生夕露。墨池科斗動圓波。學詩夢草豐餘暇。萬壽稱觴醉弁俄。

感事

曹鼠秦車未足多。幾人曾此動悲歌。鴻心不慕冥冥弋。鳧脛長隨泛泛波。方朔一生游禁籞。彥倫終古老山阿。江淹若是真多恨。古往今來奈爾何。

答李從著作

身是雞翹侍從流。單車淮上老爲州。全生正似婆娑樹。不死翻成穀觶牛。今日空名同地餅。晚年歸計有瓜疇。慚君遠寄相思句。不啻三逢採艾秋。

朱舜卿南遊有寄

漢臯烟浪潑醅春。弭節江干一問津。南浦草平偏送客。大堤花晚欲留人。歸心怨逐搖搖旆。尺素愁迷六六鱗。湘冊聚螢嵇几靜。露軒香粉暗書筠。

賀紫微舍人改鎮

星翼分疆鎮上游。江山和氣擁行舟。芝房照露供盤劑。萍日橫波送棹謳。楚塞路長雲戀幕。孺亭天晚月呈鈎。漢家夜席歸期近。宮篋書空謗焰收。

送孫臯

江邊瑤草鬪袍青。所樂從軍得四明。新水一篙催泛鷁。故林三月及聞鶯。羽書無警棲毫熟。談幄多歡醉葉傾。我亦中都厭羊酪。爲傳秋思與萼羹。

送黃灝

橫步文林二十春。華顛初得半通綸。江邊又濯滄浪水。堂上寧招骭髀人。未分塵纓慚蕙帳。不緣羊酪棄羹尊。思家夕夢還都信。併附秋波六六鱗。

送張問南游

草遠花明溝水頭。同君此地併離愁。葢餘瓮酒沈三賦。合作盤鯖厭五侯。覺在他鄉應有夢。信非吾土少登樓。楚山不見西江遠。莫反騷文剩駐留。

送鄭天休

春筠蒸徧隨鋒摧。刻奏飄然別上臺。授簡客驚枚乘去。探書人繼史公來。爆桐度曲離筵慘。樵的分風使棹催。千萬禊濱傳善序。永和三月有流盃。

送馬房

百五天長甚雨回。祖筵離思冷如灰。騁辭雖苑繁雲散。拄頰西山曉氣來。草色不須爭去袂。花光正欲傍迎醅。相君臥鎮羣英集。一府翹然用楚材。

三月四日玩園花小集

中園愛客重游陪。三月林花落復開。鏤管喜傳吟處筆。白波催卷醉時杯。歡襟已快邀風度。舞地猶寬放雪回。不是年芳相假借。使君兼乏斐然才。

春夕雨歇

江雲夜雨過前墀。菌閣微涼縠霧披。戒井漏殘銀箭促。青天笑罷玉壺欹。文波弱荇浮清瀨。珍樹驚禽遶暗枝。縱使何郎詩筆在。未應幽恨抵蘭時。

城西晚眺

北榭風輕爽醉襟。天涯搖落對登臨。一篙寒浪船移浦。千尾殘陽鳥赴林。倦客亭臯時遠笛。早寒墟里漸

疎礎憑欄不覺休。邊角暝氣蒼茫失半岑。

題著作魏仲先隱墅

隱路高高入翠微。人亡宅在有餘悲。自圓溪月知吟處。不散巖雲憶臥時。素壁塵昏三紀貌。白楊風老幾尋枝。仲先去世三紀有餘。草堂故集篇篇好。要與商翁續紫芝。

杜少卿知陸州

三年去國別堯雲。一篋書空此謗分。賈誼有才偏隕涕。屈原何賦不思君。諫囊久晦沈餘草。綬笥重開續舊薰。幾日班春向桑野。漢家新詔十行文。

程密學知益州

墀塗晝對光堯莫。細札芝泥龔綬馨。三獨舊臺呼輻寵。十連新府夢刀靈。雲梯霽日明鈎棧。雨閣蒼苔蝕劍銘。只恐廉襦歌未厭。螢煌歸應六符星。

張屯田知竟州常按察畿縣

漢家關內使驕來。廣魯風旛畫隼開。地得股肱雄近輔。書留筋骨冠中臺。儒宮剗壁嚴祠豆。督府均羊盛宴壘。應望仙閭舊車道。倚天媧石篆昭回。

葉司封知宣州對日改三品服



歲久中臺鵠領垂。牢盆罷計擁藩麾。新加綬艾天香襲。密對簾鬚禁刻移。青舸信潮隨早暮。赤幡靈雨徧公私。樹猶如此成前感。重蔭當年蔽芾枝。司封昔監此郡。距今一紀。

病興

病興還見歲華陰。身屬囊鞬久未任。主畫固須煩孟博。病中諸務悉委監郡。作書寧免倩陳琳。書疏多假手。仙丸玉七貪餘餌。甜酎銀甌喜細斟。誰笑衣囊長寂寞。橫思新得漢臺金。

送俞給事知宣州

懇乞江南太守麾。過家為有故山期。使軒密雨千騎擁。瑣闥斜陽一拜辭。枕底潮雞參驛鼓。船頭沙鷁避牙旂。此行正及吳羹美。雉尾尊香欲變絲。

凌屯田知和州

坡殿程篇屬思精。飄飄老氣薄黔羸。一臺舊服郎官筆。千騎新提太守兵。候吏騰裝催去舸。故人引脰悵離觥。雲波莫苦秋江闊。自有桃歌用楫迎。

送郭太保知相州

螭階看引羽林兵。君典軍頭司。予修注記。故日相見于殿中。罷直還家得使旌。黼帳三雲清曉別。錦鄣千騎上頭迎。鴛沈故瓦秋烟闊。鳳下長阿夕照平。誰伴燕休同把酒。嘈嘈歌鼓亞夫營。

張宮苑拜嘉州刺史知恩州

二年同守夢刀城。遙節初爲北道行。飛將負才會捕虜。端臣在環州身出捕虜有功伏波見上數論兵。劍南剩臘梅迎使。塞下新春迎映營。貴寵逼身頭未白。七貂終嗣漢西京。

哭公孫子正

窮愁四十鬢華侵。肘臥垂楊感慨深。遺墨未乾園令札。悲絃長絕獻之琴。子正之伯氏淪謝纔數月。子正長往。嗟賢有夢龍占苦。對臆無言鵬坐陰。三步過車綿醑薄。死生從此隔朋簪。

七夕

開秋七夕到佳辰。里俗爭誇節物新。烏鵲橋頭已涼夜。黃姑渚畔暫歸人。裴回月御斜光斂。宛轉蛛絲巧意真。卜肆沈冥誰復問。年年槎路上天津。

西南新月玉成鉤。奕奕神光渡飲牛。素彩低浮承露掌。清香不散曝衣樓。天邊華幄催雲卷。星外橫橋伴客愁。莫使銀河到滄海。人間溝水易東流。

冬眺

城外斜光角已催。城頭倦客首空回。星霜牢落凋年往。天地蒼茫暝色來。千尾昏鴉愁迴戍。幾蹄征馬思窮埃。使君興罷惟無緒。不是登高能賦才。

朱舜卿歸自別墅

逍遙初服偃郊扉。學舍經旬望貢藜。庾信移談思講樹。周顛迴駕避低枝。摘華更喜聯新唱。散秩猶煩瑩舊疑。欲序三都先自媿。士安風痺素清羸。

感秋

迴腸病骨兩驚秋。已作衰翁未白頭。天上有星寧免客。人間無地可埋憂。車翻落日何曾定。臂化鳴鴉豈易求。莫就離鴻寄歸思。離鴻身世更悠悠。

和十九日湖上與張集賢餞提刑張都官韻

共憑高榭眺雲波。使節將歸可奈何。醇酒暫留丞相飲。驪駒愁對主人歌。千巖日下催雲合。萬里風長送鴈過。茲會難言須惜別。歲陰光景玩蹉跎。

苦雨中作

雲陣窮天雨足低。陰霞不照露盤西。城高已蔽觚稜鳳。水濁先愁獨漉泥。古樂府云。獨漉水深泥濁。戰蟻爭封緣暗穴。怒蛙邀軾沸空蹊。齊牕病枕迷昏晏。只有啾啾託曙雞。

送韓太祝

雲陣星躔促傳車。長安初日望儲胥。金閨引籍中天闕。玉字藏家上帝書。太宗賜君家先侍。郎御製頗多。祖道泛萍觴易。

醜。賦園飛雪席應虛。承明再過懷先業。磐石深沈禁樹疎。

送蕭山宰劉寺丞

秋江九月鷺濤平。楚客征檣拂縣星。射的初過若耶渚。襖林重訪永和亭。畏蛟俗富風移古。飛乙天長日際冥。幾帙異書藏臥帳。肯容僮客廣蒸青。

孫沆從事宰吳興邑

舳尾東銜鳥羽輕。滄浪餘沫恣霑纓。尙沈幕府千人俊。卻勸膠田二耦耕。蓮有豔歌邀夕泛。蔗留佳境析朝醒。行行正及吳蠶吐。脆盡商絃別曲聲。

寄獻澶淵太傅

使旆高翻西北雲。舟梁橫過九江濱。文書吏樂輕車府。表幟人知大樹軍。引漑劭農渠雨密。感涼邀會帳霞醺。花門車子能歌地。樂職聲詩日夕聞。

祇答太傅鄧國張相公

鴨陂清浪撼城隅。此地班春忝細書。琪樹老來拋禁省。玉繩低處認皇居。君軒戀結蕭蕭馬。客素愁憑六六魚。相閣裁章憐舊物。爲曾簪筆從雕輿。

登塔

宰堵緣霄鴈勢聯。憑闌清眺俯三川。春華已徧燃燈地。日氣猶烘暎雨天。游蓋結陰塵不動。飲籌催醕客爭傳。須知四級題名處。要記浮生六十年。

和延州龐龍圖見寄

交戟多年著皂衣。乞州初逐阮咸麾。驚殘鳥翮虛弓笑。傾盡葵心白日知。宿莽騷人傳麗賦。女蘿山鬼賽叢祠。自慚念舊殊非計。正是朋游掉臂時。

再寄

鈴下呼兒破錦鱗。新篇遺我故情親。鍛鸞遂有翻飛日。行葦應無踐履人。讒毒未銷須刮骨。上恩難報止沾巾。夫君何事材爲累。短褐征衣擁塞塵。

山中清明

一雨東郊捲夕雲。山中坐對寂寥春。高低桃錦紅相倚。輕重榆錢綠不勻。杯冷羅門拋午案。簾殘犀槩晦流塵。漢編漸美開魚禁。已約溪公下釣緡。

隱几

空齋隱几度流光。濩落由來我所長。枉許是非同喻馬。不知畫簾兩亡羊。空名更甚浮雲薄。代事都無半捶強。心誓前賢六百石。異時初服返東岡。

題多寶寺水閣

寶坊雲構壓河流。梁日東南宿霧收。湧塔千層排候鴈。叢楹四注倚陰虬。低翻楚蕙鮮風曉。橫逗吳鸞下瀨秋。暇日便堪供賦筆。不煩王粲更登樓。

贈張齋郎

青絲垂領稱華簪。結駟千門別第深。學舍問詩衣五綵。家庭佐酒壽千金。蘋蘭媚碗供晨膳。碧草生塘動晝吟。獨感舊遊移岸谷。山陽疎笛淚涔涔。

贈潘齋郎

吟塘春草奪袍青。蘭玉仙姿出謝庭。刻羽彫章傳雪市。煎波麗賦淹雲溟。逢衣四座開賓榻。綵服千金獻壽醞。漢殿前期思削牘。紫圍翔步弁如星。

題橫山寺

碧山千疊隱招提。淨刹岩亭拂彩蜺。月澗溜琴喧菌閣。雨天雲葉晦璇題。寒銷爐篆螟風細。密亞巖烟鳳竹低。病久毗邪真得賞。迷津一滴戀曹溪。

閏正月二十五日送客尋春集裴氏園

尋春送客共留連。雨罷春郊物物妍。黃抹柳梢初徧後。紫粘花萼未開前。朋襟自爲交歡慘。醉罍誰能辨。

聖賢猶賴斜陽催跋馬。不然離恨損絲絃。

和李屯田西湖尋春

把酒同尋湖畔春。賞心何況更良辰。留陰岸雨溥紅杏。送暖汀風惱綠蘋。低寫臥虹橋齒密。小裝文鷁舫頭新。聚星亭上華簪客。卽是高陽舊里人。

和武宣徽陝樓晚望有懷舊遊

陝樓重倚望軒城。百感中來久未平。屈指疑遷饒歲月。逼身添重許功名。飛觴置酒高陽興。公詩有尊前依約認山公之舊樹攀條司馬情。昔日使君今上將。請看前後萬犀兵。

欹枕

欹枕風牕雪絮繁。夢迴紅日轉南軒。棲遲自樂同人什。偃息終非魏國藩。書習練裙聊弄翰。吟隨池草欲迷魂。踈慵不喜當關報。羅雀先時署翟門。

祇答天平相國龐公追記舊遊見寄

把酒同爲花下賓。東風一十五回春。歡情墜若瓶邈綆。感緒多于白裏辛。枚馬老能持從筆。自謂夔龍今已避鴻鈞。奉和君附塵舊好公須憶。憔悴惟殘厭次人。東方朔平津侯書有附塵之契





# 景文集卷十七

## 七言律詩

楊都官曰嚴赴鄆州

連年三換左朱輪

君二年中得襄陽領灑上由灑得鄆

正用臺郎第二人。帷殿程書清刻永。家牀添笏賜袍新。

君便道上都陞對日賜五

品章

潤波仍跨洪河曲。敏政將肥瘠魯民。趣引前旂向桑野。漢皇恩詔重方春。

杪秋官舍念歸

獨計年華念鬢華。秋來依舊滯天涯。半分沈約愁銷臂。一束鍾繇憶賜花。寂寞林蟬應自嘆。氈毼庭鶴待誰誇。西江聞道通星漢。試借君平問客槎。

登高晚思

喜被塵襟屬麗譙。高旻雨罷暑氛銷。遊回宿鳥霞橫嶺。唱殺寒蟬柳抱橋。戍壁風烟間尉候。客亭燈火混漁樵。山川信美非吾樂。已是三年去國遙。

一雨

一雨初收細細涼。碧雲西畔見殘陽。歸期只覺刀頭遠。別恨偏教帶眼長。梅驛使稀誰託信。蕙盤烟冷不

成香。酒泉已是三千里。何況關門未得望。

謝都官監治建州

初得中臺滿歲遷。七閩猶貳左魚權。雞香燼晦華星闕。虎眼波迎下瀨船。幾種珍鮭資晝膳。萬岑芳茗蔽春塵。行行正及陶嘉月。溪樹烘霞荔子鮮。

筆次

菱花照鬢感流年。始覺空名盡偶然。十擲成韃寧是拙。一丸求藥浪圖仙。位卑司敗無言責。事少當關許晏眠。上此隳官堪自効。不煩公掾更平鐮。

送屯田張中行罷成德軍通判還朝

中山花下舉離樽。縞髮蕭蕭重黯魂。假節共辭金馬闕。滿更先入玉關門。壬辰秋與中行同赴常山。不半罷。年予改守中山。故中行今先得。彌年錦帳殘香燎。幾夕蘭陔擷露痕。早伏青規奏邊事。五芝泥熟待新恩。

按行府城通判張太博有詩美山川風俗因繼作

百尺譙城一凭欄。提封占盡古常山。公私雨足耕疇徧。赤白囊空塞候閒。撥刺河魴供大嚼。含糊趙瑟勸酡顏。正應此地從軍樂。先播辭人麗藻閒。

閏正月二十五日送客尋春集裴氏園

尋春選客共流連。雨罷春郊物物妍。黃抹柳梢初徧後。紫黏花萼未開前。朋衿自爲交驩悴。醉學誰能辨  
聖賢。猶賴斜陽催跋馬。不然離恨損絲絃。

覽聶長孺斬春罷歸舟中詩筆

姑山羽客冰爲骨。金掌仙人露代餐。化作妙辭真扣玉。寫成初藁剩驚鸞。心隨零雨濛濛密。恨過清溪曲  
曲寒。此祕東陽誇未睹。靈均千載有餘嘆。

吳中友人惠蟹

秋水江南紫蟹生。寄來千里佐吳羹。楚人欲使衷留甲。齊客何妨死願烹。下筯未休資快嚼。持螯有味散  
朝醒。定知不作螿螟悞。曾廁西都博士名。

清明日集西園

日日西園春思催。攜觴結客上高臺。正緣從事青州至。更許書生洛下來。早葉已成花半落。新巢未定燕  
千迴。芳辰物物皆堪愛。併作高陽倒載媒。

遊惠山

遇酒忘憂聞樂喜。世人未到惠山前。泉供勝味輕糟麴。松獻清音異管絃。陸子舊文殘琬琰。湛家餘跡撫  
雲烟。珍禽幽石應容我。翠麓亭深晚更便。

西齋夜思

蕭宇齋空夜景深。長康勉力效長吟。池風過處琴遺韻。牆月斜時樹倒陰。几隱原灰同木槁。書緝故網有魚侵。漏壺漸促星榆轉。獨背篝燈擁薄衾。

同年成楷濰州理掾

東風鶯友舊聯飛。彫歲鷓弦此愴離。路怨亭臯長續短。客嗟京邑素爲錙。且欣便道還家近。未厭無聞得掾卑。漢殿有人能夜誦。君才不減子虛辭。

送黃昱祕校太平理掾

中銓覆擬下慈宸。又作東西補掾人。去國雖逢零霰暮。過江未失雜花春。西山氣爽聊持版。白紵袍餘且製巾。星貫文稀堪樂事。聯曹鮑照藻辭新。伯元富于藻思。至止必竝驅辭陣矣。

答龐龍圖塞下秋意

故人握節遠屯邊。三見寒飈折塞綿。俎豆何妨學軍旅。兜鍪遂欲出貂蟬。酒酣帳下攬金夕。雪酒軍中蹋鞠天。不惜裁章報吾黨。欲將餘力鏤燕然。

胡氏遲客亭觀詩

石磴松蹊自不塵。亭名遲客客回輪。山中桂好雖畱隱。嶺上雲多肯寄人。夢草數殘康樂夜。禊杯閒記永

和春共游弭蓋爭摘藻。剩破林煙炙翠筠。

病免

股錫飄然指上方。翠微巖腹掩鷹房。江山極睇才多助。竿木投機戲幾場。麝墨洗餘池溜變。玉盞清極茗華香。秋風莫負重來約。淨社霜蓮徧碧塘。

送宿州李明允都官

省帳香殘捲夕紅。名郎去守日圍東。組垂丈二腰章貴。騎擁千餘使幕雄。弭節亭臯鄉梓近。貫都河溜客魚通。朞年美化流歡頌。盡入中和樂職中。

官下

東泊驂驪一駐車。馳雲芟木澹扶疎。風經禦寇仙遊外。野識裨諶草創餘。潁谷寒煙仍井邑。侯門殘日但丘墟。古治國非今治州兩都大道過從盛。不稱支離佩左魚。

白兆山橋亭

千尺虹泉界道飛。陰虬橫絕負雲楣。浮梁跨岸神移石。劫燼翻波地獻池。度日銜花翔翠鳥。經年支榻養靈龜。披襟便可祛煩惱。不獨東京叔度陂。

屬邑告稔寄轉運勸二使臺

稼雲彌望默紆餘。雨徧公私告稔初。田父此時歌擊壤。牧人他夜夢爲魚。勸符數下收遺積。漕穀相銜餉剩儲。莫謂衰翁止蒙福。有年須待史官書。

送冀州李團練

雪雲寒氣著離杯。道北輕風大旆開。太守直居千騎上。將軍仍自九天來。征鼙曲曲漁陽摻。後乘人人鄴下材。忠孝相移難兩遂。沁園歸戀徧蘭陔。

答宿州王素都官

當年弛鐙避清塵。此地聯麾喜故人。豸角去冠休觸佞。虎頭分綬且行春。謗銷不復投親杼。宦拙猶須讓後薪。酌酒爲君賡一曲。江邊收得子牟身。

又寄王都官

倦把菱花照病容。蕭蕭斑鬢作衰翁。虞翻到骨終無媚。阮籍逢途但有窮。敢望君恩收墜屨。決須私計付冥鴻。銜盃後會何能定。萬里驚飈一轉蓬。

萬州齊都官

縹闕歸心戀九關。凭高郡閣見南山。彤幡冒雨春疇闊。紫闥焚香夜帳閒。宴弁側星陪卜晝。妍歌抽雪送酡顏。西京地大民風厚。蜀秭沈波月蚌還。

賀齊都官

十行泥檢潤瓊芝。序轉仙曹漢省闈。月隱偃波三署筆。光添侍史五時衣。星躔入夜哀烏動。軍蓋迎晨雉  
雉飛。幾日霄塗歸奏御。景龍妍唱掩牙緋。

章判官詵赴吳興幕

素領潘郎滯進階。東南沿牒得卿材。隋河鼓棹波成箭。越驛蒸衣雨是梅。客詠南風蒲齒勝。食無寒具畫  
廚開。政餘底處邀真賞。洲上風蘋若下醅。

送王龍圖鎮秦亭

皂衣京兆數論兵。西護秦臺暫抗旂。顯父百壺連帳出。良家六郡佩韃迎。甘泉路邇烽棹偃。非子川長馬  
房平。左右漢臣聊作帥。非緣侍從厭承明。

思歸

刻意傷春屬暮樓。江臯歸棹悵夷猶。青蘿怨鶴英山曉。疎笛吟龍臥塢秋。掩泣泥陽思祖廟。長懷彭澤廢  
先疇。裂繻前誓風霜苦。早晚懷黃識漢侯。

答翰林蘇學士

開顏忽見故人書。併得雕章念索居。自是犧尊憶溝水。敢將吾笠望卿車。流年遂往蹉跎在。末路雖還連

蹇餘彈飾舊冠猶有愧。別來蒼鬢不勝梳。

寒食假中作

九門煙樹蔽春塵。小雨初晴潑火前。草色引開盤馬地。簫聲催暖賣餠天。縈絲早絮輕無著。弄袖和風細可憐。鼇署侍臣貪出沐。珉麋珠餽愧頒宣。

把酒

歌管嘈嘈月露前。且將身世付酡然。謾誇驥鼠機頭箭。不識醯雞甕外天。青史有人譏巧宦。黃金無術治流年。君看醉趣兼醒趣。始足靈均更可憐。

擬杜子美峽中意

天入虛樓倚百層。四方遙謝此登臨。驚風借壑爲寒籟。落日容雲作暝陰。峴井北拋王粲宅。楚衣南逐女須砧。十年不識長安道。九籥宸開紫氣深。

早秋二首

月夜亭臯秋氣生。又從搖落到崢嶸。寒花尙作茸茸密。晚葉偏能颯颯鳴。對把蟹螯何處酒。悵懷蓴菜此時羹。西風萬里吹斑鬢。可待中郎麗賦成。

落照臨風細細寒。已收紋簟未收紈。山中桂老初含紫。澤上楓多併是丹。月過河橋低映榭。露從霄極暗



供盤。何人刻意離憂苦。不字靈均卽姓潘。

送張狀元監丞通理陝郊先覲親蜀道

苑樹櫻殘罷宴甌。驪駒籍籍望西州。左思麗賦都中貴。張載新銘劍外留。幾日戲裳貪潔膳。卽時歸雨勸耕疇。如何蔽芾甘棠國。再見臨淄第一流。

淳化中孫紫微漢公亦初履于茲府。

清明

曉日東南欲照梁。藏鷗密柳暗橫塘。行庖束蜜停晨爨。別館熏衣冷夜香。陌上鮮風橫去幟。陽濱翠潏泛行觴。獨嗟楚客流芳晚。淹臥悵悵帶眼長。

過安陸舊居鄰里相送

綠楊枝外斗闌干。出客雞鳴過近關。豈有車徒休汝上。暫同鄰里到方山。離魂正對春波苦。羈思猶隨勗鳥還。多謝滄浪送征棹。更霑餘沫洗衰顏。

懷故里偶成

先疇少失杏花耕。十載窮塵困縛纓。山上有山成久客。吏中非吏得空名。吟塘碧草他年廢。霧驛哀猿此夜驚。何日謁歸聊望里。況無車騎得鄉評。

了淨歸天竺寺

曉原霜重俊鷹肥。一席歸風路不迷。林下會徒從霧合。海邊停梵見潮低。霜籃烹茗尋前圃。雨屐粘苔認故蹊。知有詩魔未降伏。湯休日在碧雲西。

寄葉兵部

吳門練影逐金羈。共羨潛郎得請歸。殖產舊封千戶橘。去臺初襮五時衣。晨杯鬪鼓江蓴滑。夕俎供糠渚蟹肥。分籍未容妨隱趣。海鷗汀鷺對忘機。

真上人

面壁觀空度幾春。靈山法會更離羣。定心不動池俱滿。標指無言月自分。經葉晝閒落毳袂。空花晨靜貯餘薰。金園晤賞人誰見。萬里殘陽送碧雲。

贈昭長老

虎錫多年寄寶坊。甃餽宴坐赤髭長。鵲燈雪嶺分千焰。蒲饌雞園積聚香。定水晝寒銷漏葉。社池秋晚亞蓮房。何時拂席升麟殿。塵毳微飄法座傍。

送靜照大師歸餘杭

旁行經葉振餘埃。社侶欣聞錫股回。林鳥入花迎擁械。江龍停浪送浮杯。他年應共銷香飯。幾夕飛談辯劫灰。漸次南征知有爲。化成今在故巖隈。

再逢成上人

上都初見赤髯年。竝在西州絳帳前。

予識師于中山公坐上。

每與文殊同問疾。不知靈運遽生天。

師嘗隨中山公之

還上都。

淮山永憶吟無社。梁苑重來供有緣。休問外堂諸弟子。餓思周粟賦歸田。

送僧遊越

越絕天長曉霧低。若耶雲樹蔽春暉。江龍浪穩迎杯度。岳虎蹊空避錫歸。晨飯聚香齋品潔。夜盆沈漏睡魔稀。玉璫誰望西來氣。五葉花開祖有衣。

和趙南正溪上二首

年少青春苦惜春。溪頭風物更畱君。無花地展如茵草。欲雨天垂似鶴雲。船近鷺兒頻引頸。水清魚子忽分羣。吟情飲量皆豪俊。酒盞須斟一百分。一樽狂計卽畱春。更把詩篇惱使君。繞岸正搖千步柳。歸山曾約萬重雲。孤懷欲寫情空感。佳句相酬自不羣。怯見杜潘無處避。便知優劣此間分。

臘後書所見

北斗邊城春柄回。閏年飄穀占餘灰。鼓聲催徧江南草。驛路傳殘隴首梅。寒日已高猶沆漭。薄雲無待故徘徊。何郎素憶慚杯杓。強欲乘閒撥凍醅。

過郢中

紫宙星翻唾霧開。據鞍追昔剩裴回。空聞曲裏陽春老。不見城西艇子來。苦李成蹊誰駐蓋。行雲無所自。縈臺江臯魚鳥畱連極。枉被從軍驛馬催。

祇答天平龐相公

白玉堂中舊演綸。赤帷裳底老班春。攬煤自省非嘗飯。投杼徐知不殺人。常恐虛名遭嚇鼠。寧防平路解摧輪。由來辨謗須君宰。收得江魚未葬身。

病興見春物欣盛釋然有臨眺之意

東風掠野暫輕埃。灑灑殘寒伴落梅。曉報谷鶯朋友動。暖將塞鴈弟兄回。驟生溪水迎人遠。自喜林花索露開。老罷何顏玩芳物。試憑狂醉上春臺。

吳感勾歸安簿

苑花聯醉七經春。猶佩當年一綵綸。京邑風塵初倦客。楚僮塗轍欲妨人。信潮暮送吳艤穩。公秫秋供箸。耐醇江外何因憑尺素。宕渠波惡損文鱗。

送同年孫錫勾簿巢縣

千牘公車與願違。卻懷黃綬去江湄。中都食酪憂尊老。要路編苦笑錦遲。酒幟亭長離帟罷。浪花風穩暝。

帆移驚秋感別俱成恨。瘦盡森森瓊樹枝。

送胡宿同年主合淝簿

歸路青袍雜綵裳。何言縣枳滯鸞翔。恨無旨酒邀枚叟。愁聲斑駁送陸郎。四剖楚萍資夕膳。一絃淮月望春艎。鈴齋坐鎮儒林丈。密啓行聞達上方。

和遙見歸舟

帆在天邊客倚樓。此時相望最離憂。星槎路遠迷全影。繡被香遙認半謳。不見鮫盤休墜涕。莫逢蓮葉更障羞。石城艇子知非是。始信無愁果有愁。

送同年張孝孫勾簿穎陰

雪序繁雲掠苑回。行人此地一銜杯。東西溝上歌流水。南北枝頭怨贈梅。綿竹誦篇沈秘幄。堵坡題字晦輕埃。莫辭縣枳淹鸞翮。密啓天官佇薦才。

赴調

編政黃堂碧鶴衣。遠滄周粟位猶卑。人推東魯丘園秀。吏得西京法令師。驪駕路長雲拂蓋。鵠歌亭曉桂凝卮。上書自薦時非晚。囊牘三千正集帷。

馬上遇雨

萬瓦涼聲挫暑威。輕風斜濕看茸題。禁溝花咽先聞溜。馳道沙平久未泥。拂水有紋飛燕下。翻珠不定紫荷低。城陰霧密千門掩。更恐歸驂五里迷。

偶書

病骨巖巖怯早衰。月枝三繞寄身危。避風寧望鷓鴣享。出卜頻遭僂句欺。余嘗詢窮通于日者。皆不能中。烟慘蔽江懷隱伴。雨苗頽壘負耕期。開年幾許他鄉淚。盡付窮途與素絲。

兄長莒公赴鎮道出西苑作詩有長楊獵近寒熊吼太液歌餘瑞鵠飛語警邁予輒擬作一篇

寶樓斜倚闕西天。北轉樓陰壓素漣。白雪久殘梁複道。黃頭閒一作空守漢樓船。塵輕未損朝來霧。樹煖纔容臘外煙。弭節不妨饒悵戀。待歌魚藻記他年。

# 景文集卷十八

## 七言律詩

和致政燕侍郎舟中寄宴尙書

異時仙閣對三休。頓首辭榮動邃旒。疏廣故僚供祖帳。鷗夷盡室付歸舟。謝塔生玉懷歡宴。燕壁圖山代遠遊。新句漸高塵累少。紫微巖曲要相求。

答友人清明雨思

楚雲朝暮蔽前峯。佳節尋芳已半空。三日薰爐沈蕙綠。一星春火併榆紅。文鱗對擲回塘水。賀燕交飛翠幕風。悵憶沈齋題句罷。碎英無響墜華桐。

九日置酒

秋晚佳辰重物華。高臺複帳駐鳴笳。邀歡任落風前帽。促飲爭吹酒上花。溪態澄明初畢雨。日痕清澹不成霞。白頭太守真愚甚。滿插茱萸望辟邪。

中山立秋

峯雲曉影破屏顏。萬里風生結早寒。人在兜零煙外走。歲從鷓鴣口中殘。槽花併滴添新酎。筍月兼輪掩

故執白髮光陰誠可惜。五年搔首望長安。

二月十八日席上憶季長未還不同斯樂欲作詩寄之會使者來已有新章今牽連成篇拜呈上  
煙壓西郊兩壓津。滿城歌吹爲芳辰。江形左右衣留帶。柳色高低麴與塵。暖逼園花迎望密。曉催林鳥每啼新。知君貪擁光華節。未有尊前共惜春。

閏九月九日登高有感

隔霜雲葉繞天愁。閏節重來續舊遊。賦客豈辭聊暇日。楚人無奈賸悲秋。寒萸實老猶薰佩。晚菊香殘不古甌。悵憶故園歸信斷。渚鴻川鯉兩悠悠。

寄公序兄資政給事

再分銅虎滯侯藩。別後兼聞素領繁。契闊不成駢服馬。急難空念脊令原。壯心千鏌年年鈍。世路風波袞袞翻。韁鎖虛名應只爾。早同私駕老邱樊。

春宴行樂家園

園芴初乾小雨泥。飲壺遊屐況親攜。身輕早蝶千回舞。技癢新禽百種啼。乘暖草茵侵坐軟。畏風桃綬向林低。陽暉自有留人意。銜照高樓未遽西。

病間答雜端龐淳之見寄



廓落彌旬故眼移。居慙君粟養支離。綾衾倦夢愁淹臥。星鬢流年報早衰。藥劑祛繁催月杵。茗腴供啜嗜春旗。迷魂復幹聞清唱。不減巫陽筮些詩。

真定述事

莫嫌屯壘是邊州。試聽河山說上游。帳下文書三幕府。部署安撫二司并府事馬前鞞鞅五諸侯。所管洛邢磁相趙五州兵爲一路

王藩故社經除國。俠窟餘風解報仇。四十年來民緩帶。使君何事不輕裘。

博州駱太保

關榆秋舞折膠風。坐嘯邊陲憶九重。宴榭綠醅春沸蟻。連營清角暮吟龍。幕中鏤管閒陳檄。塞下兜零罷漢烽。計日民謠誼魏闕。褒功僊劄武泥封。

春曉感別

樓外疏鐘落曉河。天涯感別思煙波。三年客鯉傳書遠。五丈星機得素多。溝水東流勞想像。峽靈西去隔嵯峨。良辰自古難并樂。不獨驪駒送客歌。

有懷謝炳宗先輩

淒霜刮野轉蓬乾。永憶江湖旅鬢殘。身有支離求病粟。爵無公乘免旒冠。柴車路迴驂驢蹇。粟塢人稀溜鵲寒。日暮浮雲徧西北。客心悽斷向長安。

有懷寄同舍

不爲秋歸人未歸。淮南又見葉丹時。漢皇好少身今老。楚客愁醒啜始醅。夕棧長風驚代馬。曉天團露怨江離。夫君去我猶千里。萬慮勞勞欲語誰。

有懷宮保龐相公

木正乘春肯告勞。併持葱鬱護神皋。曉風遞暖何妨細。宿雨留雲未許高。向密垂楊能礙箭。鬪長芳草欲爭袍。東城勝具應撩治。就趁尋花作宴醪。

漢南州按行江涘以詩見寄

側帽風輕過大堤。水村驕馬惜障泥。前驅夾道旗開隼。合宴傳殮帳繞犀。淨練寒江供望闊。赤萍圓日對吟低。輕筒絡繹傳清唱。知在春煙幾曲溪。

和丞相晨謁書所見

北闕天深報漏遲。臺鸞雍鷺共逶迤。廷風細引趨班佩。宮日遙烘簇仗旗。侍史有香來洞案。直郎無奏伏丹墀。殊隣競獻朝正玉。定是東風入律時。

答天台梵才吉公寄茶并長句

山中啼鳥報春歸。陰閩陽墟翠已滋。初筍一槍知探候。亂花三沸記烹時。陸氏烹茶每以三沸爲法。佛天甘露流珍遠。

帝輦仙漿待汲遲。上都惟乏嘉泉。故茶味差減。飫罷翛然誦清句。赤城霞外想幽期。

貴溪周懿文寄遺建茶偶成長句代謝

茗篋緘香自武夷。陸生家果最相宜。烹憐晝鼎花浮柵。採憶春山露滿旗。品絕未甘奴視酪。啜清須要玉為瓷。茂陵渴肺消無幾。爭奈還書苦思遲。

春日出浣花溪

側蓋天長蕩曉霏。暖風纔滿使君旗。水通江渚容魚樂。草徧山梁報雉時。場雨滅塵盤馬疾。樓雲礙曲進觴遲。少陵宅畔吟聲歇。杜子美宅在浣花溪上。柳碧梅青欲向誰。

送貴溪尉周懿文先輩

幾日銓符給詔程。賜袍如草滯僚英。大言久廢三千奏。倦曲難終一再行。吳蟹沈波秋稻富。海魚藏穴夜潮平。侍君削牘登文石。梅福為南昌尉。上書願一登文石之陛。趣與淵雲繼頌聲。

題漣水軍豹隱堂并序

今趙集賢概未榮之日。嘗處于此。及登科。始以今名榜其堂。不五年。集賢出守軍政。當年齋榻豫章才。自領驂驪五馬回。庭下書筠多舊刻。檐間賀燕是重來。吟池墨久將成溜。坐石星殘欲徧苔。郡閣從今傳盛事。更霜寒霧記岳隈。

寄獻淮陽陳相公

翹才閣下舊賓游。偶得魚符擁使輳。本自鑪錘依大冶。敢言鎗腳是鄰州。頻年廢忘拋黃卷。此地優閒養白頭。漫引雙旌非敏政。餘波須仰富民侯。

游白兆山寺

地枕層岑面勢斜。蔽虧原隰在烟霞。璇題銜目三休閣。寶樹沿雲四照花。結社高風思惠遠。忘言真理寄毗邪。銅蓮漏永螟風細。不覺西陂轉若華。

寄令狐揆二首

揆入郢中。余方客江夏。

楚山千疊隱南轅。漢渚風檣箭浪翻。流水東西俱怨別。離亭長短共銷魂。歌翻白雪知難和。注怯黃金故易昏。玉骨更羸詩筆苦。客裾猶欲曳何門。

紫漢參橫宿霧收。煙江南渡悵夷猶。夢中未省能知路。天上何緣許寄愁。豈有文麟憑遠客。枉緣香杜怨芳洲。遙知花豔驚郎目。幾曲新詩播郢樓。

寄郭仲微

自君入佐張蒼計。直室深扃老氏關。顧我偶陪螭陛立。無人竝駕鹿車還。昔時在館。常與仲微並轡歸休。今不復得。紅牙幹利資良畫。縹袞勞功積厚顏。幾日歸休期一笑。新醪浮白早黎殷。

寄河東按察待制施正臣

并門迢遞駕朱輪。紫橐宮毫晦隙塵。幾眼帶移貪事國。半生桐老苦傷春。比來置酒觴何屬。自此驚秋髮  
恐新。鼇署病夫期自代。眼中徧憶未歸人。

寄鄭天休

天休兩賜手問會  
迫賤事不獲修答

翹車交辟滯東南。盤蕙多年歇賜衫。千日醉醒孤共酌。一書開閉遂空函。怨歸定對王孫草。無恙應隨散  
騎帆。傾聽囊帷奏嘉頌。清時寧忌絳侯讒。

見寄

雲梯叱馬賦西征。滿歲無功答盛明。收得桑榆真晚計。倚爲箕斗是空名。癡逢美玉終能治。曲訴么絃久  
未平。壯思雖衰猶得在。一篇申甫爲公成。

決韻天平觀文龐相公以久留塞下見寄

昔駕輶封北護邊。已慙星鬢久凋年。御爐香外拋晨謁。刁斗聲中廢夜眠。梁雪送殘他日賦。郭舟誰共此  
時仙。思歸未敢貽公念。更辦秋懷敵露蟬。

邑外晚景

林梢規日透霞鮮。滯穗纍纍徧大田。豺口祭餘開獵禁。豚蹄祝罷得逢年。雲容不動寒垂地。陂影無涯靜

合天。一國似狂子獨爾。長吟饑腹伴殘蟬。

贈吳太博二首

銀兔頻年滯使麾。曲臺猶掌一王儀。四巡奏頌推嚴筆。千牘程書入漢帷。駟里飛觴酣玉液。天街疊鼓候金羈。前期侍從丹塗地。祕殿螟風拂翠綵。月轉觚稜玉樹齊。通宵歸夢繞金閨。柔桑密映秦樓騎。溫詔香懷漢署泥。殺簡載書傳祖德。懷金酌水賦新題。丹楓七澤朝天路。丈組垂腰繫佩低。

送李芝還舊德

章冠慣趁舞雩春。屬疾彌年素產貧。舊德卻招三徑菊。歸裝不受九街塵。平時戲服歡爲綵。日後迎蒲待裏輪。天下書生皆皓首。牛溪休訪續經人。

答戶部勾院王學士泊滄陵見寄

峭颿風罷到淮瀕。草草停橈一問津。大小山前懷古地。短長亭下未歸人。林姿暗淡吞霞彩。浪壘光芒受月輪。尚憶他年故儔在。擘牋題作郢中春。

送段祕丞同理金陵

自審刑赴相幕之辟

赭丹濡筆獄無冤。佐守初依鳳沼蓮。南土出藩申伯寵。辟書爲首嗣宗賢。蟠龍運厭山園國。燬角宵涼水

際天。哲輔定知三入相。期君同赴渭濱畋。

送張清臣學士省侍金陵

仙閣三休紫霧平。金門試罷得蒸青。同時第賦留宸幄。他日聞時戀相庭。逗箭夕流催檜楫。賜花春豫憶雲屏。吳天此夜瞻台座。併是荀家父子星。

送簡殿丞赴闕

共治清淮北面州。壽陽雖曰淮南。實治淮水下蔡。何言分袂帳夷猶。君還南闕雙龍下。我駐東方千騎頭。未洛林花延別酌。無窮隄草伴行舟。懷人愬月勞勞意。自此相牽更倚樓。

祇答提舉觀文丁右丞

懇辭金殿得班春。藁篋相從素瀨濱。坐閣仍題修史筆。去鄉猶是受經人。浮雲富貴心知厭。淡水交游老更新。三嘆來章深意在。肯容冠綬久生塵。

病告作寄武平湖內翰

病擁綈袍雪領垂。當關重疊報晨暉。夷吾畏事將成吃。遽瑗增年轉恪非。宦路風波頻歲劇。予十一年。歷五州。故山薇蕨每春肥。餘生正似風前鷁。慙負陽秋說退飛。

九日宴射

佳節憑高駐綵旗。亭皋霧罷轉晨曦。坳間羽集號猿後。臺外塵飛戲馬時。芳菊治疴爭泛藥。丹萸解惡徧傳枝。明年此會知何處。醉玉頽山不用辭。

孫集仙世領東海

雲岳蒼鬱照城郭。奕葉鄉州擁使符。晝繡愈衣今日貴。子廷猶憶向時趨。故新笥綬薰相續。前後郊棠影下孤。絳帳諸生今史氏。炙青容補世家無。

羅學士出守復拜承旨感而有賦

十八年前玷玉堂。當時綠髮此蒼蒼。傷禽縱奮愁瘡重。廐馬雖還笑齒長。薰罷山爐飄暗燼。漱餘銅碗冰寒漿。須慚清切鑿坡地。不是吾人得性場。

送荆湖北漕張職方

賜對雲簾幾刻畱。東南公利入牙籌。方船萬粟浮江下。封府三錢出地流。驛路塵清迎弩密。省臺薰歇護衣愁。不妨徧歷騷人國。金橘丹楓互占秋。

送殿院張奎漕京東

霜柏輕寒驚曙烏。使臺東道亞風旗。人瞻御史乘驄貴。錢續司農朽貫餘。雖苑千門聊按節。齊官三服罷移書。此行須信褒恩美。新詔黃金飾佩餘。



淵宗郎中移利州路漕

列騶傳闕避輅車。天角橫參帳飲餘。卽日前驅催負弩。幾旬論報罷移書。賜山故冶流錢外。燒棧新郵轉粟初。使選愈華身尙遠。喜榮嗟滯兩何如。

初入蜀州閣道作

綠雲棧腳轉嵯峨。使者重來叱馭過。杜宇有冤啼夜月。女蘿憑鬼護山阿。巖深樹氣埋蒼霧。峽窄江形束素波。自問一春行役苦。帶環移眼奈衰何。

早春出近郊

迴望三條接上蘭。野霏山秀似堪餐。冰翻斷影回魚暖。雲作輕陰借雁寒。卽席縹清宜玉笋。何人蘇合費金丸。風長麥淺如皋路。雉子斑斑錦羽乾。

出次近郊

江練東南楚塞長。野烟寒氣共蒼茫。局轅班馬思長道。攫肉飢烏下夕陽。旅舍樵蘇勞後爨。農家簞笠遠相望。坐觀民瘼無他畫。庭列狙鶻目眩觴。

寄襄陽觀徐師

日夕高陽醕羽杯。琳房岑寂外塵埃。山庭桂老幽人住。天陸星翻處士回。珍樹暝猿侵戶嘯。碧潭僊菊照

牕開箕風動地雲羅闊。誰伴凌空禦寇來。

和季長學士綿漢道中作

一轡澄清暫按州。卻因風景獨夷猶。弦殘漢月騶前曉。粉疊巴雲蓋外秋。持節頻年煩出使。富民虛日待封侯。省紆麗藻嗟行役。正恐才多剩四愁。

得揚州書

四郡連翩擁使旗。多年不聽汝南雞。宴開河朔千人帳。書用黎陽一撲泥。水曲箭波喧夜櫓。原田絲雨勸春犁。可嗟未預元規論。坐據胡牀送月低。

送韓廷評婺州市征

去程烟草妬藍袍。越絕天文寶婺高。五兩樵風船畫鷁。九秋犀燭鷺翻濤。吳鹽煮海通關賦。陸橐收金析利毫。仙酌油囊鱸膾潔。未妨餘暇左持螯。

楊備永嘉市征

漢祀壇邊望晝衣。故人杯酒怨歌驪。幾枝北道梅傳信。一味南方桂補羸。後雨蒸青貽素業。舊塘生草繼妍辭。他年第頌歸何處。名應唐家十二時。

祇答相國龐公將至并部馬上垂寄

大旆前驅拂晉雲。寒天迎望靜無氛。幄中舊借留侯筭。麾下今分鄧禹軍。馳屬囊鞬隨指顧。賣殘刀劍事耕耘。據鞍抒思真餘力。又占風騷第一勳。

得杭州鄭資政書

誤拋荷橐別雲裘。天賜疎慵臥治州。轅下已疲猶戀主。道邊寧死不爲鈎。風波路惡驚危涕。蓬葆年侵變黑頭。獨喜故人恩契厚。冷灰遺甑遠相求。

予既到郡有詔仍修唐書寄局中諸僚

一章通奏領州麾。詔許殘書得自隨。吾黨成章真小子。官中了事是癡兒。昏眸病入花爭亂。倦首搔餘雪半垂。所賴韋吳皆傑筆。劉生當見汗青期。知幾論史嘗言垂白有期汗青無日。

雲夢李使者

關征盤錯帶南州。三見丹楓墜楚秋。列侍百重圍虎戟。酣歌丈八憶蛇矛。草生宵夢傳詩筆。梅析春醒託使郵。矍鑠據鞍休白歎。壁門初日待鳴騶。

西征道中寄友人

賦就江毫一黯然。柳衰猶足代征鞭。鮫盤恨極無餘涕。鷓瑟悲多有剩絃。斜日楚楓低候雁。早霜秦樹送殘蟬。文章滿腹真何益。深愧囊中趙壹錢。

南亭獨矚

在景陵

宇下雄風細細涼。客眸凝絕此回腸。絡頭騎過羅敷陌。畢尾烏喧女子牆。流水清渾迷別浦。碧雲高下送殘陽。懷人撫物愁何盡。試借蘭成萬斛量。

題羅江翠望亭兼簡西游君子

暫解征鞍息使郵。孤亭望斷更夷猶。山從劍北呈天險。樹徧巴西送客愁。拂衽風和循幌入。濯纓江好近人流。憑君且作剛腸憶。懷遠思歸易白頭。

自訟

史藁雖殘得自隨。兵符未解定堪嗤。淹留正似周南老。戲劇何爭灞上兒。鉛筆用多毛禿落。鬢髯愁罷雪紛垂。十年尙滯成書奏。可驗相如屬思遲。有人多病臥遙帷。誤舍寒耕失故畦。每畏賓朋嘲乘鴈。寧教子弟愛家雞。淹中學廢心都塞。轅下鳴餘耳更低。自顧上恩無一報。何顏歲晚望金閨。坐甕無客凍鴟愁。談樹蕭然兩見秋。執戟不知身寂寞。寫書猶得罪風流。官閒無日慙軒鶴。機盡多年謝海鷗。借問殿科能免否。杜陵男子有耕疇。

欲棲烏

湘竿風急未成棲。御史臺前見落暉。桂令欲依秦氏宿。柳深先望白門歸。迎秋別恨填銀漢。未夜啼聲怨玉徽。悵望西樓珪月滿。惜君猶更向南飛。

早發途中

六幕星翻斗轉車。攬衣王粲更離家。孤城隨月三槌鼓。碧樹啼烟九子鴟。獨望殘雲愁霰雪。暫聞長笛憶京華。霞朝莫問離懷苦。帶眼愁多只有賒。

喜雨

陰霞襲曉混層暉。雨勢連天泱泱垂。潑火正投寒食日。催耕併及杏花時。波生客浦揚舲遠。潤逼宵槌作。摻遲把酒命賓聊一笑。吾農喜罷及吾私。

晚春有感

試上高臺望綠蕪。一春芳意向人疎。殘花半落紅無幾。新筍爭長綠有餘。底處流霞殘別酌。卽時油壁欠來車。不須更向昆池去。便有胡僧話劫初。



景文集卷十九

五言長律

享廟禮郊詩有表〔案〕仁宗本紀。事係慶歷四年十一月。

右臣昨以攝職奉常對相大賚自齋幃之出宿屬紛雪之糅空蓋百神來臻將受其職故九旻凝晦用顯厥靈洎大輅啟行陰雲解駁轍無纖塹道有微津天日交華室家胥慶而又皇帝陛下虛次清廟盡孝思之恪徹擗上壇極尊奉之意六成備奏三獻有儀寒飈戢吹朔氣停凜美光充于四極喜氣洽于萬情此蓋聖德升聞靈鑒垂答黍稷之馨非至天人之際遂交臣親觀善祥敢忘詠歎謹齋祓撰成享廟禮郊五言詩各一章一章八韻一章十韻干冒宸嚴無任省循荒斐戰慄屏營之至謹隨狀通進以聞謹奏

享廟八韻

左廟崇清烈前郊赴享期瞻言七世室竝薦一元祠樂變攬金備祭日詔諭太廟備奏九成不令減節天行步玉遲香茅均奠鬯錦册不慙辭今制竹册用錦粧標有詔回宸輦他宮奉母儀衣冠對游月脂澤感平時俟獻庭虛次兩廟各有宣行禮更不入小次登歌拜受禧飲福登歌樂作大哉王者孝萬葉煥烝彝

禮郊十韻

大駕峩千乘。長塗過百塵。塵清屬車地。雪盡幔城天。先是已卯大雪。至丙辰。乘輿赴太廟。雲物開霽。辛巳。赴郊宮。則馳道清潤。不塵。不淖。步輦黎明。

降華燈。艾夜燃。升琮奠。黃粹薦。璧捧蒼圓。牲俎羣靈匝。霞觴二祖聯。北郊。太祖皇帝。太宗皇帝。升侑。上垓皆徹藉。壇第一。

緋褥接黃褥。導至神位。前。有詔。徹去。以明尊奉。小次但虛褻。上立俟三獻禮畢。移時。不御小次。不見纖蘿動。是日。四方澄靜。月明星燦。寂無微風。惟聞雜佩旋。回雲

終樂奏。詔合備曲。故送神樂。尤舒遲和雅。熏月上柴煙。焫燎之時。日至高。日至方流慶。崧呼節獻年。欲知釐事畢。雞赦出樓前。

大禮慶成。并狀。〔案〕仁宗本紀。係寶元元年事。時已隔景祐三年。故云三歲一郊時也。

臣向緣法從。祇覲慶儀。自六飛之健行。訖萬靈之合享。事皆如震。官靡告勞。瑞雨灑途。而即收。陽旭騰空。

而可愛。士無瘡苦。民溢歡謳。此皆皇帝陛下。明發有懷。小心昭事。馨香肆于霄極。虔鞏格乎神心。介福蕃

釐。交騰于百順。振聲飛響。洞接于九圖。大眚惟新。含生胥抃。臣飲和云舊。逢吉日多。輒呻畢以考言。均過

簫而效響。謹抒陽郊慶。成五言詩一章十六韻。干冒宸聽。無任震惶。謹繕寫隨狀。上進以聞。謹進。

上帝懷明德。圓壇展盛儀。南城七里路。三歲一郊時。豫動森華蓋。乾行儷絳螭。山河對旒冕。辰象倚旂旗。

禰祐前增謚。皇靈下告慈。密都俄奠玉。清廟徧嘗粢。田燭紛先置。軒營肅左移。禮行忘景晏。恩厚覺寒遲。

紫宙天鴻洞。賓柴燎陸離。合祛聯祭秬。妥侑判純犧。膾食千華炬。陪祠萬翠綏。開天浮協氣。亘海受洪釐。

變日兼祥至。隨風與令馳。羣心樂更始。徽冊貺顛辭。堯舜文章煥。淵雲頌嘆疲。無階効論報。敢告日孜孜。

孟冬駕狩近郊。并狀。〔案〕仁宗本紀。係慶歷五年十月事。



臣伏觀今月十七日幸楊村打圍。皇帝親射麋兔甚多。至未刻還宮者。歲始孟冬。駕云行狩。除地近縣。先置迴場。詔七萃以景從。按六龍而行健。皇帝陛下躬御武節。俯從前禽。兩驂亟馳。一發如破。獸人給鮮之不暇。君庖課獲以既盈。幔省中休。衢尊徧錫。取不殫物。姑薦宗廟之新。民俟其來。喜見羽旄之美。入而振旅。日未靡旃。臣猥挈荷囊。預從豹乘。親逢盛事。難默悴音。謹撰成皇帝狩近郊詩一章五言二十韻。繕寫隨狀上進。輕洩呈覽。伏用震惶。

講事當農隙。于畋法健行。百神奔漢蹕。萬騎扈軒營。曠弩先驅肅。彫戈後隊明。雲羅垂列岳。虎落壓裨瀛。掠野毛羣萃。搜林羽族并。熊羆兆中見。鷺鶴陣前程。疊中星孤妙。連飛月箭輕。皇帝親射皆指禽命中。鴈窮書併墜。兔盡窟兼平。俊鶻交拳擊。寒鷹厲吻鳴。舞驂均耳耳。鉞犬鬪令令。示祝仍開網。招虞不用旌。纔聞大綏下。已見獲車盈。行在移鑾仗。中途集幔城。壽觴稱帝酒。恩膳徧君羹。霧日曛曛暖。霜原澶澶清。長楊卷衰葉。敦葦拉枯莖。羽獵何煩諷。車攻遂合賡。寧專乾豆薦。要閱建章兵。風入旂常影。天含鼓吹聲。九街猶未晚。堯屋已還衡。

進幸南園觀刈宿麥詩

有表  
〔案〕仁宗本紀  
係天聖三年五月事

臣某言。伏以園游神隩。素謹于弄田。霄極嘉生。式登于首種。震吾王羽旄之美。竦彼都人士之觀。伏惟皇帝陛下。惠利翔仁。清明求治。候駟星而訓務。謹烏師之扈民。萬寶阜滋。至和鼓舞。直斗城之南辟。嚴虎落

之繚垣。薰吹襲辰。秀岐彌望。京師奔告。獻狀于屢豐。宸蹕健行。宣風于一豫。用薦新于寢廟。差賜帛于農人。薰爲樂和。塞乎穹壤。臣幸逢嘉會。竊綴蕪音。得于轅壤之餘。備乃瓜華之采。呈覽是瀆。隕越爲憂。臣某謹進詩隨表稱賀。

農扈方迎夏。宮田首告秋。嘉生擁瑤縣。蕃穗徧天甍。肅雨津莖浹。薰風獵穎浮。登成告田峻。省斂後王游。紫宙凝神暇。丹書訪道休。天行九五健。歲取十千求。洪洞開金狄。連蜷按玉虬。塵清屬車豹。槍密羽林騶。芝覆依丹旭。旌門倚綠疇。先驅護綿野。後騎隘長楸。滌圃初開地。腰鎌競勸收。田趨農帝耒。塍錯夏王溝。粟攢周甸。茨梁屬舜眸。籩長包圈虎。箱重載星牛。九扈開靈圃。三辰駐綵旒。勞農差有賜。置酒酌言酬。鳴爵知年稔。爲魚告夢優。雲雷一日澤。鐘鼓萬人謳。帝醉鈞天闕。仙歸紫氣留。明馨資寢廟。足食煥緹油。

觀太學釋奠

鄉盛菁莪選。邦崇奠菜儀。涓辰大昕鼓。持節少牢祠。粉袞瞻凝睟。銀袍豫攝齊。芼羹紛澗沚。鬱齊泛尊彝。璧水回寒影。經槐墮曉枝。幸觀三獻罷。共荷百朋時。

大酺紀事十四韻

天禧二年

太極登徽冊。鴻恩潤慶圖。三秋少皞月。五日漢家酺。碩惠東西暨。高年左右趨。雲雷方霈澤。酒食更成需。慈宴周繇寓。宸嬉極上都。風飛迎沛筑。尊滿列堯衢。鼉伐漁陽鼓。龍吟北里竽。激波呈曼衍。跳索戲都盧。

虎瑟修旃映。鷗夷後乘俱。瑞烟浮玉戟。靈旭射金鋪。篚帛侔王鎬。童冠盛舞雩。歌忘齊國味。辱免絳人塗。紫宙織羅廓。層穹協氣敷。萬靈酣飫賜。朝野正多娛。

奉和御製後苑賞花詩有狀

臣伏見。今月二十五日。召宰臣以下。赴後苑賞花釣魚。側聞降賜天什。許羣臣屬和。榮幸之極。二紀罕逢。臣濫直北門。于法當從。而偶以移疾。適在告中。不得侍歡祕幄。與百獸參舞。悵恨三陌。飛肉無階。謹率蕪累。次歌奉和聖製詩一章。局情淺致。無以稱道盛德萬分之一。干瀆呈覽。

詔蹕迴清籟。宸旒駐紫烟。喬雲霏漢幄。法曲度文絃。獵翠雄風度。凝香甲帳褰。仙葩浮羽葆。藻衛縟芝廛。式宴千鍾酒。迷魂七日天。宸章紆寶思。休詠掩樓船。

代賦後苑賞花釣魚

黃屋宸襟豫。靈琨苑制雄。鈞天回帝所。太液近唐中。瑞旭搖卿靄。丹葩雜紺叢。王魚多在藻。君鵠鎮迎弓。式宴晞陽露。徒歌屬大風。此時慈惠洽。共樂夏渠豐。春豫凝蒼陸。天旋駐翠華。黃圖包漢制。靈沼象周家。風助千人唱。神移萬品花。韶音清感鳳。騶節妙論羆。宴露晞心藿。需天灑酒霞。侍臣均式燕。義馭重西斜。

慈聖閣秋橙結實上召宗室同觀

〔案〕仁宗本紀。係慶歷四年事。

昔預穰侯貢。今移漢掖旁。帝憐秋實茂。天許本根強。媚葉童童密。幽花裊裊香。苞垂列星緯。味變九霞漿。薰軫分風近。仙盤餉露涼。和羹竝梅蕚。連葉讓芝房。舜日晨烘霧。堯雲夕護霜。不隨江北化。思助廟中嘗。盧橘非同種。安榴肯竝芳。榮觀聳麟族。賦筆助荷囊。

被召觀三聖御書詩

有狀 仁宗本紀 係天聖八年八月事

臣。今。月。九。日。蒙。召。赴。迎。陽。門。觀。三。朝。御。書。者。天。作。上。聖。神。付。多。能。珍。毫。霏。麗。睿。文。森。積。星。日。列。象。雲。漢。爲。章。詔。範。後。昆。作。成。希。寶。皇。帝。陛。下。仰。奉。祖。則。欽。懷。宗。軌。列。籤。分。帙。跋。尾。署。年。將。祕。禁。中。永。冠。緹。籍。何。圖。近。列。咸。預。榮。觀。慶。尙。臨。顏。物。皆。改。色。歡。猶。在。臆。歌。不。檢。言。謹。齋。祓。抒。成。詩。一。章。凡。六。十。字。以。伸。感。會。塵。昧。聰。覽。伏。用。震。惶。其。詩。謹。隨。狀。上。進。以。聞。

列聖多能備。俱留乙夜勤。出圖天與畫。觀跡帝成文。露灑紛仙液。鸞回雜瑞羣。毫均五色麗。書對十行分。玉軸羅旅帙。芝泥儼舊薰。嗣皇尊世哲。金匱冠攸聞。

題承詔亭

地占高明適。亭兼仁智居。竹林茲置酒。栗里近回輿。山對盤龍外。濤觀濯鷺餘。落霞霏迴宇。升月淨涼疏。園甃梧陰合。牕風桂籟徐。岳芳曼空逕。野綠冒前除。宴廈仍喧雀。賓庖已壓魚。落成嚴詔下。猿鶴怨輶車。車駕出獵和丁學士

九扈聊清野。三驅比出畋。紫雲華蓋上。玉斗帝車前。藻衛羅長薄。星槍落晚塵。旗開龍對舞。新製黃龍旗以標行在驂合鴈相聯。魚貫圍中隊。風毛仗裏天。寒熊批怒掌。飢鶻下蒼拳。困獸開仁網。良禽獻廟鮮。上射中禽。即先薦太廟。賜庖飛騎促。勞飲醕烽傳。歷覽黃圖迴。裴回翠帽旋。邇臣將盛美。吉日繼王篇。

紀聖詩

沙麓披祥牒。金刀襲裔昆。嬪虞冠媿泖。生子首姜嫄。自昔儀椒壺。乘時正翟軒。緯綸躬象服。黃老好名言。慈蔭天同廣。柔風律竝暄。露光流月姊。祕緯應星龜。嗣統開橫兆。遵遺奉壽原。愛親周道始。加大漢儀尊。參務絲言慎。臨朝玉色溫。從容攜日月。指顧靖乾坤。盡散脂田邑。親繰繭舍盆。紀功彤管史。貽訓濯龍門。寶稼興東戶。佳兵戢左韃。萬靈翔氣辨。五始匝春元。夜隕西方雨。神清積石源。良時標歷鳳。延祝動廷鴛。纒玉虹光射。絲囊露采翻。齋科藥珠館。供會佛家園。薦壽超千劫。同寅望九閭。南風來助曲。北斗下臨罇。瑞鑑紅搖旭。香罍碧裊昏。欽承子道至。奉養母儀敦。雉翼橫霏霧。仙盤灑瑞噉。紫雲回幄影。銀蒜動鈎痕。我有吹笙宴。朝均湛露恩。倂圖邁明辟。雜霸掩曾孫。束帛霑羣后。張旛答樹惇。思賢君子苻。循法大夫繁。賈貝南浮海。邦圖北際鯤。此時歸寶算。仙石奉綿存。

九日侍宴太清樓

薦九標佳節。中天駐翠輿。晨光清複道。秋色徧儲胥。畦稻霜成後。宮橙露飽初。省收行步玉。拜賜儼華裾。

皇帝臨視刈稻宣許從臣同觀又令觀橙訖並賜橙稻新米曼衍來長樂。鷗夷下屬車。帝韶儀瑞鷗。王藻躍恩魚。霽霧供披拂。涼風助掃除。高楊穿葉外。仙菊泛花餘。寒入弓聲厲。歡留酒算徐。神池原不浪。溫樹未曾疎。帝眷憑秋稼。臣心仰夏渠。承平將樂事。併入史臣書。

十日宴江濱亭

節去歡猶在。賓來賞更延。悠揚初短日。淒緊乍寒天。霽沼元非漲。秋花自少妍。蟻留新獻酎。蕙續不殘烟。戲鯉衝餘藻。游龜避沂蓮。流芳真可惜。從此遂凋年。

尹學士自濠梁移倅秦州

于役三年遠。論兵兩鬢斑。不辭征戍苦。要作破羌還。楯墨應圓熟。兜烽報永閒。浮舠背淮服。盤馬入秦關。遂閣讎書筆。仍餘聚米山。憶君他夕恨。遙向隴雲間。

初除直講獻內閣馮學士孫侍郎

圓海崇遺教。中陵育茂材。霧從仙市合。風向舞雩來。寶篆侔東壁。儒篇訪曲臺。泮芹參上俎。燕篲擁輕埃。鼓篋華冠聚。丘山縹帙開。蟲形浮墨沼。鼠耳綻經槐。有客緣承乏。無庸愧濫陪。難重漢家席。易眩魯門杯。學困青箱廣。書愁皓首催。空塵博士議。不稱洛陽才。高閣連雲景。層城枕斗魁。惟應仲尼冶。未惜鑄顏回。

和石學士直舍晨興

高閣休殘暝。層梁逼早暎。芳風萬年樹。殘月九重闈。枕欹淵魚夢。裘貪睡貉溫。星杓壓城角。天漢落河源。肅唱千廬寂。傳聞萬戶喧。烟浮紫藜觀。春著翠梧園。有客方岑寂。紬書滯討論。新年居右席。此地到西崑。硯瀉含毫滴。刀餘削柿痕。談高白馬度。頌罷碧雞翻。幸接雌黃几。同歡清白樽。古樂府有清白各異樽。不因窺麗句。誰刮翳矐昏。

再到國子監感昔有懷

十載虞庠路。依然目所存。高槐記經市。秋水識橋門。迴閣珍圖祕。長廊審像昏。舊徒皆突弁。故友卽塵根。與予同直講者公孫覺王琪皆已淪謝。昔在衣成緇。今還祿有軒。范雲身寢老。雲表有太學老博士之語。何術謝君恩。

上元觀燈紀事

泛膏聞舊典。秉燭嗣芳辰。霞破初迎月。林寒卽讓春。鈞天移帝樂。北斗下城闈。匝地沈香燎。浮空羅襪塵。竝珂馳寶鉸。分幟驚彫輪。忽去騰夷路。還來競要津。酒胡矜耐美。梅額銜妝新。誰見甘泉時。昏祠遂至晨。

玉堂北欄叢竹

玉署凝嚴處。朱欄封殖恩。其誰賞高節。祇自保孤根。密幹青杜蠹。危梢翠纛翻。故林茲地隔。新實幾時繁。細籟供風枕。斜陰疊月軒。雀驚衝葉墮。蟬靜抱枝喧。戴氏當年譜。梁王自古園。對容金馬客。深在玉堂門。本以蕭蕭擢。還由冉冉存。烟能留暝色。粉解記春痕。拾籜題吟墨。披叢爽醉魂。愛君同省樹。不敢爲人言。

九日

帝京蒙福近。相國偃藩初。瓮熟中齋酒。廚鮮上客魚。高懷日蕭散。外物久驅除。犀首無妨飲。宣尼或飯蔬。林凋疑野闊。荷罷似池虛。此樂憑誰辨。須煩藻思餘。

會聖宮

寶地披重岫。環宮庇萬榱。人瞻鼎湖駕。天護玉簫祠。列聖聯絺袞。千官擁翠綉。陰森殿中傘。芻雉羽林旗。白日窺晨幌。明河宿曙帷。露盤金突兀。甲帳繡葳蕤。馴象春耕外。遊冠月出時。洛湍縈禁籞。嵩岳倚罽罍。早晏嚴薰療。春秋達信辭。樽醅綠葉桂。齋饌紫房芝。壁帶華燈錯。銀牀露綆垂。奇葩萬品秀。珍木五衢滋。碧柱峩翔鳳。璇璫舞暗螭。園金布為地。次東有景雲禪院。泉玉漱成池。宮西即馮家溪。劫石聊客拂。仙花自不萎。樓舍太虛近。鍾到下方遲。賜服鄉三老。歌風沛小兒。奉承紛有次。過謁儼多儀。此路真姑射。前峯即具茨。何當紆詔蹕。原廟慰時思。

和道卿舍人承祀出郊過西苑馬上有作

西郊一超忽。祠節暫脚蹶。天迴欹臨野。河長側貫都。飛廉披苑路。南斗抱城隅。填塹時休獵。棲糧戶免租。虎歸仍習圈。鳳下稍依梧。池岸斜聯籞。宮楹上集胡。慎齋雖有屬。勝踐未云孤。霧裏過仙市。輪邊認佛圖。檉楊閒對偃。鶴鵠靜相呼。牧罷林將暝。樵歸徑自紆。有懷摛鏤管。何苦促驪駒。壯思飄然發。知君顏謝徒。



三月二十一日集海雲鴻慶院

地勝祠仍古。春餘物徧華。山雲時抱石。佛雨不萎花。嶺挾樓梯峻。巖牽殿城斜。淙谿雜環佩。怪蔓走龍蛇。  
供去聲。坐僧飛鉢。香園客戲沙。吾游真草草。深意負青霞。

喜同朱舅秀才小飲

隱几劇端憂。良辰喜嘯儔。挾天鸚鵡筆。換酒鸚鵡裘。談塵真同色。賓壺喜順投。雪雲低北戶。碁墅接西州。  
露葉燕蘭老。霜津鄧橘秋。二豪休作頌。五白自成牟。平日欣交呂。前期卽召鄒。彫觴莫辭醉。溝水易分流。

將東歸留別楊宗禮十韻

清白舊家聲。論交得寧馨。摛華叶鳳賦。聞禮墮鱣庭。潘夏叨連壁。荀陳更聚星。膠投思固漆。渭濁許過涇。  
合坐懷妍唱。分詩寫素屏。情深方柏悅。性懶自榆暝。短羽偏驚月。羈游劇泛萍。北梁催稅鞅。南郡阻繙經。  
曉色三竿日。離歌十里亭。期君促西上。相遇在神垌。

漢州房公湖

丞相于藩日。䟽湖訟閣西。疑從濟川地。寫出釣璜溪。流淺初無浪。源清不貯泥。月爲宵幌燭。雲作曙樓梯。  
礙馬汀篁密。縈船浦蔓低。人亡桃李在。脈脈尙成蹊。

得故人楊備書

款款南雲信。相存安穩不。比年常屬疾。茲地幸爲州。浩蕩親知隔。奔騰日月逾。暴公初有刺。孫叔竟無謀。黑白蠅間變。嫌疑李下求。側身忘夙夜。回首得沈浮。士節何嘗屈。君恩回計酬。泝封共龜手。知罪一春秋。言命曲來罕。逢辭敢辯庾。紛吾常用拙。焉往不離憂。重詛勞王物。揚芬避十猶。虛弦落驚鴈。眞月瑞疲牛。谷口輸誰隱。周南愧自留。疋殘千騎長。形勝二山流。寡術驅秦盜。彌旬錄楚囚。巫風那肯化。祠鼓詎曾休。安敢龔黃最。眞堪趙魏優。闕然宣布曲。直爾伴牢愁。今子身東望。思同智北游。攄懷弄杯杓。對帙理墳丘。眷眷餘青眼。蕭蕭共白頭。姑縈裘與葛。隨度臘和臙。構櫟人寧顧。遺簪上或收。狂言非所惡。君仍惠施儔。

內閣孫侍郎生辰紀德

鳳瑄凝姑律。奎鉤誕佐臣。祥標六蓬矢。家盛十朱輪。變道齊成魯。端朝甫及申。禁中朝夕誨。帝右老成人。徧讀蘭圖字。多陪豹尾塵。桓榮師自許。石建謹無倫。振鷺飛逾潔。緇衣久更新。鑄賢今是冶。播物晚爲鈞。胡廣潭留菊。蒙莊樹有椿。奉公爲壽禱。山立輔昌辰。

郭仲微見過問疾

薄宦眞何補。居然滯拙艱。無心圖作佛。予素不喜浮屠常以此箴誚世人有疾願藏山。臂率愁肌減。毛鷺暮領斑。未能吳客問。誰恨越人彎。學倦書刀廢。呼慵博雉閒。寧慙局轅下。爲恥醉墦間。直道胡論枉。空言分合刪。蒼蠅徒擾擾。狂獺自嘖嘖。上客迂飛蓋。窮閭問閉關。餘光照徒壁。高辯破連環。感激排非聖。棲遲觸怒頑。十年休

賦蜀二始欲睎顏。予屢乞郡守而未遂。昔有彈冠進。今將襍被還。春休晴絮白。日入暝霞殷。舊產平臺側。新田潁水灣。予近有田數頃在潁。陽翟即潁水之陽。吾游如不遂。巖樾試重攀。

和晏相公九日郡筵

令序凝秋籥。歡游駐使軒。行觴酒籌密。踏節舞鞞翻。榴熟丹房解。萸香紫粒繁。風頭臘輕慘。日腳送斜暄。鏤管新篇逸。轉運學士即席賦詩。吹花舊俗存。請爲丞相壽。長久慶調元。魏文帝書稱九月九日俗嘉其名以爲宜于長久。

早夏集公會亭餞金華道卿內翰守澶淵得符字

早夏乘休沐。離襟屬餞壺。欣同佩荷橐。恨及唱驪駒。感戀陪雲筑。道卿留預乾元上壽乃行。翻飛別帝梧。騰裝照魚服。行帳繞犀株。慙去班中詔。寧容滯左符。惟應九里潤。蒙福在京都。



景文集卷二十

五言長律

鹿鳴筵餞諸秀才赴舉

今日真良宴。歡持鳴鹿杯。初飛禰衡表。共識子虛才。龍沼雲鱗動。鵬溟浪翅開。危言切晁董。祕思屬鄒枚。經市騰裝早。封軺續食催。應須戒驅弩。翹待駟車回。

送承制劉兼濟知原州

假節分州郡。掄才出將門。還提射聲旅。上以禁卒千人為君帳下并破護羌屯。君兼涇原路都監尺詔方臨遣。新書得細論。旃會陪獵帳。戍校接歡罇。後伍鞬囊密。前驅鼓吹喧。隴笳梅落怨。邊陣月殘奔。赤白猶傳警。先零久負恩。行期雪家恥。三捷奏天關。

早春雨中因呈邑大夫

瑞澍霑春陸。膚雲壓暝臺。霰寒休雜下。風好即東來。遠岫吞將盡。陰霞照暫開。徧滋畦下麥。併濕隴頭梅。灑留南魚躍。漂蘆北鴈哀。蓬乾釣師臥。疢冷牧騶回。天發千驍電。人同百里雷。我私欣遂及。頌扈九農催。

送范希文

日夕朋簪遠。空成咄咄嗟。危言猶在口。飛語已磨牙。室救鷓鴣毀。庭喧獬豸邪。青蒲空頓首。白簡遂爲瑕。身歷千金險。頭經一夕華。便應過楚澤。何異向長沙。簣土障河拙。園葵望日賒。盡焚温室草。尙得使君車。勝壤堪懷古。扁舟復載家。此時能痛飲。努力詠餘霞。

喜有秋

順氣絳區廣。嘉生告稔初。人驚萬箱入。天賜九年儲。絕塞元休馬。吾農先夢魚。牛應賣刀後。酒是乞漿餘。祀續田神鼓。郵喧粟尉車。是年名大有。敢告史臣書。

荷花

別岸香風起。橫塘夕霧開。歌須靜婉至。步憶貴妃來。拆藕冰絲剩。翻荷孔蓋回。曾經佛圖咒。解壓柏梁災。盛府開爲幕。騷人借作媒。謝才方麗句。卓寡比愁腮。有惹緣誰苦。名蓮固自猜。簪形侵寶髻。燭柄近宮煤。游羨龜巢密。看防漏葉催。使君迷已久。落晚且徘徊。

早濟江步

南浦招招子。中途靡靡心。歸舟一葉小。秋水兩厓深。露鶴淒仍斷。風蜩細欲沈。桂華翻落月。榆影送橫參。壯志兼時晚。勞愁已日侵。霜摧過江枳。鐘眩避風禽。薄宦真蓬累。歸期問藁砧。惟餘搖落意。天寓共登臨。

龐祕校掾九江兼歸汝南迎侍

長停愁不淺。征袂拂殘梅。潘御家園近。毛欣府檄來。晨羞魚尾潔。春溜鴨頭催。拄頰談無對。參卿掾有才。  
城隅山疊映。樓戶月弦開。廡樹藏環感。因君寄九迴。先君昔掾九江。予與伯氏皆生于廡舍。舊老今猶識之。

送次饒趙職方罷成德軍通判還朝

倅乘淹榮序。封軺促覲期。文章二臺妙。昆弟五常眉。樹隱征郵密。花留祖蓋遲。秋毫供握處。春草見歸時。  
書笏人思對。垂囊客愴離。羨君如彩鳳。先集翠梧枝。

泌陽王介夫

上笏蘭臺彥。能文江漢靈。貪持御史劾。不顧大夫醒。詆毀真銷骨。嫌疑畏殺青。投冠集烏署。解絨墮鳶溟。  
毛脫荷囊筆。塵昏寶帶釘。書空寧咄咄。避弋更冥冥。校尉貪廚釀。臨川集貝經。光華覆盆日。哆侈譖人星。  
生計依江芷。年芳老砌蓂。無人舉幡救。渾涕望明庭。

還都有感

去國已十載。召還今見收。初無潁川最。真忝茂陵求。物色多新識。寒溫減舊游。宮毫與塵晦。省樹向人秋。  
奏乏三千敏。恩難萬一酬。重尋紫荷橐。卻侍翠雲裘。建禮文書少。湯官餅餌優。屏營趨虎殿。子細認奎鉤。  
晚節誠知止。吾生況若浮。身來雖魏闕。病免合滄洲。淺醉貽樽恥。衰容作鑑羞。歸年非鴈後。破月是刀頭。  
依聖讒方弭。逃陰景自休。乞骸從此近。終計返林丘。

歲周移書課版

漢史傳循吏。唐家秩省郎。海禽驚廟樂。池鶩費君梁。巾禿聊蓬首。帷閒即偃牀。案杯過永晝。寺鼓報殘陽。束帙雲籙冷。窺園李樹僵。後車常擊鼓。狼酒不空腸。未易矜刀筆。徒煩裹服章。歲周無吏最。天極正包荒。

舅氏自壽陽由京師歸安陸

道舊欣來駕。銷魂遽遠離。顛毛同白日。舅雖大予一紀。然予今已白頭。俗眼暫青時。客飯稽留數。古詩趣令辦粗飯。慎勿使稽留。齋醪酌。酃遲。風波須畏險。老大共餘悲。楚莽先春動。梁雲向雪垂。還家存別墅。他會看圍碁。

仲微相過把酒有感

故人當止酒。今夕喜銜盃。事與朱顏改。年將素領來。鹿車君偃蹇。鶴祿我裴回。紬史餘三擿。為郎愧一臺。洛吟真可效。僨賦久成吟。平日雩風瑟。塵撓為試開。

送樞直梅學士守并州

素領登朝舊。黃樞遞直新。還持漢家節。坐福晉墟民。旆羽凌霜曉。袍花犯雪春。連雲祖壇幄。隘道舞驂塵。檄楯邊書息。羣羊府宴均。唐詩存雅俗。亥字訪遺人。緣飾資良守。都俞重老臣。莫為朞月調。行此冠華紳。

上春晦日到西湖呈轉運叔文學士

春徧西湖上。湖漪綠勝醅。驚魚迎瀨躍。鬪鴨擁波來。柳已綠烟重。花仍赴暖開。側汀烟媚篠。臥石水銜苔。



岸轉橫杠度。川窮飲舫回。暗浮蟲聿役。閒立鷺毳毹。野畔平如界。林蹊潤不埃。光浮好雲日。影倒靜樓臺。山色乘晴露。霞容著暝催。溪行凡幾曲。恨乏昔人才。

硤石乘舟晚歸

晚棹乘餘興。平川不駛流。山來疑逼岸。林度省移洲。郭迴花仍繞。岳寒桂自留。鼓聲風處疊。颿影浪間浮。候吏緣溪約。迎旗駭浦鷗。嚮時天際遠。還有望歸不。

中秋望夕不見月

異時涼月好。常爾惜嚴更。此夜浮雲惡。胡然溷太清。心孤王粲牘。案對景山鎗。海蚌猶能滿。城烏更不驚。裴回循北牖。黯淡倚西楹。蛩杼逢時急。釭花得闌明。桂高應自秀。蟾遠太無情。坐想瑤輪轉。孤懷悵未平。

清明值雨

有滄興芳序。餘寒惜慘悽。遠山沈向盡。雜樹望先迷。天闊都成暝。雲昏本自低。漂灰禁餘火。浮棗祓殘溪。檻篠風爭亞。汀鳧夜不棲。篷聲攢釣渚。蓑滴擁烟畦。積潤侵重構。長嚴壓曉聲。游人盤馬路。獨漉逐春泥。

瑞荷同榦

協氣凝清籟。嘉祥擢鈿荷。共茄含瑞液。分蒂葢文波。魚戲浮香併。龜游得地多。房芝助連葉。宮樹讓交柯。柄合千絲剩。盤差五兩過。正須裁紫橐。回入從臣歌。

愁吟

夜雨平階滴。寒燈照幔孤。未生靈運草。先據惠施梧。千里徒傷目。三年欲變儒。回腸啼絡緯。遠恨送檐榆。怨曲傳繁瑟。悲歌缺唾壺。此中如借問。掩鼻願操觚。

偶書

遠作分符守。猶爲持橐官。易漂非待煦。自粟不須寒。髮變他年素。心餘即日丹。過門休翫髀。逢路定洄瀾。忌刻殊忠告。遽施足面謾。直緣蜚語入。正恨飲章難。墜後仍加石。驚初更避丸。讒箕元有舌。僞玉嚮無瘢。任拔終傾藿。雖憎亦佩蘭。隴雲平莽莽。林露夜團團。且欲排孤憤。還應覓暫歡。兩岐行處恰。五醜食時盤。地善人差逸。天高網寢寬。戀軒嗟棄馬。巢閣羨歸鸞。楚嶂橫朝塞。淮波漱夕灘。空將西望眼。隨日到長安。

柳佐乾德尉

塗會森璋罷。唐銓結綬初。家聲蘭倚玉。祖德鶴銜魚。周粟思馨膳。京塵惜弊裾。垂腰青采綬。薰帙翠芸書。鶴怨空山帳。雞棲外舍車。日期優政治。公啓達儲胥。

懷古眺望

城闐聊屬眺。千古恨悠悠。夏享空臺毀。韓亡故社留。廟祠旌穎鳳。溪水識巢牛。春色依林動。晨煙傍戍浮。房驕閒自集。田鶴叫相求。町篠沿緣密。川葭覆靡柔。櫟墟迷鄭鄙。魏路隔軒游。感昔如吾輩。曾經幾斛愁。

海棠

西域流根遠。中都屬賞偏。初無可竝色。竟不許勝妍。薄暝霞烘爛。平明露濯鮮。長衾繡作地。密帳錦為天。  
吳人語。帟覆為帳。天。淺影纔欹檻。橫柯欲照筵。愁心隨落處。醉眼著繁邊。的的誇妝靚。番番恃笑嫣。何嘗見蘭媚。要是掩櫻然。豔足非他譽。香輕且近傳。所嗟名後出。遺載楚臣篇。

滁州趙學士重修懷嵩樓

丞相懷崧罷。因之名郡樓。使君嗟久廢。華棟鬱重修。人世興衰換。山川處所留。落成今日宴。感舊向來愁。西北天根遠。東南地脉浮。雲生蘭葉棹。月近蒜條鉤。樹雜猿呼暝。風長鴈送秋。此時如極目。歸思恐難收。

開元寺塔偶成題十韻

集福仁祠舊。雄成寶塔新。經營一甲子。自至道乙未經始。至至和歲乙未告成。高下幾由旬。屹立通無礙。支持固有神。雲妨垂處翼。月礙過時輪。頂日珠先現。條風鐸自振。沙分千界遠。花散四天春。億載如如地。三休上上人。堆螺俯常碣。繚帶視河津。陶甃勤爭運。園金施未貧。誰紆簡棲筆。為我誌琳珉。

季春八日喜雨答李都官

夜魄離星舍。春膏浹大田。乍迷榆塞樹。徐暗柳營天。沼涵銀波蕩。階鳴玉綆聯。餘萌催沃土。殘魃趣沈淵。迴溼來鶯外。斜寒去雁邊。莓莓滋野秀。纂纂濯花妍。戴響饒農笠。眠聲羨釣船。罇雲時露日。迷岫旋埋烟。

酌酒聊相勞。斯倉竚有年。勞君歌閔雨。予志謝先賢。

賦得敗荷

爲結秋荷恨。因來溝水西。魚驚一蓋缺。龜落半巢低。細暗嬋娟渚。香乾敦宰隄。莖枯縈繭緒。盤側漏蛟啼。自此空瑤席。他年問濁泥。那堪塘上雨。點點共淒迷。

小荷

濯雨拳紅展。擎烟側鈿微。纔勝漢臣橐。未辦楚人衣。蟲蟲閒攢沼。差差靜隱磯。游防靈蔡重。戲怯孺魚肥。莖弱從風靡。珠成恐浪揮。文鴛不肯去。始得蔽斜暉。

馬上逢雪

馬上逢飛雪。都城觸望新。天如不擬暝。樹欲頓成春。霰急初鳴瓦。塗輕自壓塵。灑達先映璐。飄闕欲藏銀。宛轉呈歌麗。裴回逼舞真。散鹽拂波亂。飛莢點星勻。密影俄飛蓋。乾花看鈿輪。無煩溼潘鬢。今是一毛人。

南方未臘梅花已開北土雖春未有秀者因懷昔時賞玩成憶梅詠

江南寒意薄。未臘見梅芳。爲有輕盈態。都無淺俗香。香方云甲煎淺俗倚風斜夕臉。呵雪噤晨妝。刀尺憑蛟杼。比

鄰託粉牆。高枝籠遠驛。側影照回塘。曠望黃昏月。嫵妍半夜霜。一身來上國。三載別炎方。不見南枝早。方驚北道長。當時猶引領。此際故回腸。淚盡羌人笛。魂銷越使鄉。危樓難極目。恨酒怯盈觴。未到盧家第。終

虛白玉堂

李少傅逸老亭

逸駕歡迎養。飛軒適所宜。營菟茲寓老。趨鯉即聞詩。地勝心逾放。人閒趣自奇。嵩雲來冒棟。滎溜下通池。靜偶惟黃卷。僊謠雜紫芝。牕風伴披社。簷月對支頤。相筆畱齊榜。邦侯慶壽卮。美哉輦棘詠。兼記掛冠時。

答朱彭州惠茶長句

芳茗標圖舊。靈芽薦味新。摘侵雲崦曉。收盡露腴春。焙煖烘蒼爪。羅香弄縹塵。鑿浮湯目徧。甌漲乳花勻。

和去聲要瓊為屑。烹須月取津。飲莫聞藥錄。本草茗以菜莫飲佳奴酪笑僮人。雪沫清吟肺。冰莖爽醉唇。嗅香殊太輟。

瘠氣定非真。唐陸鴻漸云。嚼味嗅香非別也。又母丘景言。茶瘠氣侵精。此語非是。坐憶丹丘伴。堂思陸納賓。由來撤膩鼎。詎合燎勞薪。得句

班條暇。分甘捉麈晨。二珍同一餉。嘉惠愧良隣。

答朱彭州喜雪

雪集先何所。天彭關內州。雲澌結河漢。風礫灑林丘。眩晃三霄接。繽紛一氣浮。光逢晨睨薄。花得冥寒稠。拂樹瓊爭動。縈牆粉暫畱。縮毛驚雀馬。埋目憚吳牛。客至蘭矜曲。仙歸鶴擁裘。鹽邊混熬素。玉處亂方流。併響鳴巖竹。分滋浹壟麩。印沙鴻鴈喜。蔽葉鷓鴣愁。蒙福沾餘潤。稱觴隔竝游。錦官才凍雨。廣和負妍謳。

訪李生野墅

風物澹蕭辰。陵阿訪隱淪。野杠裁度馬。溪路劣生塵。認菊知陶宅。觀禾識魯囷。林臯偏樂我。魚鳥似畱人。山霽羣妍露。林虛衆籟新。長沮亟相語。非敢問迷津。

書懷寄郭正

僑籍依三輔。愁顛徧二毛。星灰對遁盡。淚卷掩劬勞。併歎絲兼路。都捐筆與刀。思旌初不定。離緒僅堪縈。醜是流離子。材真樸遯曹。未成虞弁進。旋似郭竿逃。邑聚巔峴合。都城鬱律高。惟餘故人意。戀戀劇綈袍。

螢

腐化何微眇。孤光只自求。單飛一金躍。羣散數星流。廢苑蒼茫夜。離宮窈窕秋。戍埤同燼落。客幔共燈愁。明滅風前亂。裴回葉處畱。人間厭白鳥。不爲盡餘羞。

和梅侍讀給事秋雪

朔氣迎秋晏。因成糅雪飄。園賓驚早賦。郢曲愛新調。雜霰鳴寒擗。紛花混晚苕。光含闕邊鳳。溫借省中貂。縞頃纔供望。鹽波已屢銷。今年屬清思。曷寓共寥寥。

春前二日獲雪

佳雪春前降。層陰臘外畱。日昏霏霰集。風定舞花稠。浩氣皚皚徧。繁光袞袞流。灑林初亂塢。拂瓦暗平溝。洞蟲三雲仗。山迎萬玉侯。客車羊作駕。仙斝鶴供裘。只有歌堪和。都無色可侔。險堆憐傍砌。斜溼愛侵幃。

面旋成遲落。繽紛不頓休。粉塘連北渚。縞頃接西疇。興往惟思戴。賓來但憶鄒。絮痕侵柳動。鹽影著波浮。宿莽攢瑤草。長隄臥素蚪。正緣先畢雨。併欲潤天麩。應禱驅民瘠。呈祥溢里謳。長人蒙帝力。歡酌任言醜。

小雪

低雲淡河界。零霰集天涯。樹亂三眠絮。叢迷五出花。舞風都擬重。入隙故成斜。密瓦平將半。前山暝欲遮。漸堪迷淨練。併欲誤疏麻。粉出房陵水。鹽飛海岸沙。舟來戴逵宅。客過李王家。此日長安酒。旗高未易賒。

感懷

天與疎慵地。人無榮進心。死灰差免溺。棄杖卽成林。主諾固多暇。避賢懷所欽。難邀潁川鳳。敢望漢臺金。倚酒狂雖在。荷蓑歲已侵。恭聞容考績。緣此未投簪。

新筍成竹

雨町犀株突。陽臯錦槩攢。竅均軒世律。皮解漢廷冠。冉冉生能直。蕭蕭意自寒。翠雲舒作葉。碧血染爲竿。梢弱烟方定。筠浮粉未乾。拋陰照流水。迸節犯朱欄。會待翔鶴集。非緣戲馬殘。林間誰共賞。坐想七賢歡。



福